

Levítico

On uentli yejuan tlatla

1 ¹ToTEKO okinots Moisés ipan on tabernáculo* kampa yejua nemi, niman okijlij: ²“Xkinmijliti on israelitas in tlanauatiltin. Ijkuak yakaj nechmakas sen uentli de yolki nejua nemoTEKO, noneki nechajuikilis sen uakax, sen borrego noso sen chivo.

³Tla yakaj nechmakas sen uentli yejuan nochi tlatla, noneki nechmakas sen okichuakax yejuan xkanaj tlakokojli* ipan itlakayo. Para uelis nikselis^a, noneki kuajuikas niman nechixpantilis nejua nemoTEKO, kampa ikalakiyan on tabernáculo* kampa nejua ninemi. ⁴On tlakatl yejuan kuajuikas kitlalis ima ipan itsontekon on yolki. Ijkuak ijkon kichiuas, on yolki kiselilis itlajtlakoluan on tlakatl, niman itlajtlakoluan kintlapojpoluuiliskej. ⁵Kemaj on tlakatl kechkoyonis on okichuakax nixpan nejua nemoTEKO. Kemaj itelpochuan Aarón, on tiopixkej, kuiskej on yestli niman kajuichiskej tlapani niman ipan nochi ilados on tlaixpan*, yejuan onkaj nisiu itsakuijlou on tabernáculo* kampa nejua ninemi. ⁶Niman on yejuan kitemaka on yolki para on uentli yejuan nochi tlatla, kixtilis ikuetlaxyo* niman kitejtekis on yolki. ⁷Kemaj on tiopixkej kitlaliskej miyek kojtlis* ipan on tlaixpan* niman tlatlatiskej, ⁸niman ipan kitlaliskej nochi on nakatl tlatejtektli de on yolki iuan itsontekon niman ichajka de ikuetlaxkol. ⁹Yejuan kitemaka on uentli yejuan tlatlas, kipajpakas on tlajtlamach* yejuan ijtik kuika niman imetskojoyouan on yolki. Niman on tiopixki kitlalis nochi ipan on tlaixpan*. Ijki nochiuas sen uentli yejuan nochi tlatlas, niman ajuiyak yes, nechyolpaktis nejua nemoTEKO.

¹⁰Tla on yolki yejuan kitemakas para uentli yejuan nochi tlatlas, kixtia itech iborregos noso itech ichivos, noneki yes okichtli yejuan xkanaj tlakokojli* ipan

a 1.3 Ipan Hebreo on tlajtojli xkijtoua tla Dios kiselia on uentli noso kiselia on tlakatl.

itlakayo. ¹¹Ma kechkoyoni kampaka norte ika de on tlaixpan*, nixpan nejua nemoTEKO. Niman itelpochuan Aarón, on tiopixkej, kajsiskej iyeyo on yolki niman kajuichiskej tlapani niman ipan inajnakastlan on tlaixpan*. ¹²Kemaj on tlakatl kitejteki on yolki, niman kemaj on tiopixki kitlalis on nakatlatejtektli ipan on kojtlit* yejuan tlikuitikaj ipan on tlaixpan* iuan itsontekon niman ichajka on ikuetlaxkol. ¹³Kemaj on yejuan kitemaka on yolki, kipajpakas on tlajtlamach* yejuan ijtik kuika niman imetskojyouan. Niman on tiopixki kitlalis nochi ipan on tlaixpan*. Ijki nochiuas sen uentli yejuan nochi tlatla, niman ajuiyak yes, nechyolpaktis nejua nemoTEKO.

¹⁴Tla kuentlalis sen tototl yejuan tlatlas para nechtlakaitas nejua nemoTEKO, tla ijkon, uelis kitemakas sen kokotetsin noso sen pichontsin. ¹⁵On tiopixki kiuentlalis on kokotetsin noso on pichontsin ne tlaixpan*. Ompa kechmatilos niman kechkotonas. Niman tla yokipatskilij iyeyo inakastlan on tlaixpan*, kitlalis itsontekon on tototl ipan on tlaixpan*. ¹⁶Kemaj kixtilis itlakuajkualtekon iuan nochi on yejuan ijtik onkaj, niman konxinis inakastlan on tlaixpan* kampaka ikisayan tonaltsintli, kampa onkaj on tlikonextli. ¹⁷Kemaj kajsis ipan imajtlakapaluan niman kitlajkotekis, pero xnochi kotonas. Kemaj on tiopixki kitlalis on kokotetsin noso on pichontsin ipan on tlitl yejuan onkaj tlaixpan*. Ijki nochiuas sen uentli yejuan tlatlas, niman ajuiyak yes, para nechyolpaktis nejua nemoTEKO.

On uentli de trigo noso cebada

2 ¹Ijkuak yakaj kuajkis notech nejua nemoTEKO, sen uentli de trigo noso cebada, kuajkis on yejuan más kuajli, niman kitekilis aceite, niman kitlalilis kopajli. ²Kemaj kiktis itech itelpochuan Aarón on tiopixkej. Semej de yejuamej kikuis se mapichtli harina yejuan kipiya aceite niman on kopajli, niman kitlalis ipan on tlaixpan* ken uentli yejuan tlatlas. In kijtosneki ika on se mapichtli harina yejuan tlatla kiteixpantilia ika nochi kiuentlalia on harina yejuan okuajkik on tlakatl. In uentli ajuiyak nechyolpaktis nejua nemoTEKO. ³Niman nochi on trigo noso cebada yejuan nokauas de on uentli de harina, inyaxka yes Aarón niman itelpochuan. On harina yejuan nokauas, sanoyej yektli yes pampa okis itech on harina yejuan otlatlak, para nejua nemoTEKO.

⁴Ijkuak tinechmakas sen uentli de harina yejuan iksik ipan horno, tinechmakas memelatsitsimej yejuan tlachijchijtlí ikan harina yejuan más kuajli niman tlanelojli yes iuan aceite. Pero

xkipiyas tlaxokolilistli*. Noso tikchijchius pan kajkanauak yejuan xkipiya tlaxokolilistli* niman kajuichiskej ikan aceite.

⁵Tla mouen de trigo noso cebada tlaikxitijli ipan sen komajli, tla ijkon, noneki tlachijchijtl yes ikan harina yejuan más kuajli, yejuan xkipiyas tlaxokolilistli* niman yejuan tlanelojli iuan aceite. ⁶Kemaj tiktlatlapanas on pan niman tikajuichis ikan aceite, pampa in sen uentli de trigo noso cebada.

⁷Tla mouen de trigo noso cebada yes tlaikxitijli ipan tlalkajxiti yejuan ueyi, tla ijkon, noneki tlachijchijtl yes ika harina yejuan más kuajli niman tlanelojli yes iuan aceite. ⁸Tla yotikchijchiu on uentli de harina ika in tlajtlamach*, noneki tikiktis nixpan nejua nemoTEKO, niman tikmakas on tiopixki, para yejua kiktis ne tlaixpan*. ⁹On tiopixki kikuis san achijtsin on uentli de harina para kitlatis ne tlaixpan* ken sen uentli yejuan nochi tlatlas. In kijtosneki ika se mapichtli harina yejuan tlatla, kiteixpantilia ika nochi kiuentalia yejuan okuajkik on tlakatl. In uentli yejua ika nechelnamikij, on iajuiyalis nechyolpaktis nejua nemoTEKO. ¹⁰Niman nochi on tlen nokauas de on uentli de harina, iyaxka* yes Aarón niman itelpochuan. Ijkon nochiuas pampa in sen uentli yejuan sanoyej yektli yejuan okixtikej itech on okseki uentli yejuan notlatia para nechtlakaitaj nejua nemoTEKO.

¹¹Nochi uentli de trigo noso cebada yejuan nennechajkuiliskej nejua nemoTEKO, xkipiyas tlaxokolilistli* pampa nochi uentli yejuan nochi tlatla para nejua nemoTEKO, xuelis kipiayas tlaxokolilistli* nion nekutli. ¹²Uelis tikuajkis on tlaxokolilistli* iuan on nekutli nixpan nejua nemoTEKO para sen uentli de pixkilistli, pero xuelis notlatis ipan on tlaixpan* para sen uentli ajuiyak.

¹³Ipan nochi uentli de trigo noso cebada, noneki nenkitlaliliskej istatl. Niman maka xkauili mouen de harina ma kipolo istatl pampa on istatl teelnamiktia on pacto* yejuan Dios okichiu nemouan. Ipan nochi nemouen, noneki nenkitlaliliskej istatl.

¹⁴Tla nennechmakaskej nejua nemoTEKO sen uentli de trigo noso cebada yejuan achtoj otlak ipan nemotlatok, xnechmakakan on yejuan kuajli yochikau imiyauayo, yejuan kemach yenkuixtikaj nenkipapaxoskej niman nenkitliuatsaskej ipan ttitl.

¹⁵Ipan on uentli tiktekilis aceite niman kopajli. On sen uentli de trigo noso cebada. ¹⁶Kemaj on tiopixki, kitlatis achijtsin on uentli yejuan okipapaxojkej, niman kipiya aceite iuan kopajli. In yes sen uentli yejuan kiteititis ika nechmaktiliaj nochi yejuan tlatla para nechtlakaitaj nejua nemoTEKO.

On uentli para yoltlalilistli

3 ¹Tla yakaj nechmakas nejua nemoTEKO sen uentli de yoltlalilistli, uelis nechmakas sen okichuakax noso sen

siuauakax. On yolki xkanaj tlakokojli* yes ipan itlakayo. ²On yejuan kitemakas on uentli, kitlalis ima ipan itsontekon on yolki. Kemaj kechkoyonis nisiu ikalakiyan on tabernáculo* kampa nejua ninemi. Niman kemaj on tiopixkej kajuichiskej ika iyesyo on yolki ipan inajnakastlan on tlaixpan*.

³'Yejuan kuajuikas sen yolki ken uentli para yoltlalilistli noneki nechmakas nejua nemoTEKO on uentli yejuan nochi tlatla. Nechmakas on chauak yejuan onkaj ipan on tlajtlamach* yejuan kipiya ijtik. ⁴No kikuis niman kitemakas on ome irionsitsisuan, ichajka yejuan kentok, niman on ichajka yejuan kipiya ipan ilomos, niman ichajka yejuan onkaj ipan iyeltapach yejuan kixtilis san sekan iuan on irionsitsisuan. ⁵Itelpochuan Aarón kitlatiskej nochi in, ipan on tlaixpan* iuan on yolki yejuan tlatlas ipan on kojtlit* yejuan kauantikaj, pampa in sen uentli yejuan ajuiyak yejuan nechyolpaktia nejua nemoTEKO.

⁶'Tla yakaj nechmakas nejua nemoTEKO sen borrego noso sen chivo ken uentli de yoltlalilistli, noneki nechmakas sen okichtli noso sen siuayolki yejuan xkanaj tlakokojli* ipan itlakayo. ⁷Tla nechmakas sen borreguito nejua nemoTEKO, ⁸kitlalis ima ipan itsontekon on yolki, kemaj kechkoyonis ixpan on tabernáculo* kampa nejua ninemi. Kemaj on tiopixkej kajuichiskej on tlaixpan* ika on yestli ipan nochi ilados.

⁹'Yejuan kitemakas sen yolki para uentli de yoltlalilistli, noneki kimakas toTEKO sen uentli yejuan nochi tlatla, de ichajka, nochi ikuitlapil yejuan kitekilis hasta kampa kipiya itepotskojyo, niman nochi ichajka on ikuetlaxkol, ¹⁰on ome irionsitsisuan, ichajka yejuan kentok, niman on ichajka yejuan kipiya ipan ilomos, niman ichajka iyeltapach yejuan kixtilis san seknek iuan irionsitsisuan. ¹¹Niman kemaj on tiopixki kitlalis nochi in ipan on tlaixpan* ken sen uentli de tlakuajli yejuan nochi tlatla para nechtlakaitaskej nejua nemoTEKO.

¹²'Tla on yolki yejuan kitemaka yejua sen chivo, ijkuak kuikas ixpan toTEKO, ¹³kitlalis ima ipan itsontekon on yolki, niman kemaj kechkoyonis ixpan on tabernáculo* kampa nejua ninemi. Kemaj on tiopixkej kikuiskej iyesyo niman ika kajuichiskej ipan nochi ilados on tlaixpan*.

¹⁴'Yejuan kiuentia sen yolki uelis kikuis niman nechixpantilis ken uentli yejuan nochi tlatla para nechtlakaitas nejua nemoTEKO. Nechixpantilis nochi ichajka yejuan onkaj ipan ikuetlaxkol on yolki, ¹⁵on ome irionsitsisuan, niman ichajka yejuan kentok, niman on ichajka yejuan kipiya ipan ilomos, niman ichajka yejuan onkaj ipan iyeltapach yejuan kixtilis san seknek iuan irionsitsisuan. ¹⁶Kemaj on tiopixki kitlalis nochi ipan on tlaixpan* ken sen uentli de tlakuajli yejuan nochi tlatla.

In ijnekuistis ajuiyak. Nochi on chauak noyaxka* yes nejua nemoTEKO.

¹⁷In sen ley yejuan nochipa onyas para nemochimej* tatajtin niman nemouejkakoneuan san kanon kampa nennemiskej: Maka nenkuaskej yestli, nion chauak.”

On uentli yejuan kixtis tlajtlakojli

4 ¹ToTEKO okijli Moisés: ²“Xkinmijli on israelitas: Tla yakaj tlajtlakoua, maski xkimatiya ika on tlajtlakojli kijtlakoua sen itlanauatil toTEKO, noso itlaj kichiuas tlen xkuajli, ijkin nenkichiuaskej:

³Tla on ueyi tlayekanki tiopixki yejua tlajtlakoua, niman ika on itlajtlakol kintlajtlakolmaka on tlakamej, on ueyi tlayekanki tiopixki nechuentlalilis nejua nemoTEKO sen becerro yejuan xkanaj tlakokojli* ipan itlakayo. In yejua yes sen uentli ipampa tlajtlakojli yejuan okichiu. ⁴Kuikas on becerro itech ikalakiyan on tabernáculo* kampa nejua ninemi. Ompa kitlalis ima ipan itsontekon on yolki para itlajtlakoluan kipanoltis ipan on yolki niman kemaj kechkoyonis nixpan nejua nemoTEKO. ⁵Kemaj on ueyi tlayekanki tiopixki kikuis achijtsin iyesy on becerro, niman kixtis ipan on tabernáculo* kampa nejua ninemi. ⁶Ompa nixpan nejua nemoTEKO, kipatsos imajpil ikan on yestli niman kajuichis chikomepa ixpan on yekcortina yejuan ika tsakutikaj on kampa Más Tlayekkan. ⁷No kitlatlalilis achijtsin yestli ipan on ken itlaj ikuakuakatsitsuan on tlaixpan*, kampa kitlatiaj kopajli nixpan nejua nemoTEKO, yejuan nokaua ijtik on tabernáculo* kampa nejua ninemi. Niman on yestli yejuan nokauas, kitoyauas itsintlan on tlaixpan* kampa kitlatiaj on uentli yejuan nochi tlatla yejuan onkaj ikalakiyan on tabernáculo* kampa nejua ninemi. ⁸Kemaj kixtilis on becerro, yejuan kiuentlaliaj ipampa on tlajtlakojli, nochi chauak yejuan kentok ipan ikuetlaxkol. ⁹No kixtilis on ome irionsitsitsuan, niman ichajka yejuan kentok, niman on ichajka yejuan kipiya ipan ilomos, niman ichajka yejuan onkaj ipan iyeltapach, yejuan kixtilis san sekan iuan on irionsitsitsuan. ¹⁰Kijosneki kichiuas sano ijki ken okichiu ika on becerro yejuan okitemakak para sen uentli de yoltlalilistli. Niman nochi in kitlatis on tiopixki ipan on tlaixpan* ken sen uentli yejuan nochi tlatla. ¹¹Pero ikuetlaxyo* on becerro, niman nochi inakayo, itsontekon, ikxiuan, ikuetlaxkoluan niman ixixalis, ¹²kijosneki, nochi on becerro yejuan nokaua, konkauaskej kampa tlachipajkan, uejka de on campamento kampa nenchantij. Kiktiskej kampa konkauaj on tlikonextli de nochi uentli yejuan kitlatiaj ipan on tlaixpan*. Niman ompa kitlaliskej kojtlia* para kitlatiskej.

13 Tla nochimej on israelitas kichiuaj itlaj xkuajli, maski nion semej xkimatiyaj ika on tlen okichijkej okijtlakojkej se itlanauatil toTEKO, yejua ika nochimej kipiay tlajtlakojli, 14 Ijkuak kimatiskej ika yotlajtlakojkej, noneki kiuentiskej ixpan on tabernáculo* sen becerro para sen uentli ipampa tlajtlakojli. Kuikaskej ixpan on tabernáculo* kampa nejua ninemi, 15 niman on tlayekankej tlakamej yejuan kinyekanaj on israelitas, kitlaliskej inmauan ipan itsontekon on becerro, niman ompa kechkoyoniskej nixpan nejua nemoTEKO. 16 Kemaj on ueyi tlayekanki tiopixki, kikuis achijtsin iyesy on becerro niman kiktis ijtik on tabernáculo* kampa nejua ninemi. 17 Kemaj kipatsos imajpil ipan on yestli niman tlajuichis chikomewa nixpan nejua nemoTEKO imelajkan on yekcortina. 18 Kemaj kitlatlalilis achijtsin yestli on ken itlaj ikuakuautsitsiuan on tlaixpan* yejuan onkaj nixpan nejua nemoTEKO ne ijtik on tabernáculo* kampa nejua ninemi. Niman nochi on yestli yejuan nokauas kitoyauas itsintlan on tlaixpan* kampa kitemakaj uentli yejuan tlatla. On tlaixpan* nokaua nisiu itsakuijlou on tabernáculo. 19 No kixtilis on becerro nochi ichajka, niman kitlatis ipan on tlaixpan*. 20 Ijkon kichiuas on tiopixki ika in becerro ken okichiu ika on achtoj becerro yejuan notemaka ipampa tlajtlakojli. Niman ijki kichiuas on tiopixki para kixtis nochi tlajtlakojli yejuan okichijkej on israelitas, niman nejua nikintlapojpoluis. 21 Kemaj on tiopixki kiktis itlakayo on becerro uejka de on campamento kampa chantij on israelitas. Ompa kitlatis ken okichijkej iuan on achtoj becerro. In yejua nochiuas sen uentli ipampa intlajtlakoluan nochimej on israelitas.

22 Tla sen tlayekanketl kichiuas itlaj xkuajli yejuan kijtlakos itlanauatil toTEKO, maski xkimatiya ika okichiu tlajtlakojli, yejua kipiay tlajtlakojli. 23 Ijkuak yejua kimatis ika otlajtlakoj, ika onkaj kuikas sen chivo para sen uentli yejuan xkanaj tlakokojli* ipan itlakayo. 24 Kitlalis ima ipan itsontekon on chivo, niman kechkoyonis nixpan nejua nemoTEKO kampa kinmiktiaj on yolkej yejuan para uentli yejuan tlatla. In yes sen uentli ipampa tlajtlakojli. 25 Kemaj on tiopixki kikuis ika imajpil achijtsin iyesy on chivo para uentli ipampa tlajtlakojli. Kemaj kitlalilis on tlaixpan* ipan on ken itlaj ikuakuautsitsiuan kampa kitlatiaj on uentli. Niman nochi on yestli yejuan nokauas kitoyauas itsintlan on tlaixpan*. 26 Niman nochi ichajka on chivo noneki kitlatiskej ipan on tlaixpan* ijkon ken nochua ika ichajka on uentli de yoltlalilistli. Niman ika on tlen kichiuas on tiopixki, on tlayekanketl kitlapojpoluiskej itlajtlakol.

27 Tla yakaj yejuan xtiopixki kichua sen tlajtlakojli, maski xkimatiya tla tlajtlakojli, niman kichiuas itlaj yejuan nejua nemoTEKO niknauatia maka ma kichua, yejua kipiay tlajtlakojli.

²⁸Ijkuak yejua kimatis ika okichiu on tlajtlakojli, noneki kitemakas sen chiva yejuan xkanaj tlakokojli* ipan itlakayo. Ijki nochuias sen uentli ipampa on tlajtlakojli yejuan okichiu.

²⁹Kitlalis ima ipan itsontekon on yolki yejuan nochuias sen uentli ipampa tlajtlakojli. Kemaj kechkoyonis kampa kinmiktiaj on yolkej para uentli yejuan nochi tlatla. ³⁰Niman on tiopixki, kikuis ika imajpil achijtsin iyeyso on yolki niman kitlatlalilis ipan on ken itlaj ikuakuautsitsuan on tlaixpan* kampa kitlatiaj on uentli. Niman on yestli yejuan nokauas, kitoyauas itsintlan on tlaixpan*.

³¹'No ijki, noneki kixtilis nochi ichajka on yolki, sa no ijki kichuias ken kichiuaj ika on uentli de yoltlalilistli. Kemaj on tiopixki kitlalis on chauak ipan on tlaixpan*. Ijki nochuias sen uentli yejuan ajuiyak niman nechyolpaktis nejua nemoTEKO. Niman ika on tlen kichuias on tiopixki, on tlakatl kitlapojpoluiliskej itlajtlakol.

³²'Tla on tlakatl kuajuikas sen borreguito para sen uentli ipampa tlajtlakojli, kuajuikas sen borreguita yejuan xkanaj tlakokojli* ipan itlakayo. ³³Kitlalis ima ipan itsontekon on yolki yejuan nochuias sen uentli ipampa on itlajtlakol. Kemaj kechkoyonis kampa kinmiktiaj on yolkej para uentli yejuan nochi tlatla. ³⁴Kemaj on tiopixki, kikuis ika imajpil achijtsin iyeyso on yolki para sen uentli ipampa tlajtlakojli, niman kitlatlalilis ipan on ken itlaj ikuakuautsitsuan on tlaixpan* kampa kitlatiaj on uentli. Niman on yestli yejuan nokauas, kitoyauas itsintlan on tlaixpan*. ³⁵Kemaj kixtilis nochi ichajka on borreguita no ijki ken kichiuiliaj on borreguito yejuan kikuentaliaj para yoltlalilistli. Kemaj on tiopixki kitlalis on chauak ipan on tlaixpan* para itlakaitalis toTEKO. Niman ika on tlen kichuias on tiopixki, on tlakatl kitlapojpoluiliskej itlajtlakol.

On uentli yejuan noneki para tlajtlakojli

5 ¹'Tla yakaj kitestigojtlaliaj para ma kijto on tlen okitak, noso okak tlen onochiu niman xkineki kijtos, tla ijkon, yejua kipiayas tlajtlakojli, niman ika onkaj kitlaxtlauas.

²'Tla yakaj kimatoka itlaj yejuan xchipauak nixpan, kenon itlaj yolki yejuan yomik, uelis tepeyolki noso kalpanyolki, noso yejuan noteuilana niman xchipauak ixpan Dios, on tlakatl xok chipauak yes nixpan, niman kipiayas tlajtlakojli maski xkimatiya tla otlajtlakoj.

³'Tla yakaj kimatoka san tlinon yejuan kisa ipan itlalnakayo sen tlakatl yejuan xchipauak nixpan, kipiayas tlajtlakojli maski xkimatiya tla otlajtlakoj.

⁴'Tla yakaj notlajtolmaka ika itokatsin Dios, ika kichuias itlaj kuajli noso xkuajli, niman xachtoj kuajli kinemilia, ijkuak kimatis ika xkuajli okichiu, kipiayas tlajtlakojli.

⁵’Ijkuak yakaj panesis ika okichiu se de in tlajtlakoltin, noneki noyolkuitis ipampa on tlen okichiu, ⁶niman nechajuikilis nejua nemoTEKO sen borreguita noso sen chivita yejuan kixtis itech iyolkauan. Kemaj kitemakas ken se uentli ipampa tlajtlakojli. Niman ikan in uentli, on tiopixki uelis kichiuas para on tlakatl ma kitlapojpoluilikan itlajtlakol.

⁷’Pero tla xkajxilia itomin para kouas sen borreguito, tla ijkon, uelis nechmakas nejua nemoTEKO ome kokotetsitsimej noso ome pichontsitsimej para uentli ipampa on tlajtlakojli yejuan okichiu. Se kitemakas para uentli ipampa on tlajtlakojli, niman okse kitemakas para sen uentli yejuan nochi tlatla. ⁸Noneki kinuikilis on tiopixki, niman yejua kiuentlalis on achtój tototsintli para sen uentli ipampa on tlajtlakojli. Kemaj kechmatilos pero xkotonilis itsontekon. ⁹Kemaj kajuichis inakastlan on tlaixpan* ika achijtsin yestli yejuan kisa itech on uentli ipampa tlajtlakojli. Niman on yestli yejuan nokauas kipatskas itsintlan on tlaixpan* pampa in sen uentli ipampa on tlajtlakojli. ¹⁰Niman on ika ome tototsintli, kiuentlalis para sen uentli yejuan tlatlas ijkon ken ye tlajkuilolnestikaj. Niman ika on tlen kichiuas on tiopixki, on tlakatl kitlapojpoluiliskej itlajtlakol. Ijki tej, kitlapojpoluiliskej itlajtlakol.

¹¹’Tla xkipiya tomin nion para kouas ome kokotetsitsimej noso ome pichontsitsimej, noneki kuajkis ome kilo de harina yejuan más kuajli, para sen uentli ipampa tlajtlakojli. Pero maka kitlalilis aceite nion kopajli, pampa in sen uentli ipampa on tlajtlakojli. ¹²Noneki kiktilis on tiopixki, niman yejua kikuis se mapichtli on harina niman kitlatis ipan on tlaixpan* iuan on okseki uentli yejuan kitlatiaj para nechmakaskej tlakaitalistli nejua nemoTEKO. In se mapichtli harina kijtosneki nochi kiuentlalia on harina. In yes sen uentli ipampa tlajtlakojli. ¹³Ika on tlen kichiuas on tiopixki, on tlakatl kitlapojpoluiliskej san katlejua itlajtlakol yejuan okichijka. Ijki tej, itlajtlakol kitlapojpoluiliskej. Niman on yejuan nokauas on uentli de harina, yes para imintlakual on tiopixkej, ijkon ken intech nokaua nochi on uentli yejuan de harina.”

On uentli para notlaxtlauas on tlajtlakojli de culpa

¹⁴ToTEKO okijli Moisés: ¹⁵“Tla yakaj otlajtlakoj pampa xonechajxitilij on uentli yejuan noneki nikselsis nejua nemoTEKO, maski xkimatiya ika xkuajli tlen okichiu, noneki kixtis itech iborregos sen borrego yejuan xkanaj tlakokojli* ipan itlakayo. Yejua kitlaxtlauas kech ika patioj yeskia sen borrego ikan tomin de plata, ijkon kech kitlajtlanij ipan on tabernáculo. Yejua in tlaxtlauijli kichiuas ipampa itlajtlakol de culpa. ¹⁶On tlakatl ika

onkaj kajxitis on tlen xokajxitijka de on uentli. Niman no kimakas on tiopixki okse 20 por ciento más. Kemaj ika on tomin iuan on borrego yejuan kiuentlalia ipampa on tlajtlakojli de culpa, on tiopixki kichiuas para on tlakatl ma kitlapojpoluilikan itlajtlakol. Ijki tej, itlajtlakol kitlapojpoluiliskej.

¹⁷Tla yakaj tlajtlakoua, maski xkinmatiya ika on tlajtlakojli kijtlakoua se itlanauatil toTEKO, ika onkaj kitlaxtlauas ¹⁸Yejua kixtis itech iborregos, sen borrego yejuan xkanaj tlakokojli* ipan itlakayo para sen uentli ipampa itlajtlakol de culpa, niman tejua Moisés, tikijtos kech yes on borrego. Kemaj on tlakatl kuikas itech on tiopixki, niman yejua kiuentlalis ipampa itlajtlakol de culpa, para ijki on tlakatl kitlapojpoluiliskej on tlen xkuajli okichiu, yejuan okichiu maski xkimatiya. Ijki tej, kitlapojpoluiliskej on tlen xkuajli okichiu. ¹⁹Yejua in tlaxtlauijli kichiuas ipampa itlajtlakol de culpa pampa on tlakatl otlajtlakoj ika on tlen xkuajli okichiu nixpan nejua nemoTEKO.”

Uentli para on tlachtekilistin niman tlaixpachouilistin

6 ¹ToTEKO okijli Moisés: ²“Ijkuak yakaj tlajtlakos nixpan nejua nemoTEKO, ikan tlachtekilistli, pampa kitlaixpachouilia on yejuan iuan tekiti, noso kichtekilia itomin yejuan okimakaka para ma kejeuili, noso tla tekuijkuilia itlaj para tetlachtekilia, ³noso tla xkinekis kijtos ika okinopejpenij itlaj yejuan yakaj okipoloj, noso kichiuas sen tlajtolmakalistli ixpan Dios niman xkichiuas, noso san katlejua kenin tlajtlakoltin, ⁴on tlakatl kipiayas tlajtlakojli yejua ika on. Tla ijkon, ika onkaj kuepas on tlen okichtek, noso san okitekuilij, noso okixpachuilij on yejuan iuan tekiti, noso on yejuan okinopejpenij. ⁵Ika onkaj kuepas san tlinon yejuan ika onotlajtolmakaka ika itokatsin Dios niman xokichiu. Kikuepilis nochi iteko, niman no kimakas iteko okse 20 por ciento ichkich ipan sa no on tonajli ijkuak kitemakas on uentli ipampa itlajtlakol de culpa. ⁶Kuajuikilis sen borrego on tiopixki para uentli notech nejua nemoTEKO. On borrego kixtis itech iyolkauan, niman yejuan xkanaj tlakokojli* ipan itlakayo. Ijkon kichiuas para kiuentis ipampa itlajtlakol de culpa. Niman tejua, Moisés, tikijtos kech yes on borrego. ⁷Niman ika on tlen kichiuas on tiopixki, nejua nemoTEKO niktlapojpoluilis on tlakatl san tlinon yejuan xkuajli okichiu. Ijki tej, kitlapojpoluiliskej.”

Kenijki notemakas on uentli yejuan nochi tlatla

⁸ToTEKO okijli Moisés: ⁹“Xkijli Aarón niman itelpochuan in tlanauatiltin para kenijki kichiuaskej on uentli yejuan noneki tlatlas. On yolki yejuan kiuentiaj, noneki onyas nochi yejuajli ipan on tlixochtili yejuan onkaj tlaixpan* para nochi tlatla.

¹⁰Niman on tiopixki notlakentis. Kitlalis itlaken niman itsintlaken de lino. Kemaj kixtis itlikonexyo on yolki yejuan okitlatijkej niman kitlalis inakastlan on tlaixpan*. ¹¹Kemaj notlapatilis niman kiktis on tlikonextli kampa tlachipajkan, ikiaauak on campamento. ¹²“Nochipa tlikuitias on tlitl yejuan onkaj ipan on tlaixpan*. Niman mojmotla kualkan on tiopixki kitlalis kojtlit* ipan on tlaixpan* niman ipan on tlitl kitlalis on yolki para on uentli tlatlas. No ijki, ompa kitlatis on chauak de on uentli para yoltlalilistli. ¹³On tlitl yejuan onkaj ipan on tlaixpan*, maka kaman kauiliskej seuis, yej nochipa ma tlikuitia.

Kenijki notemakas uentli de trigo noso cebada

¹⁴In yejua tlanauatiltin para on uentin de trigo niman cebada. On tiopixkej noneki kiuentlaliskej nixpan nejua nemoTEKO ne ixpan ika on notlaixpan*. ¹⁵Semej yejuamej kikuis se mapichtli harina yejuan kisa itech on trigo noso cebada, yejuan kiuentlalis iuan aceite niman nochi on kopajli yejuan iuan notemaka on uentli de harina. Niman kitlatis ipan on tlaixpan* ken sen uentli yejuan nochi tlatla, niman yejuan ajuiyak nixpan nejua nemoTEKO. In se mapichtli harina kijtosneki nochi kiuentlalia on harina. ¹⁶Niman on harina yejuan nokauas de on uentli, kikuaskej Aarón niman itelpochuan, pero maka kitlaliliskej tloxokolilistli*. Kikuaskej kampa tlayekkan ipan ikiaauak on tabernáculo* kampa nejua ninemi. ¹⁷Maka kixxitiskej ikan tloxokolilistli*. In harina nikinmaka, ken yejuamej kintocaroua kiseliskej de on uentli yejuan seki tlatla. In uentli nochiuas sanoyej tlatiochijtlitli ken on uentli ipampa on tlajtlakojli, niman ken on uentli ipampa on tlajtlakojli de culpa. ¹⁸Aarón iuan nochimej iuejkakoneuan yejuan tlakamej, nochipa uelis kikuaskej se parte de on uentli yejuan seki kitlatiaj, on yejuan kimakaj toTEKO. Pero san tlinon noso san akinon yejuan xtiopixki, tla kitelos on uentli tlajyouis pampa on uentli sanoyej tlatiochijtlitli.”

Uentli yejuan kitemakaskej on tiopixkej

¹⁹ToTEKO no okijli Moisés: ²⁰“In yejua uentli yejuan Aarón iuan ikoneuan, niman iuejkakoneuan nechajkuiliskej nejua nemoTEKO ipan on tonajli ijkuak kinteyaxkatiskej para notiopixkauan yeskej. Kuentlaliskej ome kilo harina yejuan más kuajli ken se uentli yejuan kisa itech trigo noso cebada. Ijkuak kualkan kuentlaliskej tlajkotipan niman okse tlajkotipan ijkuak tlapoyajkan. Ijkin kichiuaskej mojmotla. Nion se tonajli xkikauaskej. ²¹On uentli kixxitiskej ipan sen komajli, niman kuajli tlanelajli yes iuan aceite. Kemaj ijkuak yoiksik, kuajkiskej tlatejtektli on uentli para ijnekuistis ajuiyak nixpan nejua nemoTEKO. ²²Niman

cada iuejkakoneu* Aarón ijkon kichijchius on uentli ijkuak kalakis ipan on tekittl de ueyi tlayekanki tiopixki. Noneki nochi kitlatiskej ken se uentli para nejua nemoTEKO. ²³Nochi uentli yejuan kuajkiskej on tiopixkej ika onkan nochi tlatlas. Xakaj uelis kikuas.”

Kenijki notemakas uentli ipampa tlajtlakojli

²⁴ToTEKO okijli Moisés: ²⁵“Xkimijli Aarón niman itelpochuan in tlanauatiltin para on uentli ipampa on tlajtlakojli. On yolki yejuan nenkitemakaskej ken uentli ipampa on tlajtlakojli noneki nenkechkoyoniskej nixpan nejua nemoTEKO, ne kampa kinmiktiaj on yolkej yejuan kintlatiaj. In uentli sanoyej tlatiochijlti. ²⁶On tiopixki yejuan kitemakas on uentli ipampa tlajtlakojli uelis kikuas. Pero noneki kikuas kampa tlayekkan, ompa ipan ikiauak on tabernáculo* kampa nejua ninemi. ²⁷San tlinon noso san akinon yejuan xtiopixki tla kitelos inakayo on yolki tlajyouis pampa on nakatl tlatiochijlti. Niman tla itlaken ipan otsijtsikuin iyesy on yolki, noneki kipakaskej kampa tlayekkan. ²⁸On kontli yejuan tlachijchijlti ika tlajli yejuan ika oiksik on nakatl noneki kitlapanaskej. Pero tla on nakatl oiksik ipan on teposkontli de bronce, noneki kipajpakaskej ikan atl niman kitejchikiskej kuajli.

²⁹On uentli yejuan notemaka ipampa tlajtlakojli, san uelis kikuaskej on tiopixkej pampa in sen uentli yejuan sanoyej yektli. ³⁰Pero on tiopixkej xuelis kikuaskej inakayo on yolki yejuan kuentlaliaj ken sen uentli ipampa on tlajtlakojli, tla kiktiskej iyesy ipan on tabernáculo* kampa nejua ninemi para kitlapojpoluiskej on tlajtlakojli ipan on tlayekkan. On kenon uentli noneki kitlatiskej.

Okseki tlanauatiltin ika on uentli para notlaxtlauas on tlajtlakojli de culpa

7 ¹On uentli ipampa on tlajtlakojli de culpa sanoyej yektli. Yejua ika, noneki ijkin nenkichiusaskej. ²On yolki yejuan kiuentskej ipampa on tlajtlakojli de culpa, noneki kechkoyoniskej ne kampa kinmiktiaj on yolkej yejuan para on uentli. Niman ika iyesy on yolki kajuichiskej ipan nochi ilados on tlaixpan*. ³Kiuentskej nochi ichajka on yolki yejuan kipiya ipan ikuitlapil niman yejuan pepechijtikaj ipan on tlajtlamach* yejuan kipiya ijtik on yolki, ⁴on ichajka yejuan kentok iriontsitsiuan niman ichajka yejuan kipiya ipan ilomos, niman ichajka yejuan onkaj ipan iyeltapach kixtiliskej san sekan iuan on iriontsitsiuan. ⁵Kemaj on tiopixki kitlatis nochi ipan on tlaixpan*, ken uentli yejuan nochi tlatla para nechmakaskej tlakaitalistli nejua

nemoTEKO. Yejua in uentli kichiuas ipampa on tlajtlakojli de culpa. ⁶Nochimej on tiopixkej uelis kikuaskej on nakatl de on uentli, pero noneki kikuaskej kampa tlayekkan pampa in sen uentli sanoyej tlatiochijtli.

⁷San sen tlanauatijli onkaj para on nakatl yejuan nokaua de on uentli ipampa on tlajtlakojli de culpa, niman no para on uentli ipampa on tlajtlakojli. On nakatl inyaxka on tiopixkej yejuan kiuentlaliaj on uentli para kintlapojpoluis on tlakamej. Yejuamej uelis kikuaskej. ⁸No ijki, on tiopixki uelis itech nokauas ikuetlaxyo* on yolki yejuan kitemakas on yolki ken sen uentli yejuan tlatla. ⁹Niman no ijki nochi on uentli de trigo noso cebada yejuan tlaixxitijli ipan horno, noso ipan tlaltekomatl, noso ipan komajli, iyaxka* yes on tiopixki yejuan tlauentlalis. ¹⁰No ijki, nochi on uentli de trigo noso cebada yejuan tlanelojli iuan aceite noso xiuan aceite, inyaxka yes nochimej itelpochuan Aarón. Nochimej ijichkich kiminmakaskej.

Ken ijki notemakas on uentli yejuan para yoltlalilistli

¹¹In yejua tlanauatijli ken nenkichiuaskej on uentli para yoltlalilistli yejuan yakaj nechmakas nejua nemoTEKO. ¹²Tla on uentli notemaka para tlajsojkamachilistli, no kitemakas pan yejuan kipiya aceite, pero xkipiyas tlaxokolilistli*. Niman kitemakas pan yejuan kajkanauak yejuan xkipiya tlaxokolilistli* peroajuichyoj yes ikan aceite. No ijki, noneki kitemakas pan de memelatsitsimej yejuan tlachijchitli ikan harina yejuan más kuajli yejuan kimaxakualos iuan aceite. ¹³Niman san sekan on uentli de yoltlalilistli yejuan nouentlaliaj ipampa tlajsojkamachilistli, kiuentlaliskej pan de memelatsitsimej yejuan kipiya tlaxokolilistli*. ¹⁴Cada se de on uentli yejuan notemaka, on tiopixki kikuas achijtsin, niman nechixpantilis nejua nemoTEKO ken ika nechtlaxtlauliskiaj. On uentli iyaxka* yes on tiopixki yejuan kajuichis on tlaixpan* ika yestli de on uentli yejuan de yoltlalilistli.

¹⁵Inakayo on yolki yejuan okiuentlaliykej ken uentli de tlajsojkamachilistli niman yoltlalilistli, ika onkaj kikuaskej sano ipan on tonajli ijkuak kiuentlaliaj. Xitlaj uelis nokauas para uajmostla.

¹⁶Tla saman yakaj kuajuikas sen yolki para uentli pampa okitlalij sen tlajtolmakalistli, noso uentli san ika ipakilis, ika onka kikuaskej sano ipan on tonajli ijkuak kiuentlaliaj, pero yejuan nokauas uelis kikuaskej uajmostla. ¹⁷Tla ipan yeyi tonajli sanken* onkaj on nakatl, noneki kitlatiskej nochi. ¹⁸Niman tla yakaj kikuas ipan yeyi tonajli on nakatl yejuan kisas de sen uentli para yoltlalilistli, xnikselilis iuen, niman on nakatl tetlajyeloj*

yes para nejua. On tlakatl yejuan okikuaj on nakatl, kipiayas tlajtlakojli.

¹⁹“Tla itlaj yejuan xchipauak ixpan toTEKO kitelos on nakatl, tla ijkon, xok yakaj uelis kikuas. Noneki kitlatiskej nochi.

“Nochimej yejuan chipajkej nixpan nejua nemoTEKO, uelis kikuaskej on nakatl.

²⁰“Pero tla yakaj yejuan xchipauak nixpan nejua nemoTEKO kikuas inakayo on yolki yejuan para yoltlalilistli yejuan noyaxka* nejua nemoTEKO, xkixtikan nemotsajlan.

²¹“Tla yakaj kimatokas on tlen xchipauak yejuan kisa ipan itlalnakayo sen tlakatl, noso kisa itech sen yolki yejuan xchipauak, noso san tlinon yejuan sanoyej tetlajyeloy*, niman kemaj kikuas nakatl de on uentli para on yoltlalilistli yejuan noyaxka* nejua nemoTEKO, xkixtikan nemotsajlan.”

Xkuajli kikuaskej yestli nion chauak

²²ToTEKO okijlij Moisés: ²³“Xkimijli on israelitas in tlanauatiltin: Xakaj uelis kikuas nion achijtsin ichajka uakax, noso de borrego noso de chivo. ²⁴Iminchajka on yolkej yejuan san inselti mikij noso yejuan kinmiktia itlaj tepeyolki tekuaní, uelis nenkitekitiltiskej itlaj okse ika, pero maka nenkikuaskej.

²⁵“San akinon yejuan kikuas ichajka sen yolki yejuan nechmakaj nejua nemoTEKO para sen uentli yejuan nochi tlatla, xkixtikan nemotsajlan.

²⁶“San kanon kampa nemochantiskej, maka kaman nenkuaskej iyesy on totomej nion de oksekimej sesentlamantikej yolkej.

²⁷Tla yakaj kikua yestli, xkixtikan nemotsajlan.”

On tlen noneki kikuaskej on tiopixkej

²⁸ToTEKO okijli Moisés: ²⁹“Xkinmijli on israelitas in tlanauatiltin: ‘Ijkuak yakaj kinakis nechmakas nejua nemoTEKO, sen uentli de yoltlalilistli, noneki sano yejua kuajkis nixpan nejua nemoTEKO. ³⁰Sano ika yejua imauan kuakis nixpan nejua nemoTEKO, on uentli yejuan tlatlas. On ielpanakayo iuan ichajka nixpan koolinis para sen uentli yejuan tlaoolinjili. ³¹On tiopixki kitlatis on chauak ipan on tlaixpan*, pero iyelpannakayo on yolki inyaxka yes Aarón niman itelpochuan.

³²Inyekmametskojyouan on yolkej yejuan kinuentiskej para yoltlalilistli, kimakaskej on tiopixki ken itlaxtlauil. ³³Yejua on iyekmametskojyo iyaxka* yes on tiopixki yejuan kiuentlalis iyesy niman ichajka on yolki para yoltlalilistli. ³⁴Itech on uentli de yoltlalilistli yejuan nechmakaj on israelitas para sen uentli yejuan ikatlakajtli yoniknotilanilij on iyelpannakayo yejuan kooliniaj niman imetskojyo. Yejua on yonikinyaxkatij ken tlaixtlauijli para Aarón iuan itelpochuan. Para nochipa iminuejkekoneuan kiseliskej ken intlaxtlauil.”

³⁵On tonajli ijkuak Aarón, niman itelpochuan onochijkej notiopixkauan, onikinmaxkatij on parte de nochi uentli yejuan seki tlatla niman yejuan nechmakaj nejua nemoTEKO para nechtlakaitaj. ³⁶Nejua nemoTEKO onitlanauatij para on israelitas ma kinmakakan on tiopixkej on partes yejuan kintokaroua kiseliskej ijkuak onikintiochiu para onochijkej notiopixkauan. Nochi onokau ken tlanauatijli yejuan nochipa onyas para nochimej tatajtin niman iminuejkekoneuan.

³⁷In yejua tlanauatiltin para kenijki kitemakaskej ken in uentin: nochi uentli yejuan tlatlas, on uentli de trigo noso cebada, on uentli ipampa tlajtlakojli, on uentli ipampa on tlajtlakojli de culpa, on uentli para kinteyaxkatiaj on tlakamej para itiopixkauan Dios, niman on uentli de yoltlalilistli. ³⁸ToTEKO okimakak Moisés in tlanauatiltin ipan on tepetl Siná ijkuak on israelitas sanken* nemiyaj ipan on xalpatlajkan. Ompa toTEKO okinmijlij para ma kimakakan iminuen.

Moisés okinmakak tekiuajyotl Aaron niman itelpochuan ken tiopixkej

(Ex 29.1-37)

8 ¹ToTEKO okijlij Moisés: ²“Aman xkinuika Aarón niman itelpochuan hasta kampa ikalakiyan on tabernáculo. Niman xkikti intlaken on tiopixkej, niman on aceite yejua ika tikintiochuias, on becerro yejuan nouentilis ken se uentli ipampa tlajtlakojli, on ome borrego, niman on chikiutli ikan pan yejuan xkipiya tlaxokolilistli*. ³Niman xkinsentlali nochimej on israelitas kampa ikalakiyan on tabernáculo* kampa nejua ninemi.”

⁴Moisés okichiu nochi ken toTEKO okinauatij, niman nochimej on israelitas onosentlalijkej ipan ikalakiyan on tabernáculo* kampa nemi Dios. ⁵Kemaj Moisés okinmijlij nochimej on israelitas: “In yejua on tlen toTEKO otlanauatij ma nochia.”

⁶Kemaj Moisés okonminnots Aarón iuan itelpochuan niman okimpajpak ika atl. ⁷Kemaj Moisés okitlakentij Aarón ikan itlaken yejuan más ueyak yejuan kipiya ikpanepanojli, sen xijlanilpikatli, itlaken yejuan ueyak, niman itlakempani yejuan xkipiya imatlaken. Kemaj okitlajkosaloj kuajli ika ixijlanilpika. ⁸Kemaj Moisés okitlaliltij on iyelpampejpech yejuan kipiya ibolsa, niman ompa ipan iyelpampejpech okitlalilij on Urim niman on Tumim. ⁹Kemaj okitlalilij ikuatlaken ipan itsontekon. Niman ipan on ikuatlaken kampa ixkuatipan, okitlalilij on yekplaca tlachijchijtlitli ika oro. On yekplaca yejua kiteititia ika Aarón onochiu sen tiopixki. Moisés nochi okichiu ken toTEKO okinauatij.

¹⁰Kemaj Moisés okuik on aceite yejuan tlatiochijtlitli, niman okajuichi on tabernáculo, niman nochi on tlajtlamach* yejuan

onkaj ijtik on tabernáculo. Ijkon okintiochiu. ¹¹Niman sa no ika on aceite okajuichij chikomepa on tlaixpan* kampa kitlatiaj on uentli, nochi on tlen notekitiltia ipan on tabernáculo, niman on ueyi teposajpastli iuan itsinkaxyo. Ijkon okichiu para okintiochiu.

¹²Kemaj Moisés okitekak on seki aceite ipan itsontekon Aarón, para okimakak tekiauajyotl ken tiopixki. ¹³Kemaj Moisés okichiu ma uajlakan itelpochuan Aarón, niman okintlakentij ika on tlakentin yejuan más ueueyakej yejuan kipiya ikpanepanojli. Okintlalilij iminilpika, niman no okintlaliltij iminkuatojton. Nochi okichiu ijkon ken toTEKO okinauatij.

¹⁴Kemaj Moisés otlanauatij ma kuikilikan on becerro para on uentli ipampa tlajtlakojli, niman Aarón iuan itelpochuan okitlalijkej inmauan ipan itsontekon on becerro. ¹⁵Kemaj Moisés okechkoyonij on becerro, niman ikan imajpilian okikuik achijtsin yestli, niman okalauilij ipan on ken itlaj ikuakuautsitsuan yejuan onkaj ipan iesquinas on tlaixpan* para okitiochiu. Niman no okajuichi on tlaixpan* para okiyektlalij. Niman on yestli yejuan onokau, okitoyau itsintlan on tlaixpan*. Ijki onokau chipauak niman tlatiochijtli ipan Dios.

¹⁶Kemaj okikuik on chauak yejuan pepechijtikaj ipan on tlajtlamach* yejuan kipiya ijtik on yolki, on chauak yejuan onkaj ipan iyeltapach, niman on ome irionsitsitsuan iuan ichajka, niman nochi okitlatij ipan on tlaixpan*. ¹⁷Pero inakayo on becerro niman ikuetlaxyo*, niman ikuetlaxkol iuan ixixalisyo, okintlatito ikiauak on campamento. Ijkon tej, Moisés okichiu nochi ken okinauatij toTEKO.

¹⁸Kemaj Moisés otlanauatij ma kuajuikakan se de on ome borrego para on uentli yejuan nochi tlatla. Niman Aarón iuan itelpochuan okitlalijkej inmauan ipan itsontekon on borrego. ¹⁹Kemaj Moisés okechkoyonij niman ikan on iyesyoy okajuichi ipan nochi ilados on tlaixpan*. ²⁰Kemaj okitejtej on borrego niman on nakatl iuan itsontekon niman ichajka okitlatij. ²¹Kemaj okipajpak ikan atl on tlajtlamach* yejuan kipiya ijtik on borrego niman imetskojyouan. Niman kemaj okitlatij nochi ipan on tlaixpan* para sen uentli yejuan nochi tlatla. In sen uentli yejuan kajuiyakajnekuis toTEKO. Ijkon tej, Moisés okichiu nochi ken okinauatij toTEKO.

²²Kemaj Moisés otlanauatij ma kuajuikilikan on okse borrego yejuan kiuentlalis para okinmakak Aarón niman itelpochuan tekiauajyotl ken tiopixkej. Niman yejuamej okitlalijkej inmauan ipan itsontekon on borrego. ²³Kemaj Moisés okechkoyonij on borrego, niman okikuik achijtsin iyesyoy niman okitlalilij tlatsintlan ipan iyekmanakas Aarón. Niman no okitlalilij ipan iyektomajkamajpil, niman ipan iyektomajkaixpil. ²⁴Kemaj

Moisés okinmijli itelpochuan Aarón ma uajnonisiuikan, niman no okintlalilij on yestli tlatsintlan de inyekmanakasuan, niman ipan iminyektomajkamajpiluan, niman iminyektomajkaikxpiluan. Niman on yestli yejuan onokau, okitotoyau ipan inajnakastlan on tlaixpan*.

²⁵Kemaj Moisés okikuik on chauak, niman ikuitlapil on borrego, nochi ichajka yejuan kipiya ipan on tlajtlamach* yejuan kipiya ijtik on yolki, nochi on chauak yejuan onkaj ipan iyeltapach, on ome irionsitsiuan iuan ichajka niman iyekmametskojyo. ²⁶Ipan on chikiutli kampa onkatka pan yejuan xkipiya tlaxokolilistli*, on yejuan kitlaliaj ixpan toTEKO, Moisés okixtij sen pan ken memelatsin yejuan xkipiya tlaxokolilistli*, niman sen pan yejuan tlanelojli iuan aceite, niman sen pan yejuan kanauak, niman okintlalij iuan on chauak, niman iyekmametskojyo on borrego.

²⁷Kemaj nochi in okitlalij ipan imauan Aarón niman itelpochuan para yejuamej ma koolinikan ixpan toTEKO para sen uentli yejuan tlaoolinjili. ²⁸Niman kemaj Moisés okiselij on uentli niman okitlatij ipan on tlaixpan* iuan on uentli yejuan nochi tlatla ken uentli yejuan kinmaka tekiuajyotl para tiopixkej yeskej. In sen uentli tlatlak yejuan ajuiyak niman kiyolpaktia toTEKO.

²⁹Niman kemaj Moisés okikuik iyelpannakayo on borrego, niman okoolinij ixpan toTEKO para sen uentli yejuan tlaoolinjili. On uentli yejua kinmaka tekiuajyotl para tiopixkej yeskej. In uentli yejua onokau itech Moisés. Ijkon Moisés okichiu nochi ken okinauatij toTEKO.

³⁰Kemaj Moisés okikuik achijtsin aceite yejuan tlatiochijtl niman achijtsin yestli yejuan onkatka ipan on tlaixpan*, niman okinmajuichij Aarón, itelpochuan niman ipan intiopixkatlakeuan. Ijkon okichiu para okinmakak Aarón niman itelpochuan tekiuajyotl para tiopixkej, niman okintiochiu intiopixkatlakeuan.

³¹Kemaj Moisés okinmijli Aarón niman itelpochuan: “Xkikxitikan on nakatl ne ikalakiyan on tabernáculo* kampa nemi Dios. Niman ompa xkuakan iuan on pan yejuan tlatiochijtl yejuan onkaj ipan on chikiutli. Xchiuakan ken toTEKO onechnauatij ijkuak okijtoj: ‘Aarón niman itelpochuan ma kikuakan in nakatl.’” ³²Niman on nakatl iuan on pan yejuan nokauas, xtlatikan. ³³Niman chikome tonajli, maka nenmejkuaniskej ne kampa ikalakiyan on tabernáculo* kampa nemi Dios, pampa ichkich noneki on tonaltin para toTEKO mehmakas tekiuajyotl para nentiopixkej yeskej.

³⁴ToTEKO otlanauatij ijin ma nochiua ken aman yonochiu, para mechtlapojpoluilis nemotlajtlakoluan. ³⁵Yejua ika, tej, nemejuamej nemokauaskej chikome tonajli, ikan tonajli niman ikan yeuajli, ne kampa ikalakiyan on tabernáculo* kampa nemi

Dios. Xchiuakan tlinon yokijtoj toTEKO, niman ijki xnenmikiskej, pampa ijki yonechnauatij.”

³⁶Niman Aarón iuan itelpochuan okichijkej nochi on tlen toTEKO okinnauatij itechkopa Moisés.

On tiopixkej okipeualtijkej imintekiu

9 ¹Ipan chikueyi tonajli, Moisés okinots Aarón niman itelpochuan inmiuan on tlakamej uejueyixtokej intech on israelitas. ²Niman okijlij Aarón: “Xkuika sen becerro para uentli ipampa tlajtlakojli, niman sen borrego para on uentli yejuan nochi tlatla. In omemej yolkej yejuan xkanaj tlakokoltin ipan intlakayo, xkinuika ixpan toTEKO. ³On israelitas xkinmijli ma kuikakan sen chivo para kiuentiskej ipampa tlajtlakojli. No ijki, ma kuikakan sen becerro niman sen borreguito yejuan se xijkayomej, niman yejuan xkanaj tlakokoltin impan intlakayo. In yolkej yeskej para on uentli yejuan nochi tlatla. ⁴Niman no ma kuikakan sen okichuakax niman sen borrego para kinmiktiskej ixpan toTEKO para sen uentli de yotlallalistli. No ijki, ma kuajkikan sen uentli de trigo noso cebada yejuan tlanelajli iuan aceite, pampa aman toTEKO mechajnotitis.”

⁵On israelitas okiktikej on tlen Moisés okinnauatij ixpan on tabernáculo* kampa nemi Dios. Niman nochimej on israelitas ononisiuijkej niman ijkayaj ixpan toTEKO. ⁶Kemaj Moisés okinmijlij: “In yejua on tlen toTEKO yotlanauatij. Xchiuakan, niman toTEKO mechajnotitis ika sanoyej kualtsin iueyilis”.

⁷Kemaj Moisés okijli Aarón: “Xmonisiui ne tlaixpan*, niman xmaktli toTEKO on uentli ipampa tlajtlakojli, niman on yolki yejuan tiktemakas ken uentli yejuan nochi tlatla niman yejuan ika mitstlapojpoluiliskej motlajtlakoluan niman imintlajtlakoluan mofamilias^b. Niman no xtlali iminuen on israelitas ken sen uentli para kintlapojpoluilia intlajtlakol ijkon ken toTEKO otlanauatij.”

⁸Aarón okinisiuij on tlaixpan* niman okechkoyonij on becerro yejuan okiuentlalij para sen uentli ipampa itlajtlakoluan. ⁹Kemaj itelpochuan okimakakej on yestli. Niman Aarón okipatsoj imajpiluan ipan on yestli niman okinmalauilij ipan on ken itlaj ikuakuautsitsiuan on tlaixpan*. Niman on yestli yejuan onokau, okitotoyau itsintlan on tlaixpan*. ¹⁰Kemaj okitlatij ipan on tlaixpan* on ichajka, iriontsitsiuan, niman ichajka iyeltapach on yolki yejuan okiuentlalij para sen uentli ipampa tlajtlakojli ijkon ken toTEKO okinauatij Moisés. ¹¹Pero inakayo on yolki niman ikuetlaxyo* okintlatij ikiauak on campamento.

b 9.7 Ipan hebreo* kijtous “israelitas”, niman ipan septuaginta kijtous “mofamilias”.

¹²Aarón no okechkoyonij on yolki yejuan okitemakak para uentli yejuan nochi tlatla. Niman itelpochuan okimakakej on yestli, niman okajuichij inajnakastlan on tlaixpan*. ¹³Kemaj okiktilijkej itsontekon niman on nakatlatejtektli de on yolki yejuan okitemakakej para uentli yejuan tlatlas, niman Aarón okintlatij ipan on tlaixpan*. ¹⁴Kemaj okipajpak on tlajtlamach* yejuan kipiya ijtik on yolki, niman imetskojyouan. Kemaj okintlatij ipan on tlaixpan* iuan nochi on nakatl.

¹⁵No ijki, Aarón okiktik on uentli impampa on israelitas. Okanato on chivo para kiuentlalis ipampa intlajtlakoluan on israelitas. Kemaj okimiktij niman okiuentlalij ken sen uentli ipampa on tlajtlakojli ijkon ken okichijkej ika on achtoj uentli yejuan okiuentlalij. ¹⁶Ijkuak okuajuikak on yolki yejuan notemaka ken uentli yejuan nochi tlatla, okiuentlalij ken onkaj ipan on tlanauatijli.

¹⁷Kemaj okuajkik on uentli de trigo. Okikuik on harina se mapichtli niman okitlatij ipan on tlaixpan* iuan on uentli yejuan kitlatiaj ijkuak kualkan.

¹⁸No ijki, Aarón okechkoyonij on okichuakax niman on borrego yejuan kitemakayaj on israelitas ken uentli para yoltlalilistli. Niman itelpochuan okimakakej on yestli, niman kemaj yejua okajuichi ipan nochi ilados on tlaixpan*. ¹⁹No ijki, okimakakej ichajka on okichuakax, niman ichajka on borrego. Okimakakej on ikuitlapil, on ichajka yejuan kipiya ipan on tlajtlamach* yejuan kipiya ijtik on yolki, on irionsitsisuan niman on ichajka yejuan onkaj ipan iyeltapach. ²⁰Nochi in okitlalijkej on chauak iuan inyelpannakayo on ome yolki san sekan. Niman kemaj Aarón okitlatij nochi san sekan on chauak ipan on tlaixpan*. ²¹Pero inyelpannakayo niman inyekmametskojyouan on yolkej, Aarón okoolinij ixpan toTEKO ken sen uentli yejuan tlaoolinijli ijkon ken toTEKO okinauatij Moisés.

Iueyilis toTEKO ononextij imixpan on israelitas

²²Niman ijkuak Aarón otlán kitemaka on uentli ipampa tlajtlakojli, niman on uentli yejuan nochi tlatla, niman on uentli para yoltlalilistli ixpan toTEKO, oketsteu imauan impan on israelitas niman okintiochiu. Kemaj onejkuanij itech on tlaixpan*. ²³Kemaj Moisés niman Aarón okalakej ijtik on tabernáculo* kampa nemi Dios. Niman ijkuak ouajkiskej, okintiochijkej on israelitas. Niman kemaj toTEKO onopantlannextij sanoyej kualtsin iueyilis imixpan nochimej on israelitas. ²⁴ToTEKO okuajtitlan tlitl niman okitlatij on yolki yejuan onkatka para tlatlas, niman no okitlatij on chualistli yejuan onkatka ipan on tlaixpan*.

Ijkuak on israelitas ijkon okitakej, opakatsajtsikej, onotlakuantelketskej niman onopachojkej hasta ipan tlajli.

Nadab niman Abiú otlajtlakojkej

10 ¹Nadab niman Abiú, itelpochuan Aarón, cada se okikuik ipopochkon, niman ipan okitlalijkej tlixochtli iuan xkuajli kopajli. Kemaj okitlatijkej ixpan toTEKO, pero yejuamej okitlatijkej sen popochtli* yejuan Dios xokinnauatij. ²Yejua ika, toTEKO okuajtítlan títli, niman okintlatij. Ijkon omikkej ixpan toTEKO. ³Kemaj Moisés okijlij Aarón

—In yejua kinekiya techijlis toTEKO ijkuak okijtoj:

“Nochimej on yejuan uajlauij notech nikintitis ika sanoyej niyektli.”

Niman ijkon nochimej on israelitas nikintitis noueyilis.

Niman Aarón xonauat.

⁴Kemaj Moisés okonots Misael niman Elzafán, itelpochuan Uziel, yejuan itioj Aarón, niman okinmijlij

—Xuajlakan. Xkinkixtikán ijtik in tabernáculó* iminmikatlalnakayo nemoprimos, niman xkinkauatij ikiaauak on campamento.

⁵Yejuamej ouajlakej niman okinuikakej, sanken* ika imintiopixkatlaken yejuan más ueyak, niman okinkauatoj ikiaauak on campamento ijkon ken Moisés okinnauatij.

Kenijki nouikaskej on tiopixkej

⁶Kemaj Moisés okinmijlij Aarón niman itelpochuan yejuan imintoka katka Eleazar niman Itamar

—Maka xmokuatepajsolokan, nion maka xtsayanakan nemotlaken para nesis ika nenmajmanaj impampa on telpokamej tiopixkej yejuan omikkej ikuak toTEKO okuajtítlan on títli. Tlamo, no nemikiskej niman Dios sanoyej kualanis intech nochimej on israelitas. Pero on israelitas, kemaj nochimej ueliskej najmanaskej ipampa on títli yejuan toTEKO okuajtítlan. ⁷Niman no maka nenmejkuaniskej ne kampa ikalakiyan on tabernáculó* kampa nemi Dios para xnenmikiskej, pampa nemejuamej nentlatiochijtin ikan iaceite toTEKO yejuan tlatiochijtli.

Niman okichijkej nochi ken okinnauatij Moisés.

⁸No ijki, toTEKO okinots Aarón niman okijlij: ⁹“Ijkuak tejua noso motelpochuan nenkalakiskej ipan on tabernáculó* kampa nejua ninemi, maka nenkoniskej vino noso san tlinon yejuan tetlauantia para maka nemikiskej. In sen ley yejuan nochipa onyas para nochimej on tatajtín niman iminuejkakoneuan, ¹⁰para ijki nemejuamej nenkixmatiskej tlinon tlatiochijtli niman tlinon xtlatiochijtli, tlinon chipauak niman tlinon xchipauak

nixpan nejua nemoTEKO. ¹¹Niman nemejuamej ika onkaj nenkinmachistiskej on israelitas, nochi in leyes yejuan nejua nemoTEKO nemechmaka itechkopa Moisés.”

¹²Kemaj Moisés okimilij Aarón niman Eleazar iuan Itamar on omemej itelpochuan Aarón yejuan xomikkej:

—Xkuikan on trigo niman cebada yejuan onokau de on uentli yejuan tlatla ixpan toTEKO, niman ika on trigo niman cebada xchijchiuakan pan yejuan xkipiya tlaxokolilistli*. Kemaj xkuakan nisiu on tlaixpan*, pampa in uentli sanoyej tlatiochijtli. ¹³Tejua niman motelpochuan xkuakan kampa tlayekkan, pampa on uentli yejuan kintlatiaj ixpan toTEKO nemoyaxka*. Ijkon toTEKO onechnauatij ma nemechijli. ¹⁴Niman iyelpannakayo on yolki yejuan nenkooliniaj ixpan toTEKO niman on imetskojyo yejuan no nemoyaxka* yes, noneki nenkuaskej kampa tlayekkan. Tejua, motelpochuan niman mochpochuan nenkikuaskej, pampa on yejua nemoyaxka* yejuan kisa itech on uentli para yoltlalilistli de on israelitas. ¹⁵Imetskojyo on yolki yejuan ika nenkitlaxtlauliliaj Dios, niman iyelpannakayo yejuan kooliniaj, kiktiskej ixpan toTEKO pampa kinuentlaliskej ken on uentli yejuan tlaoolinijli san sekan iuan on chauak yejuan kiuentlaliaj para tlatla. Yejua in parte nochipa moyaxka* yes iuan mokoneuan ijkon ken toTEKO yotlanauatij.

¹⁶Kemaj Moisés otetlajoltij kanon nemi on chivo yejuan okitemakakej para uentli ipampa tlajtlakojli. Niman ijkuak okimat ika yokitlatijkej, sanoyej okualan itechkopa Eleazar niman Itamar, on omemej itelpochuan Aarón yejuan xomikkej. Niman okintlajoltij:

¹⁷—¿Tline* xonenkuajkej on uentli yejuan notemaka ipampa tlajtlakojli ne tlatiochikan nisiu on tabernáculo? On uentli sanoyej yektli, niman toTEKO omechmakak para nenkinkixtiliskej imintlajtlakol on israelitas, niman ijki toTEKO kintlapojpoluilis imintlajtlakoluan. ¹⁸Pampa xonenkiktikej on iyesyoye ijtik on tabernáculo, nonekiya nenkuaskiaj on uentli kampa tlayekkan ijkon ken nejua onemechnauatij.

¹⁹Niman Aarón okinankilij:

—Xkita, aman yejuamej yokitemakakej iminuen para imintlajtlakol niman iminuen yejuan otlatlak ixpan toTEKO. Niman ijkon ken nopan yonochiu ika inmikilis notelpochuan, tla ijkon tej, tla aman nejua nikuaskia on uentli ipampa tlajtlakojli, ¿tiknemilia kipaktiskia toTEKO?

²⁰Niman ijkuak Moisés ijkin okak, onoyoltlalij.

Yolkej yejuan chipajkej niman yejuan xchipajkej ixpan Dios

(Dt 14.3-21)

11 ¹ToTEKO okinots Moisés iuan Aarón, niman okinmilij.

²“Xkinmijlikan on israelitas ika de nochimej on yolkej

yejuan nemij ipan in tlaltikpaktli, san uelis kikuaskej ³on yejuan tlakuechouaj niman istimaxaltikej. ⁴Pero maka nenkinkuaskej in kenin yolkej maski tlakuechouaj noso istimajxaltikej:

⁵On camello, pampa maski tlakuechoua, xistimajxaltik.

Xkitakan ken sen yolki xchipauak.

⁶On tejón, pampa maski tlakuechoua, xistimajxaltik. Xkitakan ken sen yolki xchipauak.

⁷On siutli, pampa maski tlakuechoua, xistimajxaltik. Xkitakan ken sen yolki xchipauak.

⁸On pitsotl xuelis nenkinkuaskej pampa maski istimajxaltik, xtlakuechoua. Yejua ika, in sen yolki xchipauak ixpan Dios.

⁹Xuelis nenkinkuaskej in yolkej nion xuelis nenkinteloskej ijkuak yomikkej. Xmatikan ika in yolkej xchipajkej ixpan Dios.

¹⁰De nochi yolki yejuan nemi ipan atl, tla ijtik mar noso ijtik río, san uelis nenkuaskej yejuan kipiayaj inmastlakapaltsitsian niman intojtominyo. ¹¹Pero nochimej yejuan nemij ipan mar noso ipan río, tla xkipiyaj inmastlakapaltsitsian niman intojtominyo, xkintlajyelitakan maski uejueyimej noso pipitikej. ¹²Maka nenkinkuaskej innakayo nochi in kenimej yolkej. Xkintlajyelitakan niman maka nenkinteloskej ijkuak yomikkej. ¹³Nochi yolki yejuan nemi ipan atl, tla xkipiya imastlakapaltsitsian nion intojtominyo, xkintlajyelitakan.

¹⁴De on totomej, in yejuamej yejuan xuelis nenkinkuaskej, yej xkintlajyelitakan: On kuaktli, on tototl itoka quebrantahueso, on kuaktli yejuan chanti itech atl, ¹⁵on tototl itoka milano, niman nochi kech totomej nemij yejuan imintoka halcones, ¹⁶nochi kech kakalotl nemi, ¹⁷on ueyi tototl itoka avestruz, on pajpaktekolotl, on tototl yejuan istak itoka gaviota, nochi kech tojtli nemi, ¹⁸on tekolotl, on tototl itoka cormorán, on tototl itoka cisne yejuan kuaporontik, ¹⁹on cisne istak, on tototl itoka pelícano, on tsojpilol, ²⁰on garzas, on cigüña, on abubilla, niman on tsinakamej.

²¹Nochimej yolkatsitsimej yejuan patlanij niman nejnemij xkintlajyelitakan. ²²Pero nemij sekimej yolkatsitsimej yejuan uelis nenkinkuaskej maski patlanij niman nejnemij. Tla ipan iminmetskojyo kipiayaj iminixiuan yejuan kimpaleuiya para tsikuinij, kemaj uelis nenkinkuaskej. ²³In yejuamej yejuan uelis nenkinkuaskej: nochi sesentlamantikej chapolimej, chauamej, xojkaltsitsimej, niman tapachichimej. ²⁴Pero nochi on sekimej yolkatsitsimej yejuan patlanij niman nejnemij, xkintlajyelitakan.

²⁵Yejua ika, in nemejuamej xnenchipajkej yeskej ixpan Dios:

“Tla yakaj kinteloua inmikatlakayo semej in yolkej, xchipauak yeskej ixpan Dios nochi on tonajli hasta tlapoyajkan.

²⁶Niman tla yakaj kajkokuis inmikatlakayo semej in yolkej, noneki kipakas itlaken niman yejua xchipauak yes ixpan Dios nochi on tonajli hasta tlapoyajkan.

²⁶Nochi on yolki yejuan xistimaxaltik niman xtlakuechoua, xchipauak yes para nemejuamej. San akinon yejuan kimatokas no xok chipauak yes ixpan Dios.

²⁷No ijki, san katlejua yolki yejuan kipiya nauti ikxi, niman ika nomatlakechijtiu ijkuak nejnemi, xmatikan ika xchipauak ixpan Dios. Niman tla yakaj kitelos inmikatlakayo semej in yolkej nokauas xchipauak ixpan Dios nochi on tonajli hasta tlapoyajkan. ²⁸No ijki, ijkuak yakaj kajkokuis inmikatlakayo semej in yolkej, noneki kipakas itlaken. Yejua nokauas xchipauak ixpan Dios nochi on tonajli hasta tlapoyajkan. Noneki nenkintaskej ika in yolkej xchipajkej ixpan Dios.

²⁹In yolkej yejuan noteuilanaj ipan tlajli, yejuamej xkuajli nenkinkuaskej: on yolki itoka comadreja, kemichimej, niman nochi on tlen noteuilana, ³⁰ken tlalkonetl, on yolkej intoka cocodrilos, aketspalimej, techijchikomej, tepaximej niman tlalkokonej.

³¹De nochi on miyek yolki yejuan noteuilanaj ipan tlajli, xmatikan ika xchipajkej ixpan Dios. Tla yakaj kitelos inmikatlakayo semej in yolkej, nokauas xchipauak ixpan Dios nochi on tonajli hasta tlapoyajkan.

³²Tla imikatlakayo sen yolki uetsi ipan itlaj, on tlin ipan ouets xok chipauak yes ixpan Dios. Uelis itlaj tlachijchijtlitli de kojtlitli, noso sen tlakentli*, noso itlaj tlachijchijtlitli de kuetlaxtlitli, noso sen costal, noso san tlinon yejuan yakaj ika tekiti. Nonekis nenkapolaktiskej niman xok chipauak yes nochi on tonajli hasta tlapoyajkan. Sakin, nokauas chipauak ixpan Dios.

³³Niman tla on yolki yejuan yomik onuetsis ipan sen akontli tlachijchijtlitli ika tlalajmojli, nochi on tlen onkaj ijtitik xok chipauak yes, niman on kontli nenkitlajtlapanaskej. ³⁴Tla on atl yejuan onkaj ipan on akontli toyauitli ipan san katlejua tlakuajli, on tlakuajli xok chipauak yes. Niman san tlinon yejuan nooni tla onkaj ijtitik on akontli, no xchipauak yes ixpan Dios. ³⁵San tlinon yejuan ipan uetsis semej on yolkej yejuan yomikkej, xok chipauak yes. Tla uetsis ipan sen horno noso ipan sen tliko, noneki nenkixoxotoniskej. Xmatikan ika xchipauak niman nochipa ijki noneki nenkitaskej ken xchipauak ixpan Dios.

³⁶Niman tla yej on yolki onuetsis ipan sen amejli noso ipan sen atlaltekontli*, on atl sanken* chipauak yes ixpan Dios. Pero yejuan kitelos on yolki yejuan yomik, xok chipauak yes ixpan Dios.

³⁷Niman tla on yolki yejuan yomik uetsis ipan itlaj xinachtli yejuan kajtikatkaj para kitōkaskej, on xinachtli sanken* chipauak yes ixpan Dios. ³⁸Pero tla on xinachtli yokipatsokkej, niman tla on yolki yejuan yomik uetsis ipan, xok chipauak yes ixpan Dios.

³⁹Tla sen yolki yejuan nenkajtikatkaj para nenkuaskej, pero on yolki miki, maka nenkiteloskej. Tla yakaj kitelos, nokauas xchipauak ixpan Dios nochi on tonajli hasta tlapoyajkan. ⁴⁰Tla yakaj kikuas inakayo noso kiktis on yolki, noneki kipakas itlaken, niman nokauas xchipauak nochi on tonajli hasta tlapoyajkan.

⁴¹Maka nenkuaskej nion sen yolki yejuan noteuilana ipan tlajli, pampa on yolki tetlajyeloj*.

⁴²Nochi kech yolki yejuan noteuilana ipan tlajli ika iyelpañ, noso tla nejnemi ika naui ikxi, noso ika miyek ikxiuan, maka nenkuaskej, pampa on yolkej tetlajyelojkej. ⁴³Ijkon tej, maka xmijtlakokan ixpan Dios ika on yolkej yejuan noteuilanañ, ⁴⁴pampa nejua ninemoTEKO Dios. Nemejuamej noneki nenchipajkanemiskej nixpan, pampa nejua nemoDios niyektli. ⁴⁵Nejua nemoTEKO, yejuan onemechkixtij Egipto para ninochiuas nemoDios. Aman tej, xchipajkanemikan nixpan, pampa nejua nemoDios niyektli.”

⁴⁶In yejuamej leyes, para nenkimatiskej de on yolkej, on totomej, niman nochimej yejuan nemij ipan atl, niman nochimej yejuan noteuilanañ ipan tlajli. ⁴⁷In leyes mechpaleuis para nenkimatiskej katlejua yolki yejuan chipauak niman yejuan xchipauak nixpan. Niman no mechpaleuis para nenkimatiskej katlejua yolki uelis nenkuaskej niman katlejua xuelis nenkuaskej.

Kenijki nochipauas ixpan Dios sen siuamixijketl

12 ¹ToTEKO okinots Moisés niman okijli: ²“Ijkin xkinmijli on israelitas: Ijkuak sen suatl nokoneanas niman kitlakatilis sen tlakakonetl, on suatl xchipauak yes chikome tonajli, sano ijki ken ijkuak yestemoua. ³Ipan chikueyi tonajli, on tlakakonetl, kitlaliliskej ipan itlalnakayo on nes kayotl itoka circuncisión*.

⁴Pero inanaj on tlakakonetl sanken* nochipajtias okse 33 tonajli, pampa oyestemok. Xuelis kimatokas itlaj yejuan tlatichoijtli nion xuelis kalakis ipan tabernáculo* hasta ijkuak yokajxiltij on tonaltin. ⁵Pero tla on suatl kitlakatilis sen siuakonetl, xchipauak yes ome semana, sano ijki ken ijkuak yestemoua. Niman yejua sanken* nochipajtias ika oyestemok okse 66 tonajli.

⁶Tla otlakat sen tlakakonetl noso sen siuakonetl, niman ijkuak on nantli yotlan nochipaua, noneki kuikas itech on tiopixki ipan ikalakiyan on tabernáculo* kampa nejua ninemi, sen borreguito yejuan se xijkayotl para kitemakas sen uentli yejuan nochi tlatla. No kuikas sen kokotetsin noso sen pichontsin para kiuentlalis se uentli ipampa tlajtlakojli.

⁷Niman on tiopixki kuikas on borreguito, on pichontsin niman on kokotetsin nixpan nejua nemoTEKO para ijki nejua nixchipauas on yestemoualistli.”

In yejua on leyes yejuan noneki kichiuas sen suatli ijkuak kitlakatilis sen tlakakonetl noso sen siuakonetl. ⁸Niman tla on nantli xkajxilia itomin para kouas sen borreguito, tla ijkon, uelis nechmakas ome kokotetsitsimej. Se de on ome kitemakas ken sen uentli yejuan nochi tlatla, niman on okse kitemakas ken sen uentli ipampa tlajtlakojli. Niman ijki, on tiopixki ipampa kitlajtlanis on suatli niman yejua nokauas chipauak nixpan nejua nemoTEKO.

On kokolistli itoka lepra* temaua

13 ¹ToTEKO okinots Moisés iuan Aarón, niman okinmijlij: ²“Ijkuak yakaj tatapachiuas ipan itlalnakayo, noso kisas tlaxuistli, noso panuetsis mancha istalejki yejuan uelis nayochpilos niman nesis ken lepra, noneki kuikaskej itech on tiopixki Aarón noso itech semej itelpochuan. ³On tiopixki kijitilis on kampa nayochpiloua. Tla on itson noso itsojmiyo yoistayak niman youejkatlanyak, tla ijkon, kijtosneki on kokolistli yonochiu lepra. Niman kemaj ijkuak on tiopixki kuajli yokijitilij ika melauak lepra, kijtos ika on kokoxki xok chipauak ixpan Dios.

⁴Tla on mancha petlanki istayas niman xuejkatlania, nion itson noso itsojmiyo xistaleui, on tiopixki kaltsakuas on kokoxki chikome tonajli. ⁵Niman kemaj kampa ika chikome tonajli oksejpa kijitilis. Tla kita ika on kampa nayochpiloua xueyikatia, oksejpa kaltsakuas on kokoxki okse chikome tonajli. ⁶Ijkuak tlamis on okse chikome tonajli, on tiopixki oksejpa kijitilis. Niman tla on kokolistli xok ueyikatia, yej ye popoliytiu, tla ijkon, kijtos ika on kokoxki yochipau, niman kijtosneki ika san otatapachijka. Kemaj on kokoxki kipakas itlaken niman nokauas chipauak ixpan Dios.

⁷Pero tla on kampa nayochpiloua sanken* ueyikatitiu sakin* ijkuak on tiopixki yokichipajkatenejka, tla ijkon, on kokoxki oksejpa uajlas itech on tiopixki. ⁸Niman tla on tiopixki kitas ika on kampa nayochpilouaya youeyikatiak, kijtos ika on kokoxki xchipauak ixpan Dios. In kijtosneki on kokolistli yonochiu lepra.

⁹Ijkuak yakaj kipiayas on kokolistli itoka lepra* noneki kuikaskej itech on tiopixki. ¹⁰Niman on tiopixki kijitilis, niman tla on kampa tatapachiuistaleui, niman on itsojmiyo istaleui, niman no yonesiko inakayo yejuan selik, ¹¹tla ijkon, yejua kipiya on kokolistli itoka lepra. On tiopixki kijtos ika xchipauak ixpan Dios, niman xok noneki para oksejpa kitsakuas pampa yones ika kipiya lepra.

¹²Tla on kokolistli lepra* xouij ueyikatia ipan nochi itlalnakayo on kokoxki desde ipan ikxiuan hasta ipan itsontekon, hasta kampa on tiopixki kajxilis kitas, ¹³tla ijkon, on tiopixki

oksejpa kijitilis. Tla kitas ika on lepra* yokinokentij ipan nochi itlalnakayo, kijtos ika on kokoxki chipauak. Yejua chipauak pampa nochi itlalnakayo yoistayak niman kijtosneki ika in kokolistli xejua katka lepra, yej okse kokolistli yejuan xtemojtij. ¹⁴ Pero tla okse tonajli oksejpa selia inakayo, xok chipauak yes ixpan Dios. ¹⁵ Ijkuak on tiopixki kitas on inakayo selik, kijtos ika xok chipauak. On inakayo selik xok chipauak pampa yonochiu lepra.

¹⁶ Pero tla on inakayo selik pajtis niman kemaj oksejpa istaleui, on kokoxki noneki kontas on tiopixki, ¹⁷ para kijitilis. Niman tla on tiopixki kitas ika yoistaleu on kampa kipiyya inakayo selik, on tiopixki kijtos ika on kokoxki chipauak pampa melauak yonokau chipauak.

¹⁸ Tla yakaj kipiyya tlaxuistli ipan itlalnakayo niman kemaj pajti, ¹⁹ pero sakin*, kampa onkatka on tlaxuistli oksejpa peua posaui niman istaleui noso panuetsi sen mucha ixtaltik ika chilejki, nonekis yas itech tiopixki para kijitilis. ²⁰ Tla on tiopixki kitas ika kampa kipiyya on kokolistli yej nesi más youejkatlanyak niman itson noso itsojmiyo yoistaleu, on tiopixki kijtos ika xok chipauak ixpan Dios pampa on kokolistli yejua lepra* yejuan yoitsmolin kampa onkatka on tlaxuistli. ²¹ Pero tla on tiopixki kijitilis on kokoxki, niman kitas ika itson noso itsojmiyo xistaleui, niman ika on kampa onkatka on tlaxuistli xuejkatlantitiu, yej ye popolijtiu, tla ijkon, on tiopixki kaltsakuas on kokoxki chikome tonajli. ²² Tla on kokolistli yej más ueyikatitiu ipan itlalnakayo, on tiopixki kijtos ika xok chipauak on kokoxki, pampa in sen kokolistli itoka lepra* yejuan temaua. ²³ Pero tla on mucha xueyikatia, yej nokaua ken onkatka, kitosneki ika san sen tilikichtli kampa onkatka on tlaxuistli, niman on tiopixki kijtos ika on kokoxki chipauak ixpan Dios.

²⁴ Ijkuak yakaj notlajtlatis niman ipan on kampa onotlajtlatij itsmolinis sen mucha istalejkij noso chilejki, ²⁵ on tiopixki noneki kijitilis. Niman tla itson noso itsojmiyo on kokoxki istaleui ipan on imancha, niman on mucha uejkatlantitiu, in yejua sen kokolistli itoka lepra* yejuan yoitsmolin kampa onotlajtlatij. Yejua ika, on tiopixki kijtos ika on yejuan onotlajtlatij xok chipauak ixpan Dios. In yejua sen kokolistli itoka lepra* yejuan temaua. ²⁶ Tla on tiopixki yokijitilij on kampa onotlajtlatij, niman kita ika xistaleui itson noso itsojmiyo, nion on mucha xuejkatlantitiu, yej ye popolijtiu, tla ijkon, kaltsakuas chikome tonajli on yejuan onotlajtlatij. ²⁷ Ijkuak yopanok chikome tonajli on tiopixki oksejpa kijitilis. Niman tla kita ika on mucha youeyikatiak, yejua kijtos ika xok chipauak ixpan Dios. In yejua sen kokolistli itoka lepra. ²⁸ Pero tla on mucha noteltlalia niman

xok ueyikatitiu niman yoistaleu niman yej peua popolijtiu, kijtosneki san posajtikatka on kampa onotlatij. Ijkon tej, on tiopixki kijtos ika chipauak ixpan Dios, pampa kijtosneki san itilikichyo on kampa onotlatijka.

²⁹Ijkuak sen tlakatl noso sen suatli kipiya sen mancha ipan itsontekon noso ipan itenuajkax, ³⁰noneki on tiopixki kijtilis kampa kipiya on mancha. Tla kampa kipiya on mancha uejkatlantitiu, niman tla itson kosejtiu niman tsonkajkayastitiu, tla ijkon, on tiopixki kijtos ika on tlakatl noso on suatli xok chipauak ixpan Dios. In kijtosneki kipiya sen kokolistli itoka tiña yejuan nesi ken tsonajuatl ipan itsontekon noso ipan itenuajkax. ³¹Pero ijkuak on tiopixki kijtilis kampa kipiya on tiña, niman kitas ika xuejkatlantitiu niman xkipiya itson tlilijki, on tiopixki kaltsakuas on tlakatl noso on suatli chikome tonajli on yejuan kipiya on tiña. ³²Kampa ika chikome tonajli, on tiopixki noneki kijtilis oksejpa on tiña. Tla xok ueyikatitiu, nion on itson xok kosejtiu, nion xuejkatlantitiu on tiña, ³³tlaj ijkon, on tiopixki tlanauatis para on kokoxki ma nokuatexikalo noso ma notentsonxima. Pero xkiximas kampa kipiya on tiña. Niman on tiopixki kaltsakuas okse chikome tonajli. ³⁴Tla yopanok on chikome tonajli, on tiopixki oksejpa kijtilis kampa kipiya on tiña. Tla on tiña xok ueyikatitiu nion xuejkatlantitiu, on tiopixki kijtos ika nemi chipauak ixpan Dios. Kemaj kipakas itlaken niman on kokoxki nokauas chipauak. ³⁵Pero tla saman, on tiña sanken* ueyikatitiu ijkuak on tiopixki yokijtojka ika chipauak ixpan Dios, ³⁶on tiopixki noneki oksejpa kijtilis on tiña. Tla on tiña youeyikatiak, xok nonekis para on tiopixki kitejtemos on tsonmiyotl kosejki, pampa on kokoxki yonochiu xchipauak ixpan Dios. ³⁷Pero tla on tiopixki kitas ika on tiña xok ueyikatia, niman kitas ika yonoskaltij itson tlilijki, tla ijkon, on kokoxki yopajtik. On tiopixki kijtos ika on tiña yopajtik niman on kokoxki nemi chipauak ixpan Dios.

³⁸Tla yakaj tlakatl noso yakaj suatli kipiya manchas istalejki ipan itlalnakayo, ³⁹on tiopixki noneki kijitas. Tla kitas ika on manchas san itekiu istalejki, kijtosneki san tlapani ones. Tla ijkon, on tlakatl noso on suatli nemi chipauak ixpan Dios.

⁴⁰Tla yakaj tsonxini niman kuatetsotsoliui, nemi chipauak ixpan Dios. ⁴¹Tla yakaj xini itson ixkuatipan niman ixkuatetsotsoliui, no chipauak ixpan Dios. ⁴²Pero tla peua tatapachiui niman nokaua istalejki niman chilejki ipan on kampa yoxin itson ikuitlapan noso ixpan, tla ijkon, ompa yepejtikaj on kokolistli itoka lepra. ⁴³Tla ijkon, on tiopixki noneki kuajli kijitas. Niman tla on nayocephiloualistli kampa xkipiya itson istaleui noso chichileui, ijkon ken nesi chichileui on kokolistli lepra* ipan

tetlalnakayo, ⁴⁴tla ijkon, on tlakatl noso on siuatl yokajsik lepra* niman xok chipauak. On tiopixki kijtos ika xok chipauak ixpan Dios pampa yokajsik lepra* ipan itsontekon.

⁴⁵On yejuan kipiayas on kokolistli lepra* ika onkaj kitlalis itlakensosol, nokuatepajsolos niman nixtlapachos hasta nisiu ixtololouan. Niman ikin tsajtsitinemis: ¡Nejua xnichipauak! ¡Nejua xnichipauak! ⁴⁶Chika kipiayas on kokolistli, kitaskej xchipauak. Nonekis chantis iselti ikiauak on campamento.

⁴⁷Tla ipan sen tlakentli* yejuan de lana* noso de lino nesis sen mucha yejuan tlajtlacha ken lepra, ⁴⁸noso ipan on tlakentli* yejuan tlamachijchijtli de lino, de lana, ipan kuetlaxtli, noso san tlinon yejuan tlachijchijtli ikan kuetlaxtli, ⁴⁹niman tla on mucha on tlakentin nesi xoxoktik noso chilejkitik, tla ijkon, yejua lepra, niman noneki kititiskej on tiopixki. ⁵⁰On tiopixki kuajli kijitas tlinon kipiya on mucha niman onkuaj kitlalis on tlakentli* manchajvoj chikome tonajli. ⁵¹Kampa ka chikome tonajli kijitas on mucha tla youeyikatiak ipan on tlakentli*, ipan on tlakentli* tlamachijchijtli, ipan on kuetlaxtli noso ipan on tlachijchijtli ikan kuetlaxtli. Tla ijkon nochiua, kijtosneki on mucha yejua lepra* yejuan temojtij niman on tlajtlamach* xchipajkej yeskej ixpan Dios. ⁵²Tla ijkon tej, nochi on tlajtlamach* yejuan kipiayas on mucha, noneki nochi kitlatiskej pampa on yejua lepra* yejuan temojtij. ⁵³Pero tla on tiopixki kitas ika on mucha xpanoua ipan itlaken, itlaj tela noso itlaj kuetlaxtli, ⁵⁴tlanauatis para ma kipajpakakan on tlen kipiya on mucha, niman onkuaj ma kitlalikan okse chikome tonajli.

⁵⁵Sankin ijkuak yokipajpakkej kampa onkaj on mucha, on tiopixki kuajli kijitas. Tla kita ika on mucha xpopoloui, tla ijkon, on mucha xchipauak ixpan Dios niman on tlen manchajvoj noneki kitlatijskej maski tla on mucha xueyikatitiaya, on tej kijtosneki palantiu ijtik niman tlapani. ⁵⁶Pero tla on tiopixki kitas on mucha ijkuak yokipajpakkej ika ye popolijtiu, noneki kitekilis kampa manchado on tlakentli*, noso on kuetlaxtli; noso itlaj okse más. ⁵⁷Pero tla oksepa itsmolini on kokolistli niman ueyikatia ipan on tlakentli* noso ipan on okseki tlajtlamach* tlachijchijtli ikan kuetlaxtli, ika onkaj kitlatiskej on tlen kokolisyoj. ⁵⁸Pero tla ipan on tlakentli* noso ipan on tlakentli* tlamachijchijtli noso ipan on yejuan tlachijchijtli ikan kuetlaxtli yejuan yokipajpakkej niman kuajli yochipau de on kokolistli, noneki oksejpa kipajpakaskej, niman on tlen kokolisyoj katka chipauak yes ixpan Dios.”

⁵⁹In yejua leyes para kixtiskej on manchas de lepra* yejuan kajsí on tlakentin de lana, de lino, on tlamachijchijtli tlakentli*, noso itlaj yejuan tlachijchijtli ikan kuetlaxtli, para uelis kinteneuaskej chipajkej noso xchipajkej ixpan Dios.

Kenijki nochipauaskej yejuan kipiay lepra

14 ¹ToTEKO okinots Moisés niman okijlij: ²“In yejua tlanauatiltin para nochipauas sen kokoxki yejuan kipiya lepra: On kokoxki kuikaskej itech tiopixki, ³niman on tiopixki uajkisas de ijtik on campamento para kualijitilis on kokoxki. Tla on tiopixki kitas ika yopajtik ilepra on kokoxki, ⁴tlanauatís para on yejuan nochipauas, ma kinuajuika ome tototsitsimej yejuan yoltokej niman chipajkej nixpan, iuan kojtlí* de cedro, iuan tela yejuan chichiltik, niman sen xojmatsintli de hisopo. ⁵Kemaj on tiopixki tlanauatis ma kechtekikan on achtoj tototl ipan sen tlaltekomatl yejuan kipiayas atl de amejli. ⁶Niman ipan on yesatl kipatsos on tototl yejuan yoltikaj iuan on kojtlí* de cedro, on tela chichiltik, niman on xojmatsintli de hisopo. ⁷Niman kemaj kajuichis chikomewa ikan yestli on kokoxki yejuan nochipauas de on kokolistli lepra. Niman ijkon kiteneuas chipauak ixpan Dios. Kemaj kimakauas on tototl para ma uiya ipan campo.

⁸On kokoxki yejuan nochipauas noneki kimpakas itlakeuan, niman kiximas itson, niman kiximas nochi itsojmiyo, niman naltis. Ijkon nokauas chipauak ixpan Dios. Kemaj uelis kalakis ipan on campamento, maski sanken* nokauas chikome tonajli ikiauak ichan. ⁹Kampa ika chikome tonajli nokuatexikalos, notentsonximas, niman nixmojximas, niman kiximas nochi itsojmiyo ipan itlalnakayo. Niman kemaj kimpakas itlakeuan niman naltis. Ijkon nokauas chipauak ixpan Dios. ¹⁰Ipan chikueyi tonajli, kuajuikas ome borreguito niman sen borreguita yejuan xkanaj tlakokoltin ipan intlakayo niman yejuan se xijkayomej. No kuajkis uentli de trigo noso cebada, chikuasen kilo harina yejuan más kuajli niman yejuan tlanelojli iuan aceite, niman se cuartojtipan aceite. ¹¹On tiopixki yejuan kichiuas on chipaualistli, kuikas on kokoxki nixpan nejua nemoTEKO niman kiktis nochi on uentli itech ikalakiyan on tiopan. ¹²Kemaj kuikas se de on ome borreguito para kiuentlalis iuan yeyi cuartojtipan aceite para on uentli ipampa on tlajtlakojli de culpa. In uentli yejuan tlaolinijli, ketsteuas tlakpak, niman koolinis yolik. ¹³Kemaj kechkoyonis on borreguito ne kampa tlayekkan, kampa kinmiktiaj on yolkej para uentli ipampa tlajtlakojli niman on uentli yejuan nochi tlatla. On uentli yejuan notemaka ipampa on tlajtlakojli de culpa, kimakaj on tiopixki para kikua no ijki kenon uentli ipampa tlajtlakojli. In uentli sanoyej yektli.

¹⁴Kemaj on tiopixki kikuis achijtsin iyesyó on uentli yejuan notemaka ipampa itlajtlakol de culpa, niman kitlatlalilis tlatsintlan ipan iyekmanakas on kokoxki yejuan nochipaua, niman ipan iyekmajpiltomauak, niman ipan

iyekmaixpiltomauak. ¹⁵Kemaj kikuis achijtsin aceite, niman kitekas ipan iopochmapalko. ¹⁶Niman kemaj kipolaktis iyekmajpil ipan on aceite yejuan kipiya ipan iopochmapalko niman ika on imajpil kajuichis chikomema ika on aceite nixpan nejua nemoTEKO. ¹⁷Ika on aceite yejuan nokauas ipan ima, on tiopixki kikuis achijtsin, niman kitlatlalilis ipan iyekmanakaskuitlapan on kokoxki yejuan nochipaua, niman ipan iyekmajpiltomauak, niman ipan iyekmaixpiltomauak ipan on yestli yejuan achtoj okitlalilij on uentli ipampa itlajtlakol de culpa. ¹⁸Niman on seki aceite yejuan nokauas, on tiopixki kitlatlalilis ipan itsontekon on kokoxki yejuan nochipaua. Ijkon kichiuas on tiopixki, para Dios uelis kipajtis on kokoxki. ¹⁹Kemaj on tiopixki kiuentlalis on uentli ipampa on tlajtlakojli, niman ijkon uelis chipauis on kokoxki yejuan xchipauak. Sakin, kiuentlalis sen uentli yejuan tlatlas. ²⁰San sekan kiuentlalis iuan on uentli de trigo noso cebada ipan on tlaixpan*. Ijkon tej, on tiopixki uelis kichiuas para Dios kitlapojpoluilis itlajtlakoluan on kokoxki, niman ijkon nokauas chipauak ixpan Dios.

²¹Tla on kokoxki yejuan kualo ikan lepra* sanoyej mayanki niman xkajxilia kouas ome borreguito, uelis kitemakas san sentel para se uentli ipampa itlajtlakol de culpa. In uentli kenin, ketsteuaj tlakpak niman kooliniaj yolik nixpan nejua nemoTEKO para kitlapojpoluiskej itlajtlakol. Niman para on uentli de trigo noso cebada, kuajkis ome litro uan tlajko harina yejuan tlanelojli iuan aceite, niman no kuajkis okse yeyi cuartojtipan aceite. ²²Niman kinuajuikas ome kokotetsitsimej, noso ome pichontsitsimej, san ken yejua kajxilis, on se para uentli ipampa tlajtlakojli niman on okse para on uentli yejuan tlatlas. ²³Kampa ika chikueyi tonajli, on kokoxki kiktis nochi in itech on tiopixki, para nochipauas. Kimaktilis on tiopixki nixpan nejua nemoTEKO kampa ikalakiyan on tabernáculo* kampa nejua ninemi. ²⁴On tiopixki kuikas on borreguito para uentli ipampa on tlajtlakojli de culpa iuan on yeyi cuartojtipan aceite niman nechixpantilis nejua nemoTEKO ken sen uentli yejuan tlaoolinijli. ²⁵Kechkoyonis on borreguito yejuan para on uentli ipampa on tlajtlakojli de culpa. Niman kemaj on tiopoxki kikuis achijtsin iyesyo on borreguito, kitlatlalilis ipan iyekmanakaskuitlapan, niman ipan iyekmajpiltomauak niman ipan iyekmaixpiltomauak on kokoxki yejuan nochipaua. ²⁶Kemaj kinotekilis achijtsin on aceite ipan iopochmapalko, ²⁷niman ika iyekmajpil kajuichis chikomema nixpan nejua nemoTEKO ika on seki aceite yejuan kipiya ipan iopochmapalko. ²⁸No kitlatlalilis on kokoxki yejuan nochipaua achijtsin aceite de iopochmapalko ipan ipeuyan iyekmanakas, niman ipan iyekmajpiltomauak niman iyekixpiltomauak.

Kitlatlalilis sa no ompa kampa achtoj okitlalilijka iyeyso on uentli ipampa on tlajtlakojli de culpa. ²⁹Niman on seki aceite yejuan onokau ipan iopochmapalko on tiopixki, kitlalilis ipan itsontenkon on tlakatl yejuan nochipaua nixpan nejua nemoTEKO, para ijkon niktlapojpoluis itlajtlakol. ³⁰Kemaj on tiopixki kinuentlalis on kokotetsin noso on pichontsin, san tlen ouel okitemakak para nochipauas. ³¹Se kiuentlalis para uentli ipampa on tlajtlakojli, niman on okse kiuentlalis ken uentli yejuan tlatla teuan on uentli yejuan de trigo noso cebada. Ijkon on tiopixki uelis kichiuas para nejua nemoTEKO niktlapojpoluis itlajtlakouan on kokoxki.”

³²In yejua leyes para on kokoxkej yejuan kipiay lepra, niman xkajxiliaj kitemakaj sen uentli yejuan ajsitikaj* para inchipaulis.

Kenijki kinchipauaskej on kaltin kampa onkaj manchas de lepra

³³Kemaj Dios okinots Moisés iuan Aarón, niman okinmijlij: ³⁴“Ijkuak nemejuamej ye nennemiskej ipan on tlajli Canaán yejuan nemechmaka para nemoyaxka* yes, niman tla nejua niktalilis sen kokolistli itoka lepra* ipan sen kajli, ³⁵iteko on kajli kontas on tiopixki, niman kijlis: Nochan yononextij sen mancha yejuan nesi ken yejua lepra.

³⁶“On tiopixki ijkuak xekalaki ipan on kajli tlanauatis ma kitlakijkixtilikan on kajli, para maka kipanoltis on kokolistli nochi on tlajtlamach*. Kemaj on tiopixki onkalakis para kuajli konijitas on mancha.

³⁷Kemaj ijkuak on tiopixki yokixtlaloj on mancha, niman kita ika ipan on tepankajli on mancha tilauak, xoxoktik, chilejkitik niman ye kalaktiu ipan on tepantli, ³⁸on tiopixki kisas ipan on kajli niman tlanauatis ma kitsakuakan chikome tonajli. ³⁹Kampa ika chikome tonajli on tiopixki oksejpa konijitilis on mancha. Tla on mancha youeyikatiak ipan itepan on kajli, ⁴⁰tlanauatis ma kixtilikan on temej yejuan kipiay on mancha, niman kominxiniskej kampa tlamach konxiniaj yejuan xchipauak uejka de on ueyikalpan. ⁴¹Niman no tlanauatis para ma kuauanakan on tepantli ijtik on kajli, niman on tlalteutli yejuan kisas ma kixinitij kampa tlamach konxiniaj yejuan xchipauak uejka de on ueyikalpan. ⁴²Niman kemaj kominkuiskej oksekimej temej para kintlaliskej kampa okinkixtijkej on sekimej. Kemaj konkuiskej tlalajmojli para ika kijixmanaskej on kajli.

⁴³“Tla on mancha oksejpa uajnesi ipan on kajli ijkuak yokinkixtilijkej on temej, niman ijkuak yokuauankaj on tepantli niman yokijixmankaj, ⁴⁴on tiopixki oksejpa onkalakis para kijitas. Tla on mancha oksejpa ones niman oueyikatiak ijtik on

kajli, kijtosneki ika on temojtij kokolistli lepra* onkaj ipan on kajli. Yejua ika on kajli xok chipauak. ⁴⁵Tla ijkon tej, on kajli kixoxotoniskej niman nochi on tlajtlamach* temej, kojtin* niman tlajli, ma kixinitij kampa tlamach konxiniaj yejuan xchipauak uejka de on ueyikalpan. ⁴⁶San akinon yejuan kalakis ipan on kajli ijkuak on tiopixki yotlanauatijka para ma tsakutia, kiteneuaskej ika xok chipauak nochi tonajli hasta tlapoyajkan. ⁴⁷San akinon yejuan tlakuas noso kochis ipan on kajli, nonekis kimpakas itlakeuan para chipauis.

⁴⁸'Pero tla on tiopixki oksejpa kontas on kajli, niman kitas ika on mancha xok ueyikatia desde ijkuak okijixmankaj, kijtos ika on kajli chipauak pampa on mancha yopopolui. ⁴⁹Para on tiopixki kichipauas on kajli, kikuis ome tototsitsimej, kojtlit* de cedro, tela yejuan chichiltik, niman sen xojmatsintli de hisopo. ⁵⁰Kemaj kimiktis se de on ome tototsintli ipan sen tlattekomatl yejuan kipiayas atl de amejli. ⁵¹Niman kemaj kikuis on kojtlit* cedro, on xojmatsintli de hisopo, on tela chichiltik, niman on tototsintli yejuan yoltikaj, niman kimpatsos ika on yesatl de on tototl yejuan okimiktijkej, niman kajuichis chikomepa on kajli. ⁵²Ijkon kichipauas on kajli ika iyesy on tototsintli, niman ika on atl de amejli, niman ika on tototsintli yoltikaj, niman ika on kojtlit* de cedro, niman ika on xojmatsintli hisopo, niman ika on tela chichiltik. ⁵³Niman sankin kimakauas neka kaltenko on tototsintli yejuan yoltikaj, niman ijkon kixtis on kokolistli ipan on kajli niman nokauas chipauak."

⁵⁴In yejua leyes para nochi on sesekneka kokolistli itoka lepra* noso tiña, ⁵⁵ipan on tlakentin niman kaltin, ⁵⁶de on kampa se tatapachiui, de on kampa kipiayas sen tsotsotl yejuan nayochpiloua, niman de on sesentlamantikej manchas. ⁵⁷Ika in tlanauatiltin uelis se kimatis on tlen chipauak noso on tlen xchipauak ixpan toTEKO. Nikan tlami on leyes para on kokolistli lepra.

Tlanauatiltin itechkopa on kokolistin xchipajkej yejuan sekimej tlakamej kimajsi

15 ¹ToTEKO okinots Moisés iuan Aarón, niman okinmijlij: ²"Ijkin xkimijlikan on israelitas: Ijkuak yakaj tlakatl temalkisa kampa tlapiasoua, in kichiuas para on tlakatl xok chipauak yes nixpan. ³On xchipaualistli ipan on tlakatl nochiua ijkuak on kampa tlapiasoua ixika, maski ueli tlapiasoua noso ka. Yejua ika, on ley kijtousa ika on tlakatl xchipauak.

⁴'San kanon kampa notekas noso notlalis on tlakatl yejuan ixika, ompa nokauas xchipauak.

⁵'San akinon yejuan kimatokas on kampa kochi on tlakatl, ika onkaj kipakas itlaken niman naltis. Niman on tlakatl nokauas xchipauak nochi on tonajli hasta tlapoyajkan.

6'San akinon yejuan notlalis ipan itlaj on kampa onotlalij on tlakatl yejuan kualo, ika onkaj kimpakas itlakeuan niman naltis. Niman on tlakatl nokauas xchipauak nochi on tonajli hasta tlapoyajkan.

7'San akinon yejuan kimatokas itlalnakayo on tlakatl yejuan ixika ika onkaj kimpakas itlakeuan niman naltis. On tlakatl nokauas xchipauak nochi on tonajli hasta tlapoyajkan.

8'Tla on tlakatl yejuan ixika kichijchas okse tlakatl yejuan xkualo, on tlakatl yejuan xkualo ika onkaj kimpakas itlakeuan niman naltis. On tlakatl nokauas xchipauak nochi on tonajli hasta tlapoyajkan.

9'San katlejua silla yejuan ika kinsillajtiaj on yolkej, tla on tlakatl yejuan ixika ipan onotlalij, nokauas xchipauak nixpan.

10'San akinon yejuan kimatokas itlaj on kampa onotlalijka on tlakatl yejuan ixika, xchipauak yes nochi on tonajli hasta tlapoyajkan.

11'No ijki, san akinon yejuan kiktis itlaj yejuan ipan onotlalijka, ika onkaj kimpakas itlakeuan niman naltis. Yejua nokauas xchipauak nochi on tonajli hasta tlapoyajkan.

12'Tla on tlakatl yejuan ixika kimatoka yakaj ijkuak xnomajtekia, on yejuan okimatokakej ika onkaj kimpakas itlakeuan niman naltis. On tlakatl nokauas xchipauak nochi on tonajli hasta tlapoyajkan.

13'Tla sen tlakatl yejuan ixika kimatokas sen tlaltekomatl, ika onkaj kitlajtlapanaskej on tlaltekomatl. Niman tla kimatokas itlaj yejuan tlachijchijtlitli ikan kojtlitli, ika onkaj kipajpakaskej.

14'Tla on tlakatl yopajtik ika ixikaya, noneki kichas chikome tonajli para peuas nochipauas. Kemaj kimpakas itlakeuan, niman naltis ikan atl de ameyajli, niman kemaj nokauas chipauak.

15'Kampa ika chikueyi tonajli kuajuikas ome kokotetsitsimej noso ome pichontsitsimej, itech ikalakiyan on tabernáculo* kampa nejua ninemi. Ompa kimaktilis on tiopixki nixpan nejua nemoTEKO. 16'On tiopixki se kiuentlalis para sen uentli ipampa on tlajtlakojli, niman okse kiuentlalis para on uentli yejuan tlatla. Niman ijkon uelis nochipauas nixpan nejua nemoTEKO on tlakatl yejuan ixikaya.

17'Ijkuak yakaj tlakatl kijneuas ixinachyo, noneki kuajli nopajpakas ipan nochi itlalnakayo, niman on tlakatl nokauas xchipauak nochi on tonajli hasta tlapoyajkan.

18'Niman san katlejua tlakentli* noso kuetlaxtli yejuan ipan chipinis on xinachyotl, noneki kipajpakaskej, niman nokauas xchipauak nochi on tonajli hasta tlapoyajkan.

19'Ijkuak sen tlakatl notekas iuan sen suatli, on omemej ika onkaj nopajpakaskej ikan atl. Yejuamej nokauaskej xchipajkej nochi on tonajli hasta tlapoyajkan.

¹⁹Ijkuak ajsis on tonajli ika on suatI yestemos, yejua nokauas xchipauak chikome tonajli.

“San akinon yejuan kimatokas, nokauas xchipauak nochi on tonajli hasta tlapoyajkan.

²⁰San tlinon yejuan ipan notekas on suatI ijkuak yestemoua, on nokauas xchipauak, niman san tlinon on tlen ipan notlalis nokauas xchipauak.

²¹San akinon yejuan kimatokas on kampa on suatI onotekak ika onkaj kimpakas itlakeuan niman naltis. Yejua nokauas xchipauak nochi on tonajli hasta tlapoyajkan.

²²San akinon yejuan kimatokas on tlen on suatI ipan onotlalij, ika onkaj kimpakas itlakeuan niman naltis niman nokauas xchipauak nochi on tonajli hasta tlapoyajkan. ²³Tla yakaj kimatoka on tlen onkatka kampa onotekaka noso onotlalijka on suatI, nokauas xchipauak nochi on tonajli hasta tlapoyajkan.

²⁴Tla yakaj tlakatl noteka iuan sen suatI ijkuak yestemoua, on tlakatl nokauas xchipauak chikome tonajli. No ijki, san katlejua tlapechtli kampa on tlakatl onotekak xchipauak yes.

²⁵Tla sen suatI ixika ijkuak xe ajsiya kamanon yestemos, niman on ixikalistli kiuejkaua miyek tonaltin, noso on suatI yestemoua niman xnoteltia ken kitocaroua, on suatI nokauas xchipauak chika ijkon kipiya on ixikalistli. Yejua xchipauak yes ijki ken tla kipiaskia on yestemoualistli.

²⁶San kanon kampa on suatI kochis niman san tlinon ipan notlalis chika kipiya ixikalistli, nokauas xchipauak, no ijki ken ijkuak kipiaskia on yestemoualistli yejuan ken ye kipiyan.

²⁷“San akinon yejuan kimatokas in tIajtlamach*, nokauas xchipauak nixpan niman ika onkaj kimpakas itlakeuan niman naltis, pero nokauas xchipauak nochi on tonajli hasta tlapoyajkan.

²⁸Ijkuak on ixikalistli noteltis, kichas chikome tonajli, niman kemaj nokauas chipauak nixpan. ²⁹Kampa ika chikuelyi tonajli kuajuikas ome kokotetsitsimej noso ome pichontsitsimej, niman kinmaktilis on tiopixki ne ikalakiyan on tabernáculo* kampa nejua ninemi. ³⁰On tiopixki kiuentlalis se para uentli ipampa tIajtlakotin, niman okse kiuentlalis para uentli yejuan nochi tlatla. Niman ijkon on tiopixki kichiuas para on suatI kiselis tetlapojpoluulistli niman chipaualistli nixpan nejua nemoTEKO pampa ixikaya. ³¹Ijkon tej, nenkinkixtiliskej on israelitas on tlen xchipauak para maka mikiskej tla yaskej xchipajkej ipan on tabernáculo* kampa nejua ninemi iminuan.”

³²In yejua on tlanauatiltin para on tlakamej yejuan ixikaj niman on yejuan kijneuaj inxinachyo, niman ijkon nochiuaj xchipajkej.

³³Niman in tlanauatiltin no para on siamej ijkuak yestemouaj,

niman para on tlakamej noso on siuamej yejuan ixikaj san kamanon, niman para sen tlakatl yejuan noteka iuan sen siuatl ijkuak yestemouaj.

On tonajli ijkuak notlapojpoluiya intlajtlakoluan on israelitas

16 ¹Sakin, ToTEKO okinots Moisés ijkuak yomikaj on omemej itelpochuan Aarón ika sanoyej okinisiuijkej itech toTEKO niman okiuentlalijkej xkuajli kopajli. ²Ijkin okijlij Moisés: “Xkijli mokniu Aarón maka kalakis san kaman kinekis ipan on kalijtik kampa Más Tlayekkan, yejuan onkaj ikuitlapan on yekcortina niman onkaj ixpan itentsaka on yekcaja. Tla kichiuas, mikis pampa ompa ninonextis ipan sen moxtli. ³Achtoj, Aarón kuajuikas sen becerro itech on tlaixpan* para nechmakas ken sen uentli ipampa itlajtlakol, niman kuajuikas sen borrego para nechmakas ken sen uentli yejuan tlatlas. Kemaj yejua uelis kalakis ne kampa Más Tlayekkan. ⁴Pero achtoj naltis, niman kemaj kitlalis on itsintlaken de lino tlatiochijtli. Kemaj kitlalis itlaken yejuan más ueyak de lino yejuan tlatiochijtli. Kemaj notlajkosalos ika iilpika, niman kinomaniltis ikuatlaken pampa in tlakentin sanoyej tlatiochijtin.

⁵Niman on israelitas kuajuikaskej ome chivo para uentli ipampa tlajtlakojli, niman sen borrego para nechmakaskej ken sen uentli yejuan nochi tlatla. ⁶Pero achtoj noneki para Aarón nechuentlalilis sen becerro ipampa itlajtlakol niman ipampa intlajtlakoluan ifamilia. ⁷Kemaj kuajuikas ome chivo nixpan, nejua nemoTEKO, itech itsakuijlou on tabernáculo* kampa nejua ninemi. ⁸Kemaj kichiuas suertes ika on ome chivo para kitas katlejua para nejua, nemoTEKO, niman katlejua yes para Azazel^c. ⁹On chivo yejuan para nejua, Aarón kiuentlalis ken sen uentli ipampa tlajtlakojli. ¹⁰Pero on chivo yejuan nochiuas para Azazel, kitemakas sanken* yoltikaj nixpan, nemoTEKO, para nikinkixtilis imintlajtlakoluan. Kemaj konmakauas para yas itech Azazel uejka ipan on xalpatlajkan para kiktis tetlajtlakoluan ompa niman xokaman uajnokuepas oksejpa.

¹¹Aarón kiuentlalis on becerro ken sen uentli ipampa itlajtlakoluan niman intlajtlakoluan nochi ifamilia. ¹²Kemaj kikuis sen popochkontli yejuan kitemiltis ika tlixochtli yejuan kiktis ipan on tlaixpan* yejuan onkaj nixpan nejua nemoTEKO. Niman no kikuis ome mapichtli kopajli yejuan kuajli kuechtik niman yejuan ijnekuisti ajuiyak, niman kiktis ne kampa Más

c 16.8 Sekimej kinemiliaj ika “Azazel” kijtosneki itoka on chivo yejuan kimakauaj. Oksekimej kinemiliaj ika kijtosneki itoka ne kampa yau on chivo ipan on xalpatlajkan. Más miyekej kinemiliaj ika kijtosneki ijki itoka sen demonio yejuan nemi kampa yau on chivo.

Tlayekkan ikuitlapan on yekcortina. ¹³Ompa kitlalis on kopajli ipan on tlixochtli nixpan nejua nemoTEKO, niman ipokyo on kopajli kichiuas para xok nesis itentsaka on yekcaja. Ijkon Aarón xmikis. ¹⁴Kemaj kikuis achijtsin iyesyoy on becerro niman ika imajpil kajuichis ixpan itsaka on yekcaja kampaka ikisayan tonaltsintli. No ijki, kajuichis ika imajpil chikomempa ixpan on yekcaja.

¹⁵Kemaj kisas niman kimiktis on chivo ken sen uentli ipampa tlajtlakojli para intlajtlakoluan on israelitas. Niman kiktis achijtsin iyesyoy ne kalijtik kampa Más Tlayekkan. Niman ika kajuichis ikuapan itsaka on yekcaja niman no kajuichis ixpan. Sano ijki kichiuas ken okichiu ika iyesyoy on becerro. ¹⁶Ijkon kichipauas on Más Tlayekkan yejuan xok chipauak ipampa on xompayeyueualistli, niman on tlajtlakojli yejuan okichijkej on israelitas. No ijki, kichipauas nochi on tabernáculo* yejuan onkaj itlajkotian incampamento on israelitas kampa yejuamej tlajtlakojtokej.

¹⁷Xakaj uelis nemis ijtik on tabernáculo* chika Aarón konchipauas itlajtlakoluan, niman intlajtlakoluan ifamilia, niman imintlajtlakoluan nochimej on israelitas ne kampa Más Tlayekkan kampa nejua ninemi. ¹⁸Kemaj kisas para yas konchipauas on tlaixpan* kampa kitlatiaj on uentli yejuan onkaj nixpan nejua nemoTEKO. Kikuis achijtsin iyesyoy on becerro niman achijtsin iyesyoy on chivo, niman kitlatlalilis ipan on naui ken itlaj ikuakuautsitsiuan on tlaixpan* niman iyeualkan. ¹⁹Niman ika imajpil kikuis on yestli, niman kajuichis on tlaixpan* chikomempa para kinchipauas on israelitas, niman ijkon nokauas chipauak on tlaixpan*.

²⁰Ijkuak Aarón yotlan kichipaua on Más Tlayekkan, niman on okse iparte de on tabernáculo* kampa nejua ninemi niman on tlaixpan*, tlanauatis ma kuajuikakan on chivo yejuan yoltikaj. ²¹Niman kemaj kitlalis imauan ipan itsontekon on chivo yejuan yoltikaj, niman kijtos nochi on ixipanteitalis, nochi imintlajtlakoluan niman nochi iminxopeyeyueualis on israelitas. Ijkin kintlalis nochi on tetlajtlakoluan ipan itsontekon on chivo. Niman kemaj sen tlakatl yejuan yejua kitlapejpenis, kuikas on yolki niman konmakauas uejka ipan on xalpatlajkan. ²²Ijkuak on chivo ompoliuis ipan on xalpatlajkan, kiktis nochi tetlajtlakoluan ipan on tlaltin kampa xakaj chanti.

²³Kemaj Aarón kalakis ijtik on tabernáculo* kampa nejua ninemi, niman kixtis itlaken yejuan tlachijchijitli ikan lino on yejuan okitlalij ijkuak okalak ipan on Más Tlayekkan. Ompa kauas itlaken. ²⁴Sano ompa ijtik on tabernáculo, naltis. Kemaj oksejpa kitlalis itlaken yejuan xitiopixkatlaken. Kemaj

nechmakas on uentli yejuan nochi tlatla para yejua, niman no okse uentli yejuan tlatla, yejuan para on israelitas. Ijkon itlajtlakol notlapojpoluulis niman intlajtlakol on israelitas.

²⁵Kitlatis ipan on tlaixpan* ichajka on yolki ken sen uentli ipampa tlajtlakojli. ²⁶Niman on tlakatl yejuan okitlapejpenijkej para okuikak on chivo niman okimakauato ipan on xalpatlajkan itech Azazel, noneki kipakas itlaken niman naltis. Kemaj, uelis kalakis ipan on campamento.

²⁷On becerro iuan on chivo yejuan yokinuentlalijkej ipampa tlajtlakojli, niman iminyesy yejuan Aarón okiktik ne kampa Más Tlayekkan para intlajtlakoluan on tlakamej notlapojpoluuliskej, noneki kiktiskej ikiaauak on campamento. Ompa nonekis kintlatiskej iminkuetlaxyo*, iminnakayo, iminxixalis, niman nochi on tlen kisas imijtik. ²⁸On akin kitlatis on tlajtlamach*, noneki kipakas itlaken, niman naltis. Kemaj uelis kalakis ipan on campamento.

²⁹Nemejuamej nochipa nenkichiuaskej in tlanauatijli: Ipan on tonajli majtlaktli de ipan on chikome metstli, nemejuamej niman on tlakamej yejuan xchanejkej yejuan nemij nemouan nenkichiuaskej sen nesauajli niman xnenkichiuaskej itlaj tekittl. ³⁰Ijkon nenkichiuaskej pampa ipan on tonajli ijkuak kitlapojpoluiyaj on tlajtlakojli, mechtlapojpoluuliskej nemotlajtlakoluan. Ijkon tej, nemokauaskej chipajkej de nochi nemotlajtlakoluan ixpan toTEKO. ³¹On tonajli ikatlakajtli yes ijkuak nemochimej* nemoseuiskej niman nemosauaskej. In yejua sen tlanauatijli yejuan nenkitlakaitaskej para nochipa. ³²On tiopixki yejuan okuatêkijkej ikan aceite para okiselij tekiauajyotl niman okiteyaxkatijkej ken ueyi tlayekanki tiopixki para okipatlak itataj, kixtis on tlajtlakojli. Niman noneki kitlalis itiopixkatlaken yejuan tlachijchijtlitli ikan lino, ³³niman kixtis tlajtlakojli ne kampa Más Tlayekkan. No ijki, kichipauas nochi on tabernáculo* niman on tlaixpan*. Niman no kixtis intlajtlakoluan on tiopixkej niman imintlajtlakoluan nochimej on israelitas.

³⁴In tlanauatijli noneki nenkitlakamatiskej para nochipa: San sejpa ipan se xipan noneki nenkitlaliskej on uentli yejuan ika niktlapojpoluis nochi imintlajtlakoluan on israelitas.”

Niman Aarón okichiu nochi in tlanauatiltin yejuan toTEKO okimakak Moisés.

San uelis kitemakaskej uentli ipan on tabernáculo

17 ¹ToTEKO okijlij Moisés: ²“Xkinmijli Aarón niman itelpochuan niman nochimej on israelitas: “ToTEKO mechmaka in tlanauatiltin.

³⁻⁴”Tla yakaj israelita kimiktia sen uakax noso, sen borreguito, noso sen chivo ken sen uentli para nejua nemoTEKO san

kanon ijtik noso ikiauak on campamento, niman yej xixpan on tabernáculo, kipiyaş tlaĵtlakojli pampa okixpoloj yeştlı. On tlatatl noneki nenkixtişkej nemotech para xokaman ueliş nemiş nemouan. ⁵In tlanauatiĵli kĵtoşneki ika on israelitaş xokaman kinmiktışkej okşekan on yolkej para uentli. Noneki ma kinuajuikakan ne kampa ikalakiyan on tabernáculo* kampa nejua ninemi, para neçmakakşkej nejua nemoTEKO. Ma kimakatĵ on tiopixki niman ompa kimiktışkej on yolki ken sen uentli para neçyoltlalişkej nejua, nemoTEKO. ⁶On tiopixki tlaĵuichiş ika on yeştlı ipan notlaixpan* yeĵuan onkaj nişiu itsakuĵĵlou on tabernáculo* kampa nejua ninemi. Niman on çhualıstli kitlatış, niman iĵnekuıstış aĵuiyak, niman neçyolpaktiş nejua nemoTEKO. ⁷On israelitaş xokaman kinmakakşkej uentli on xkuajkualtin ajakameĵ yeĵuan kinmauiştiliayaj, niman san impampa niĵtlakouaj. In sen ley yeĵuan noçhıpa onyas para noçhımeĵ on tataĵtin niman imınueĵkakoneuan.

⁸No xkinmiĵli ika xakaj israelita noso xçhaneĵ yeĵuan nemi nemouan, ueliş kitlaliş sen uentli yeĵuan tlatlaş noso itlaĵ okşe uentli, ⁹tla xaçtopa kuajki kampa ikalakiyan on tabernáculo* para neçmakakş nejua nemoTEKO. Tla yakaj iĵkon kichiuaş, ika onkaj nenkixtişkej nemotech para xokaman ueliş nemiş nemouan.

ToTEKO okiĵtoj ika xueliş kuakşkej yeştlı

¹⁰Tla se israelita noso yakaj xçhaneĵ yeĵuan nemi nemouan kikuak yeştlı, nejua sanoyej nikualaniş iteçkopa, niman nikixtiş para xokaman ueliş nemiş nemouan, ¹¹pampa inemiliş on yolki onka ipan iyeyşo yeĵuan kipiya ipan itlakayo. Nejua nemeçmaka on yeştlı para ika nentlaĵuichişkej ipan on tlaixpan*, para toTEKO mitştlapojpoluiliş motlaĵtlakoluan. Iĵki noçhiuaş pampa on yeştlı mitştlapojpoluiliş motlaĵtlakoluan.

¹²Yeĵua ika teĵ, nikinmilia on israelitaş: Maka yakaj nensemeĵ nion se on yeĵuan xçhaneĵ yeĵuan nemıĵ nemouan, ueliş kikuak yeştlı. ¹³Tla yakaj israelita noso on yeĵuan xçhaneĵ semeĵ ontlatemoua niman kimiktıa itlaĵ yolki noso tototl yeĵuan çhipauak para nenkuakşkej, noneki kitoyauakşkej iyeyşo niman kitlalpakşkej, ¹⁴pampa iminnemiliş noçi keç yolki nemi onkaj ipan inyeyşo. Yeĵua ika, yonemeçĵiĵli maka nenkuakşkej yeştlı, pampa ipan inyeyşo noçi totomeĵ niman yolkej kipiyaĵ iminnemiliş. Yeĵua ika, san akinon yeĵuan kikuak yeştlı, xkixtikaniş nemotech para xokaman nemiş nemouan.

¹⁵Tla yakaj israelita noso yeĵuan xçhaneĵ kikuak inakayo sen yolki yeĵuan san omik, noso yeĵuan okimiktıĵkej sekişimeĵ tepeyolkej tekuanimeĵ, ika onkaj kipaşak itlaken niman naltiş.

Yejua nokauas xchipauak nochi on tonajli hasta tlapoyajkan, niman kemaj nokauas chipauak nixpan. ¹⁶ Pero tla xkipakas itlaken, nion xnaltis, tla ijkon, kipiayas tlajtlakojli.”

Xakaj notekas iuan san akinon

18 ¹ ToTEKO okijli Moisés: ² “Ijkin xkimijli on israelitas: Nejua nemoTEKO Dios nikijtoua. ³ Maka nemouikaskej ken kichiuaj on tlakamej yejuan chantij Egipto kampa achtoj onenchantikej. Maka nemouikaskej ken kichiuaj on tlakamej yejuan chantij ipan on tlajli Canaán kampa nemechuikas. Nion maka nenkintlakamatiskej iminleyes. ⁴ Ika onkaj nenkitlakamatiskej nochi yejuan nejua noleyes, niman nenkitlakamatiskej nochi tlen kijtoua notlanauatiluan, pampa nejua nemoTEKO Dios nikijtoua. ⁵ Xkintlakamatikan nochi noleyes niman nochi yejuan kijtoug notlanauatiluan. On yejuan kintlakamatis kipiayas nemilistli. Nejua nemoTEKO nikijtoua.

⁶ Xakaj tlakatl uelis iuan notekas sen suatl yejuan ken kita. Nejua nemoTEKO nikijtoua. ⁷ Maka yakaj iuan notekas inanaj. Tla ijkon kichiuas, kipijpinajtis itataj, pampa yejua inanaj niman xkuajli para iuan notekas. ⁸ Maka yakaj iuan notekas itlakpanan, pampa tla ijkon kichiuas, kipijpinatis itataj.

⁹ Maka yakaj notekas iuan ikniu suatl, noso itlakpaikniu, yejuan ichpoch itataj, noso ichpoch inanaj, maski otlakat ichan noso oksekan.

¹⁰ Maka yakaj notekas iuan ixuii, yejuan ichpoch itelpoch, noso ikoneu ichpoch. Tla yakaj ijkon kichiuas, xok yakaj kitlakaitas.

¹¹ Maka yakaj notekas iuan itlakpaikniu yejuan ikoneu itlakpanan, pampa yejua ikoneu itataj, niman nochiua ikniu. ¹²⁻¹³ Maka yakaj notekas iuan itiaj yejuan ikniu itataj, noso ikniu inanaj. ¹⁴ Maka yakaj notekas iuan isiuau itioj. Tla yakaj ijkon kichiuas kipijpinajtis itioj pampa on suatl itiaj. ¹⁵ Maka yakaj notekas iuan isiuamon, pampa yejua isiuau itelpoch. Maka notekas iuan yejua. ¹⁶ Maka yakaj notekas iuan icuñada, pampa tla ijkon kichiuas, kipijpinajtis ikniu.

¹⁷ Maka yakaj notekas iuan sen suatl niman ichpoch on suatl, nion ixuii yejuan ikoneu itelpoch noso ikoneu ichpoch. Maka yakaj ijkon kichiuas pampa yejuamej san se yestli kipiayaj, niman ijkon kichiuas on tlen sanoyej nechkualania.

¹⁸ Maka yakaj tlakatl nonamiktis iuan icuñada, nion maka iuan notekas ijkuak sanken* nemi isiuau para maka notlaueletaskej on iknijtin siuamej.

¹⁹ Maka yakaj notekas iuan sen suatl ijkuak yestemoua pampa yejua xchipauak nixpan.

²⁰ Maka yakaj notekas iuan isiuau okse tlakatl para maka nijtlakos nixpan.

²¹’Maka yakaj kitemakas nion se ikoneu ken sen uentli itech on ídolo Moloc, pampa tla ijkon kichiuas, kijtlakos noYektokatsin. Nejua nemoTEKO nikijtoua.

²²’Maka yakaj notekas iuan sen tlakatl ken notekaskia iuan sen suatl, pampa on sanoyej niktlajyelita.

²³’Maka yakaj tlakatl notekas iuan sen yolki ken notekaskia iuan sen suatl, para maka yejua ika nijtlakos. Nion on suatl xuelis notekas iuan sen yolki, pampa on sanoyej niktlajyelita

²⁴’Maka xmijtlakokan ika in tlajtlamach* yejuan yonemechijli. Ijkon on tlajtlakoltlakamej yejuan nemij ipan on tlajli kampa nemechuikas kichiuaj miyek in tlajtlakoltin niman ijkon nijtlakouaj. Yejua ika, nikinkixtis nemixpan. ²⁵Niman impaís no kijtlakouaj nixpan ipampa on miyek tlajtlakojli, niman yejua ika nochi on tlakamej yejuan nemij ompa nikincastigaros niman nikinkixtis. ²⁶Pero nemejuamej yejuan nenisraelitas niman on yejuan xchanejkej yejuan nemij nemouan xchiuakan notlanauatiluan. Niman maka xchiuakan nion se de on tlajtlakojli yejuan kichiuaj on yejuan chantij ipan on tlajli, ²⁷pampa nochi in tlajtlakoltin yejuan sanoyej xkuajli okichijkej on tlakamej yejuan onenkej ipan on tlajli kampa nemechuikas. Niman on tlajli onokau ijtlakauki nixpan. ²⁸Maka nenkichiuaskej on tlajtlamach* yejuan xkuajli para xnemechkixtis ken onikinkixtij on tlakamej yejuan ompa chantiyaj achtoj de nemejuamej. ²⁹San akinon yejuan kichiuas itlaj de yejua in tlen xkuajli, xkixtikan nemotech para xokaman uelis nemis nemouan. ³⁰Yejua ika, xkintlakamatikan notlanauatiluan yejuan nemechmaka. Maka xchiuakan on uejueyi tlajtlakoltin yejuan kichiuaj on tlakamej yejuan nemij ne kampa nemechuikas. Maka xmijtlakokan ika on tlajtlakoltin. Nejua nemoTEKO Dios nikijtoua.”

Kenijki nouikaskej on israelitas ixpan Dios

19 ¹ToTEKO okijlij Moisés: ²“Ijkin xkinmijli on israelitas: Xmochipauakan nixpan, pampa nejua nemoDios niyektli.

³Cada se de nemejuamej ma kitlakaita inanaj niman itataj.

⁴Niman no xtlakaitakan on noyaxkauan tonaltin sábados.

Nejua nemoTEKO Dios nikijtoua. ⁵Maka intech xmouikakan on ídolos niman maka xkinchijchiuakan dioses de tepostli. Nejua nemoTEKO Dios nikijtoua.

⁶Ijkuak nennechmakaskej sen uentli para yoltlalilistli nejua nemoTEKO, xnechmakakan ken nejua nikneki para uelis nemechselilis. ⁷On yolki yejuan nennechmakaskej uelis nenkuaskej on tonajli ijkuak nenechmakaskej noso uajmostla. Pero tla seki nokauas on nakatl hasta ipan yeyi tonajli, xtlatikan. ⁸On nakatl xok kuajli para yakaj kikuas ipan yeyi tonajli, pampa tetlajyeloy* niman

nejua xok nikselis. ⁸Niman tla yakaj kikuas, kipi yas tlajtlakojli, niman ika onkaj nenkixtiskej nemotech para xokaman nemis nemouan, pampa okijtlakoj on tlen noyaxka* nejua nemoTEKO.

⁹Ijkuak ajsis on tonaltin para nempixkaskej ipan nemotlal, maka xpixkakan hasta tlajtlatenko, nion maka xmotijtxiukan yejuan onokau. ¹⁰Niman no maka kuajli xtejtemokan uvas ipan nemouvasyoj, nion maka xpejpenakan yejuan xixini. Xkinkauilikan yejuan mayankej niman on yejuan xchanejkej. Nejua nemoTEKO niman nemoDios.

¹¹'Maka xtlachtekikan.

'Maka xistlakatikan.

'Maka xtlakajkayauakan.

¹²'Maka xmotlajtolmakakan ika noyektokatsin ijkuak nenkijtouaj nenkichiuaskej itlaj niman nenkimatij ika xnenkichiuaskej, noso ijkuak nenkijtouaj xonenkichijkej itlaj maski melauak onenkichikej. Tla ijkon nenkichiuaskej, nenkijtlakoskej noyektokatsin. Nejua nemoTEKO nikijtoua.

¹³'Maka yakaj xchiuilikan itlaj ikan tlauejli, nion maka xkuijkuilikan itlaj tlen iyaxka.

'Maka xtetilikan itlaxtlauil sen nemotekitkau para nenkimakaskej hasta uajmostla.

¹⁴'Maka xkuijuikaltikan yakaj yejuan tsatsa. Nion maka xtlalilikan itlaj iyakapan on yejuan xtlacha para najantikisas kampa nejnemi. Xteititikan ika nenkitlakamatij nemoTEKO Dios ipampa nemotlakaitalis. Nejua nemoTEKO nikijtoua.

¹⁵'Ijkuak titekiuajkisas, kuajli xchiua motekiu melajki ken mitstokaroua. Maka tikchikoitas yejuan mayanki, nion maka tikmakajsis on yejuan ueyixtikaj. Tla nonekis, titetlajtlakolmakas noso titemanauis, xchiua ken kitocaroua.

¹⁶'Maka yakaj xtlajtolketsteuilikan.

'Maka teuan xmati para yakaj ma kimiktikan. Nejua nemoTEKO nikijtoua.

¹⁷'Maka xkipiya tlauejli ipan moyojlo itechkopa yakaj okse.

'Xkajua ijkuak kichiu on tlen xkuajli, para tejava maka teuan tikpiyas tlajtlakojli yejuan yejava kichiu.

¹⁸'Maka xtekuiepilti on tlen xkuajli mitschiuiliaj, nion maka xtepiyali tlauejli ipan moyojlo. Jej xtlajsojtla* san akinon ken tejava timotlajsojtla. Nejua nemoTEKO nikijtoua.

¹⁹'Xkintlakamatikan noleyes.

'Maka xkintlaxinacholtikan nemoyolkauan iuan oksekimej yolkej yejuan xsano yejava intlakatilis.

'Ipan nemotlatok maka xtôkakan okseki tlajtlamach* xinachtli.

'Maka xtlalikan tlakentli* yejuan tlachijchijtli ikan sesentlamantikej telas.

²⁰Tla yakaj tlakatl notekas iuan sen esclava yejuan yokijtlanka ok se tlakatl, pero sanken* teyaxka* itech iteko niman yejua ika xe nemi tlamakauajli, tla ijkon, on omemej noneki kincastigaroskej. Pero on omemej xkinmiktiskej pampa on ichpochtli sanken* esclava katka. ²¹On tlakatl ika onkaj kuajuikas nixpan nejua nemoTEKO, sen borrego itech ikalakiyan on tabernáculo* kampa nejua ninemi. On borrego kitemakas para sen uentli ipampa itlajtlakol de culpa. ²²On tiopixki kitlajtlanilis toTEKO ma kitlapopoluili itlajtlakol on tlakatl nixpan nejua nemoTEKO ika on borrego yejuan nochiuas sen uentli ipampa itlajtlakol de culpa, niman ijkon niktajpojpoluis.

²³Ijkuak nemejuamej nenkalakiskej ipan on tlajli de Canaán niman nenkintōkaskej seseknekamej kojtlakijlomej, maka nenkitekiskej nion se itlakyo ipan on achtoj yeyi xipan. ²⁴Ipan on ika naui xipan, nochi on tlakyotl nenechyaxkatiskej ika sen ueyi iluitl para nenechititiskej nemotetlajsojkamachilis. ²⁵Niman kampa ika makuijli xipan, kemaj ye nenueliskej nenkuaskej on tlakyotl, niman ijki on kojtlī* más miyek kitlakitis itlakayo. Nejua nemoTEKO Dios nikijtoua.

²⁶Maka xkuakan itlaj yejuan sanken* kipiya yestli.

'Maka xtetlatejtemouilikan, nion maka xchiuakan kanika para nenkimatiskej tlinon nochiuas sakin*.

²⁷Maka xmoyeualtekilikan nemotson, nion maka xkuayakatekikan nemotentson, ²⁸nion maka xtetekikan nemotlalnakayo ijkuak nemajmanaj ipampa yakaj yejuan yomik.

'Maka xmotlalilikan tatuajes^d ipan nemotlalnakayo. Nejua nemoTEKO nikijtoua.

²⁹Maka tiktemakas mochpoch para ma auilnemi pampa tlamo tikijtlakos. Tla ijkon tikauilis ma kichiuu, tikinmijtlakos on tlakamej ipan on país.

³⁰Nochipa xkintlakamati notlanamatiluan de on tonaltin sabádos. Nejua nemoTEKO Dios nemechnauatia.

³¹Maka xkintlakeuakan on yejuan kinnotsaj ajakamej nion yejuan tetlatejtemouiliaj. Maka xmijtlakokan nixpan impampa on yejuan ijkon kichiuaj. Tla ijkon nenkichiuaskej, mechijtlakoskej. Nejua nemoTEKO Dios nemechnauatia.

³²Xmotelketsa niman xteititi tetlakaitalistli ixpan sen ueuentsin noso lamajtsin. Xteititi tetlakaitalistli itech moDios. Nejua nemoTEKO Dios nikijtoua.

³³Ijkuak yakaj xchanej uajlas ipan nemopaís para nokauas nemouan, maka nenkichiuiliskej itlaj tlen xkuajli. ³⁴Xkitakan ken

d 19.28 Tatuaje kijtosneki tlajmachyotl yejuan kichijchiuaj ipan tetlalnakayo ikan aguja niman tlapajli.

okse israelita yeskia. Xtlajsojtlakan ken nemotlajsojtlaj, pampa nemejuamej no nennemiyaj ken xchanejkej ipan on país de Egipto. Nejua nemoTEKO Dios nikijtoua.

³⁵“Maka xtlaxpachokan. Ijkuak nenkitemachiuaj itlaj yejuan ueyak, noso nenkitemachiuaj itlaj yejuan yetik, noso yejuan miyek, nochi kuajli xtemachiuakan. ³⁶Xtekitiltikan on tlatemachiualtin niman on pesas yejuan kuajli kajxitia tlen kitemachiu. Nejua nemoTEKO Dios yejuan onemechkixtij ipan on país Egipto.

³⁷“Yejua ika, xtlakamatikan nochi noleyes niman notlanauatiluan. Xchiuakan nochi on tlen nemechnauatia. Nejua nemoTEKO Dios nikijtoua.”

Castigo para on yejuan xtetlakamati

20 ¹ToTEKO okijlij Moisés: ²“Ijkin xkinmijli on israelitas: San akinon yejuan chanti nemouan, israelita noso yejuan xchanej, tla kitemaka ikoneu ken sen uentli para on dios Moloc, ika onkaj nemejuamej israelitas nenkitemojmotlaskej hasta kaman miki. ³Nejua nikualanis itechkopa on tlakatl. Niman nikixtis intech nokoneuan israelitas, pampa ikoneu okimakak on dios Moloc. Ijkon nikchiuas pampa okijtlakoj notabernáculo, niman okijtlakoj noyekTokatsin. ⁴Tla on israelitas chanejkej ipan on tlajli xitlaj* kichiuilij on yejuan kitemaka ikoneu itech Moloc, ⁵nejua niktajtlakolmakas on tlakatl iuan nochi ifamilia. Nikinkixtis intech on nokoneuan israelitas imiuan nochimej on yejuan onijtlakojkej ika okimauistilijkej on idolo Moloc.

⁶Niman tla yakaj nijtlakoua ika kintlakeua on yejuan kinnotsaj ajakamej noso tetlatejtemouilij, tla ijkon, nikualanis itechkopa on tlakatl, niman nikixtis intech nokoneuan israelitas. ⁷Xmochipauakan nixpan, pampa nejua nemoDios niyektli. ⁸Xkintlakamatikan no leyes niman xchiuakan nochi notlanauatiluan, pampa nejua, nemoTEKO, nemechchipajkatlalia para nennoyaxkauan* yeskej.

⁹Akin kuijuikaltis itajtaj noso inanaj, ika onkaj nenkimiktiskej. Pampa okuijuikaltij itajtaj noso inanaj, yejua kipiayas tlajtlakojli niman sano yejua ipampa tla mikis.

¹⁰Tla sen tlakatl notekas iuan isiuau okse tlakatl, tla ijkon, on tlakatl niman on suatl ika onkaj nenkinmiktiskej.

¹¹Tla sen tlakatl notekas iuan isiuau itataj, tla ijkon, on tlakatl ixkoyejyeua itataj. On tlakatl niman on suatl, nenkintlajtlakolmakaskej niman nenkinmiktiskej. Yejuamej kipiayaskej tlajtlakojli niman sano yejuamej impampa tla mikiskej.

¹²Tla se tlakatl notekas iuan isiuamon, on omemej noneki nenkintlajtlakolmakaskej niman nenkinmiktiskej. Yejuamej

nijtlakoskej, niman kipiymaskej tlajtlakojli niman sano yejuamej impampa tla mikiskej.

¹³Tla sen tlakatl notekas iuan okse tlakatl ken iuan notekaskia sen suatli, tla ijkon, on omemej ika onkaj nenkinmiktiskej pampa yejuamej okichijkej on tlen sanoyej tetlajyeloy*. Yejuamej kipiymaskej tlajtlakojli niman sano yejuamej impampa tla mikiskej.

¹⁴Tla sen tlakatl kinonamiktis sen ichpochtli niman no iuan nonamitis inanaj on ichpochtli, tla ijkon, kichiuaj on tlen sanoyej xkuajli. On yeyimej ika onkaj nenkintlajtlakolmakaskej niman nenkintlatiskej yoltokej para ijkon xok onyas on kenon ueyi tlajtlakojli nemotech.

¹⁵Tla sen tlakatl iuan notekas sen yolki ken iuan notekaskia sen suatli, tla ijkon, on tlakatl niman on yolki nenkintlajtlakolmakaskej niman nenkinmiktiskej.

¹⁶Niman tla sen suatli iuan notekas sen yolki ken iuan notekaskia sen tlakatl, tla ijkon, on suatli niman on yolki nenkintlajtlakolmakaskej niman nenkinmiktiskej. Yejuamej kipiymaskej tlajtlakojli, niman sano yejuamej impampa tla mikiskej.

¹⁷Tla sen telpochtli nonamiktis iuan ikniu, noso itlakpaikniu, tla ijkon, on omemej kinkixtiskej, pampa sanoyej tepinajtij niman xkuajli ika iuan onotekak ikniu. Yejuan ijkon kichiu, ika onkaj kiselis icastigo ika on itlajtlakol.

¹⁸Tla sen tlakatl notekas iuan sen suatli ijkuak yestemoua, tla ijkon, ika onkaj on omemej nenkinkixtiskej nemotech para xokaman nemiskej nemouan, pampa on tlakatl okitak kampa ualeua iyesy on suatli, niman on suatli okitak iyesy.

¹⁹Maka iuan timotekas motiaj, yejuan ikniu monanaj noso ikniu motataj, pampa ken tikita. Tla ijkon kichiuaskej, on omemej kipiymaskej tlajtlakojli niman kiseliskej castigo.

²⁰Tla yakaj notekas iuan isiuau itioj, ixkoyejyeuas itioj. Tla ijkon kichiuaskej, on omemej kipiymaskej tlajtlakojli niman kiseliskej castigo. Xuelis kimpiyaskej inkoneuan hasta kaman mikiskej.

²¹Tla yakaj tlakatl kikuilis isiuau ikniu, tla ijkon, kichiu itlaj yejuan sanoyej xchিপauak nixpan, pampa ixkoyejyeua ikniu, niman xuelis kipiymaskej nion se inkoneu hasta ijki mikiskej.

²²Xtlakamatikan nochi noleyes niman notlanautiluan para maka mechajkixtiskej ipan on tlajli Canaán kampa nemechuikas para ipan nenchantiskej. ²³Maka nenkichiuaskej ken on tlakamej yejuan aman nemij ne ipan on tlajli kampa nikinkixtis nemixpan, pampa yejuamej kichiuaj nochi in tlajtlakoltin. Yejua ika, sanoyej nikinchihiita. ²⁴Nejua onemechprometerouilij ika nemejuamej nemoyaxka* yes on tlajli yejuan aman inyaxka. Nejua nemechmaktilis on tlajli kampa sanoyej tlatlaki niman xitlaj* poliui.

'Nejua nemoTEKO Dios yejuan omechxeloj de on oksekimej naciones. ²⁵Yejua ika, nemejuamej no xkinmixmatikan on yolkej yejuan chipajkej niman on yejuan xchipajkej, no ijki on totomej yejuan chipajkej niman on yejuan xchipajkej. Maka xmijtlakokan impampa on yolkej, on totomej, niman on yolkej yejuan noteuilanaj ipan tlajli. Nejua yonikinxeloj on yolkej yejuan xchipajkej niman xkuajli nenkinkuaskej. ²⁶Xmochipauakan nixpan, pampa nejua nemoTEKO niyektli. Onemechxeloj de on oksekimej naciones para nemochiuaskej noyaxkauan.

²⁷'Nochi tlakatl noso suatl yejuan kinnotsas ajacamej noso tetlatejtemouilis, xkintemojmotlakan hasta kaman ma mikikan. Yejuamej kipiwaskej tlajtlakojli niman sano yejuamej impampa tla mikiskej."

Planauatiltin para kenijki nouikaskej on tiopixkej

21 ¹ToTEKO okijlij Moisés: "Xkinmijli on tiopixkej yejuan ikoneuan Aarón, maka kimatokaskej imikatlalnakayo yakaj ichanejkau, pampa on kinmijtlakos nixpan. ²Pero kemaj, uelis kimatokaskej sen mikatsintli yejuan ken kitaj nisiu, kenon sen nantli noso tajtli, noso inkoneu yejuan tlakatl, noso suatl, inmikniu yejuan tlakatl, ³noso sen ikniu suatl yejuan sanken* nemi intech pampa xe nonamiktia. Impampa yejuamej, kemaj uelis kimatokaskej niman nochiua xchipauak. ⁴Pero xuelis kimatoka niman nijtlakos ipampa imikatlalnakayo yakaj yejuan ken kita isiau.

⁵'On tiopixkej xuelis nokuatexikaloskej, nion xuelis notentsonximaskej, nion notetekiskej ipan imintlalnakayo ijkuak yakaj miki para kiteititiskej ika najmanaj. ⁶Yej ma nochipauakan nixpan nejua iminDios, niman maka kijtlakoskej noyekTokatsin, pampa yejuamej nechmakaj on uentli yejuan nochi tlatla niman on tlakuajli yejuan noyaxka. Yejua ika, noneki on tiopixkej ma yeknemikan.

⁷'No xuelis nonamiktis iuan sen suatl yejuan nonamaka para auilnemi, nion suatl yejuan san kichiualtiaj teuan ma noteka, noso yejuan onoxotonij iuan iueuentsin, pampa on tiopixkej tlatiochijtin notech nejua, iminDios. ⁸On tlakamej ma kintlakaitakan on tiopixkej. Yejuamej yektlakamej* pampa yejuamej nechmakaj on uentli de tlakuajli yejuan tlatla. Nejua nemoTEKO niyektli, niman nejua nemechchipaua nixpan.

⁹'Tla ichpoch sen tiopixki nonamaka para auilnemi, yejua kipijpinajtia niman ixkoyejyeua itataj. Ika onkaj nenkitlatiskej yoltikaj.

¹⁰'On ueyi tlayekanki tiopixki yejuan okikuatêkijkej ika on aceite, niman ijkon okitiochijkej para uelis kitlalis on

tiopixkatlakentli* yejuan tlatiochijtlí. Ijkuak kipiýas sen ajmantli, xuelis para nokuatepajsolos, nion kitsayanas itlaken ken kichiuaj sekimej ijkuak najmanaj. ¹¹Niman no xuelis kalakis kampa nemi sen mikatsintli pampa yejua ika nijtlakos maski tla de inanaj noso de itataj. ¹²Niman xuelis kisas de ipan on tabernáculo* para yas kampa mikapan, pampa kijtlakos on tabernáculo* pampa yejua okikuatêkijkej ika on aceite yejuan tlatiochijtlí. Nejua nemoTEKO nikijtoua.

¹³'On ueyi tlayekanki tiopixki ika onkaj nonamiktis iuan sen ichpochtli yejuan xekaman noteka iuan yakaj tlakatl. ¹⁴Xuelis nonamiktis iuan sen siuatl yejuan kaualtsintli, noso yejuan onoxotonij iuan iueuentsin, noso yejuan yakaj tlakatl san okichiualtij iuan onotekak, noso yejuan nonamaka para auilnemi. Ika onkaj nonamiktis iuan se yejuan ichpochtli yejuan xkaman onotekak iuan sen tlakatl, niman yejuan no ken teita intech on Levitas, ¹⁵para maka kinmijtlakos iuejkakoneuan.

Nejua nemoTEKO yejuan nikchipaua on ueyi tlayekanki tiopixki.”

Sen tlakatl yejuan xuelis tiopixki yes

¹⁶ToTEKO okijli Moisés: ¹⁷“Xkijli Aarón in tlanauatijli: Aman niman para nochipa, nion sen mouejkakoneu yejuan kipiýas itlaj tlakokojli* ipan itlalnakayo xuelis nechnisuiis para nechmakas on uentli de pan nejua, nemoDios. ¹⁸Nion sen tlakatl yejuan kipiya itlaj tlakokojli* ipan itlalnakayo xuelis kichiuas notekiu. Tla xtlacha, koxo, tilikichtik* ipan iyak, noso ipan inakas, ¹⁹ikxi nekuiltik, noso makopiltik, ²⁰noso tlakapantepotsotsin, noso tla tetsokotsin, noso ixtenextik, noso sauati, noso tsotsoti, noso eunuco*, xuelis kichiuas notekiu. ²¹Nion se iuejkakoneu* on tiopixki Aarón, xuelis nechmakas sen uentli ipan tlítl tla xajsitikaj* ipan itlalnakayo. Nion xuelis nechmakas on pan yejuan noyaxka* nejua nemoDios. ²²Pero yejua uelis kikuas on pan yejuan kisa itech on uentli, on tlakuajli yejuan tlatiochijtlí, noso yejuan más tlatiochijtlí. ²³Pero xuelis onkalakis kampa pilkak on yekcortina nion xuelis yas ne tlaixpan* kampa kintlatiaj on yolkej pampa xajsitikaj ipan itlalnakayo. Melauak xuelis kichiuas notekiu para maka kijtlakos notlayekkan. Nejua, nemoTEKO, yejuan nikinyektlalia on tlajtlamach*.”

²⁴Nochi in tlanauatiltin Moisés okinmijlij Aarón, itelpochuan niman nochimej on israelitas.

Tlanauatiltin para on yejuan ueliskej kikuaskej tlajtlamach* yejuan tlatiochijtlí

22 ¹ToTEKO okijlij Moisés: ²“Xkinmijli Aarón niman itelpochuan ma kimaluikan on tlajtlamach* uentli

tlatiochijtlí yejuan nechmakaj on israelitas, para maka san kajauilmatiskej noyektokatsin. Nejua nemoTEKO nikijtousa.

³Xkinmijli on tiopixkej tla yakaj de nemouejkakoneuan yejuan xchipauak nixpan, niman kinisiuiya on uentli tlatiochijtlí yejuan nechmakaj on israelitas, ika onkaj nenkixtiskej niman ijkon xokaman uelis nemis nixpan. In tlanautijli yes para mokoneuan yejuan aman nemij, niman no yejuan nemiskej sakín*. Nejua nemoTEKO nikijtousa.

⁴Nion se itelpoch noso iuejkekoneu* Aarón yejuan kipiya on kokolistli itoka lepra, noso ixika kampa tlapiasoua, xuelis kikuas on uentli yejuan tlatiochijtlí. Pero ijkuak yonochipau, kemaj uelis kikuas.

⁵No ijki, nokauas xchipauak yakaj tiopixki yejuan kimatokas itlaj yejuan okiteloj sen mikatsintli, noso tla kimatokas yakaj yejuan kijneua ixinachyo, ⁶noso kimatokas sen yolki yejuan noteuilana ipan tlajli, noso kimatokas sen tlakatl yejuan xchipauak. ⁷On tiopixki xchipauak yes nixpan nochi on tonajli hasta tlapoyajkan, niman xuelis kikuas on tlakuajli tlatiochijtlí hasta tla yonaltij. ⁸Kemaj ijkuak tlapoyajkan nokauas chipauak. Ijkuakon, kemaj uelis kikuas on uentli yejuan tlatiochijtlí pampa on yejua itlakual. ⁹Sen tiopixki xuelis kikuas inakayo sen yolki yejuan san omik, noso yejuan okimiktijkej sekimej yolkej, pampa tla kikuas xok chipauak yes nixpan. Nejua nemoTEKO nikijtousa. ¹⁰Xkinmijli on tiopixkej ma kintlakamatikan nochi in tlanauatiltin niman ijki xkipiyaskej tlajtlakojli, niman ijkon xmikiskej. Nejua ninemoTEKO yejuan yoninchipau.

¹¹Nochi tlakatl yejuan xtiopixki xuelis kikuas de on uentli yejuan tlatiochijtlí. Nion on yejuan tenotsketl ichan on tiopixki noso yejuan tlakeuajli, xueliskej kikuaskej on tlin tlatiochijtlí. ¹²Pero tla on tiopixki kouas sen esclavo, noso on esclavo tlakati ichan on tiopixki, yejua kemaj uelis kikuas on uentli yejuan tlatiochijtlí. ¹³Tla ichpoch sen tiopixki nonamiktis iuan sen tlakatl yejuan xtiopixki, tla ijkon, xok uelis kikuas on uentli tlatiochijtlí yejuan kiminmakaj on tiopixkej. ¹⁴Pero tla kaualtis noso noxotonis iuan iueuentsin, niman xkimpíya ikoneuan, niman oksejpa nokuepas ichan itataj yejuan tiopixki, tla ijkon, on siuatl oksejpa uelis kikuas on tlakuajli ken ijkuak xe teuan nemiya. Pero para nochi tlakatl yejuan xken kita sen tiopixki xuelis kikuas on tlakuajli.

¹⁵Tla yakaj nopopolos niman kikuas on uentli yejuan tlatiochijtlí, tla ijkon, noneki kuepilis on tiopixki ichkich kech okikuaj, niman kimakas okse 20 por ciento más. ¹⁶Pero on tiopixkej noneki xkinkauiliskej on israelitas ma kijtlakokan on uentli yejuan nechmakaj nejua nemoTEKO, ¹⁷pampa tla yakaj

xkitlakamatis in tlanauatijli, kipiayas tlajtlakojli niman ika onkaj kiselis icastigo. Nejua nemoTEKO akin yoniktiochiu nochi on uentli”.

Katlejua yolkej kitemakaskej para uentli

¹⁷ToTEKO okijlij Moisés: ¹⁸“Xnotsa Aarón niman itelpochuan iuan nochimej on israelitas niman ijkin xkinmijli: Ijkuak yakaj israelita noso yejuan xchanej kinekis nechmakas nejua nemoTEKO sen uentli yejuan tlatlas yejuan okiprometeroj ikatlakajtli ika kichiuas para nejua, noso san pampa kipiya paktli yejua ika kineki nechmakas on uentli, ¹⁹noneki kuajuikas sen yolki yejuan okichtli yejuan xkanaj tlakokojli* ipan itlakayo para uelis nikselilis. Uelis kuajuikas sen uakax, sen borrego noso sen chivo. ²⁰Pero maka kuajuikas sen yolki yejuan tlakokojli* ipan itlakayo, pampa nejua xnikselilis.

²¹”Tla yakaj kinekis nechmakas, nejua nemoTEKO, sen uentli para nechyoltlalis pampa ijki onotlatolmakak nixpan ikatlakajtli, noso san pampa kipiya paktli nechmakas sen uentli, tla ijkon, nechmakas sen uakax, noso sen borrego, yejuan xkanaj tlakokojli* ipan itlakayo para uelis nikselis. ²²Maka xnechmakakan nejua, nemoTEKO, yolkej yejuan xtlachaj, noso tlakokoltin, noso metskojyopostekkej, noso mapostekkej, noso kipiayaj tsotsomej yejuan temalkisaj, noso sauayojkej, noso kipiayaj itlaj okse kokolistin. Kenin yolkej maka kaman xnechmakakan para sen uentli yejuan tlatlas, niman yejuan kiuentlaliaj ipan notlaixpan* nejua nemoTEKO. ²³Pero tla nenkipiyaj sen okichuakax, noso sen borreguito yejuan kipiya ikxiuan chijchikotikej, tla ijkon, kemaj uelis nennechmakaskej ken sen uentli yejuan san nenkixtiaj ipan nemoyojlo. Pero in kenin yolki xuelis nennechmakaskej para sen uentli yejua ika nenkitlaxtlauaskej itlaj tlajtolmakalistli nixpan. ²⁴Ijkuak nemajsiskej ipan nemotlal, nenkintlakamatiskej in tlanauatiltin. Xuelis nennechmakaskej nejua nemoTEKO sen yolki yejuan tlakokojli* ipan ixiteuan, noso okintekilijkej, noso okixiteuitekkej. ²⁵No maka nenkinkauiliskej on yejuan xchanejkej ma kinuajuikakan kenin yolkej para uentli ken tlakuajli para nejua nemoDios, pampa on yolkej yejuan tlakokoltin ipan intlakayo nejua xnikinselis.”

Kenijki kinmiktiskej on yolkej yejuan para uentli

²⁶ToTEKO okijlij Moisés: ²⁷“Ijkuak tlakatis sen becerro, sen borreguito, noso sen chivito, noneki nokauas iuan inanaj chikome tonajli. Pero ijkuak kipiayas chikueyi tonajli, ye uelis nenkitekiltiskej para sen uentli yejuan nenkitlatiskej para

nejua nemoTEKO. ²⁸Sa no ipan on tonajli maka nenkimiktiskej sen vaca niman ikoneu, noso sen borrega niman ikoneu.

²⁹Ijkuak nenechmakaskej sen uentli para tlajsojkatamistli, nenechmakaskej ken nejua nikneki para uelis nemechselilis.

³⁰Noneki nenkikuaskej sa no ipan on tonajli ijkuak nenechmakaskej. Xuelis nenkauaskej achijtsin para uajmostla. Nejua nemoTEKO nemechijlia.

³¹Xkintlakamatikan notlanauatilan. Xchiuakan nochi yejuan nemechnauatia. Nejua nemoTEKO nemechijlia. ³²Maka xkijtlakokan noyektokatsin. Noneki nochimej on israelitas kimatiskej ika niyektli. Nejua ninemoTEKO akin nemechtiochia, ³³niman onemechkixtij Egipto para ninochiua nemoDios. Nejua nemoTEKO nemechijlia.”

On iluimej niman on tonajli para noseuiskej

(Nm 28.16-25)

23 ¹ToTEKO okijlij Moisés: ²“Ijkin xkinmijli on israelitas:

In yejua on tonaltin yejuan noneki nenkauaskej san para nejua nemoTEKO para nenkichiuaskej iluimej, niman ipan on tonaltin nemosentlaliskej san sekan ikan miyek paktli para nenechmauistiliskej. In yejua on tonaltin:

³Chikuasen tonajli nentekitiskej, pero ipan on ika chikome tonajli, xnenkichiuaskej itlaj tekitl. On tonajli yes san para nemosentlaliskej ikan miyek paktli para nenechmauistiliskej. San kanon kampa nenchantiskej on tonajli yes de neseujli para nenechtlakaitaskej, nejua nemoTEKO. ⁴In yejua on tonaltin yejuan noneki nenkauaskej para nenkichiuaskej iluimej kampa nemosentlaliskej ikan miyek paktli para nenechmauistiliskej. Ijkon tej, nenechtlakaitaskej, nejua nemoTEKO.

On iluitl de Pascua

⁵On iluitl Pascua nenkichiuaskej ijkuak tlapoyajkan ipan on 14 tonajli de on achtoj metstli de on tonalamatl Hebreo para nenechtlakaitaskej, nejua nemoTEKO. ⁶Ipan on tonajli 15 de on metstli, nempeuaskej nenkichiuaskej on iluitl de on pan yejuan xkipiya tlaxokolilistli* para nenechtlakaitaskej nejua nemoTEKO. Chikome tonajli nenkikuaskej pan yejuan xkipiya tlaxokolilistli*. ⁷Ipan on achtoj tonajli de on iluitl nemejuamej nemosentlaliskej ikan miyek paktli para nenechmauistiliskej niman ipan on tonajli xnenkichiuaskej nion sen tekitl. ⁸Nochi on chikome tonajli nenechmakaskej uentli yejuan nochi tlatla para nejua nemoTEKO. Niman kampa ika chikome tonajli, oksejpa nemosentlaliskej ikan miyek paktli para nenechmauistiliskej, niman ipan on tonajli xnenkichiuaskej nion sen tekitl.”

On iluitl de on achtoj pixkilstli

(Nm 28.26-31)

⁹ToTEKO okijlij Moisés: ¹⁰“Xkinmijli on israelitas in tlanauatiltin: Ijkuak yonemajsikej ipan on tlajli yejuan nemechmakas niman nenkipixkaskej nemotriego, noneki nenkiktiskej itech on tiopixki on achtoj tlasalojli de triego yejuan nenkitekaskej. ¹¹Uajmostla ijkuak yopanok on tonajli de neseuijli, on tiopixki nechixpantilis on tlasalojli de triego, niman koolinis yolik nixpan nejua nemoTEKO, para nejua nemechselilis. ¹²Niman sano ipan on tonajli ijkuak nennechmakaskej on tlasalojli de triego, no nennechmakaskej sen borrego yejuan se xijkayotl niman xkanaj tlakokojli* ipan itlakayo ken sen uentli yejuan nochi tlatla para nejua nemoTEKO. ¹³Niman no nenkuajkiskej naui kilo uan tlajko harina yejuan más kuajli niman yejuan tlanelojli iuan aceite, para nennechmakaskej nejua nemoTEKO ken sen uentli yejuan nochi tlatla niman yejuan ijnekuistis ajuiyak. No ijki, noneki nennechmakaskej se litro vino para sen uentli yejuan nenkitekaskej nixpan. ¹⁴Xuelis nenkikuaskej pan nion triego yejuan tliuaki, nion yejuan xoxojki, hasta ijkuak yonennechajkuilijkej on uentli, nejua nemoTEKO. In sen ley yejuan nochipa onyas para nochimej on tatajtin niman iminuejkakonenuan. Nenkitlakamatiskej san kanon nennemiskej.

On iluitl itoka Pentecostés*

¹⁵Tla yopanok on sábadó ijkuak onenkuajkikej on tlasalojli de triego ken uentli yejuan tlaoolinjili, uajmostla peuas nenkipouajskej chikome semana. ¹⁶Noso uelis nenkipouaskej 50 tonajli noso chikome sábados. Ijkuakon kuajkiskej okse uentli de triego yejuan yenkuik para nejua nemoTEKO. ¹⁷Nenkuajkiskej ome pan desde kampa nenchantij para sen uentli yejuan kooliniskej nixpan nejua nemoTEKO. On pan nenkichijchiuaskej ika naui kilo harina yejuan más kuajli niman kipiayas tloxokolilistli*. In yejua nochiuas sen uentli de on achtoj pixkilstli para nennechmakaskej nejua nemoTEKO. ¹⁸Niman san sekan iuan on pan, no nenkuajuikaskej chikome borreguitos se xijkayomej niman yejuan xkanaj tlakokoltin ipan intlakayo, sen becerro niman ome borrego para uentli yejuan nochi tlatla para nejua nemoTEKO. On uentli yejuan nochi tlatla, niman on uentli de harina, niman on uentli de vino, nochiuas sen uentli yejuan sanoyej ajuiyak, niman nejua nechypaktis. ¹⁹No nennechmakaskej sen chivo para sen uentli yejuan notemaka ipampa on tlajtlakojli, niman ome borreguito yejuan se xijkayomej ken uentli para yoltlalilistli. ²⁰On tiopixki kinuentlalis on ome borreguito para sen uentli yejuan kooliniaj nixpan, nejua nemoTEKO san sekan iuan on pan de on achtoj pixkilstli. In uentli

nechuentlaliliskej nejua nemoTEKO, niman kemaj nenkimakaskej on tiopixki.

²¹ 'Sano ipan on tonajli nemosentlaliskej ikan miyek paktli para nennechmauistiliskej. Xuelis nenkichiuaskej nion se tekittl ipan on tonajli. In sen ley yejuan nochipa onyas para nochimej on tatajtin niman iminuejkakoneuan. Nenkitlakamatiskej san kanon nennemiskej.

²² 'Ijkuak nempixkaskej ipan nemotlal, maka nenkipixkaskej hasta tlajtlatenko, nion maka nenkipejpenaskej yejuan tepejtok ipan tlajli. On xkauakan para ma kipejpenakan yejuan mayankej niman yejuan xchanejkej. Nejua nemoTEKO niman nemoDios."

On iluitl ijkuak kimpitsaj tlapitsaltin

(Nm 29.1-6)

²³ ToTEKO okijlij Moisés: ²⁴ "Ijkin xkinmijli on israelitas: On achtoj tonajli ipan on chikome metstli, nenkelnamikiskej ken sen yektonajli ijkuak noseuiloyan. Niman ipan on tonajli nemosentlaliskej ikan miyek paktli para nennechmauistiliskej ijkuak kimpitsaskej on tlapitsaltin para kinnotsaskej ipan on iluitl. ²⁵ Ipan on tonajli xitlaj* tekittl nenkichiuaskej, niman nenechmakaskej nejua nemoTEKO sen uentli yejuan nochi tlatla."

On tonajli ijkuak notlapojpoluiya tlajtlakojli

(Nm 29.7-11)

²⁶ No ijki, toTEKO okijlij Moisés: ²⁷ "Ipan on majtlaktli tonajli de on chikome metstli, onyas on Tetlapojpoluiltonajli. Ipan in tonajli nemosentlaliskej ikan miyek paktli para nennechmauistiliskej, nemosauaskej, niman nemokneliskej ipampa nemotlajtlakoluan. Niman nennechmakaskej sen uentli yejuan tlatlas ipan tlitl nixpan nejua nemoTEKO. ²⁸ Ipan on tonajli xnenkichiuaskej nion sen tekittl, pampa on yes Tetlapojpoluiltonajli ijkuak nenkiseliskej tlapojpoluijli nixpan nejua nemoTEKO Dios. ²⁹ San akinon yejuan xnosauas ipan on tonajli, ika onkaj kixtiskej intech on israelitas. ³⁰ Niman san akinon yejuan kichiuas itlaj tekittl ipan on tonajli, nejua nikpopolos intsajlan on israelitas.

³¹ 'Maka xchiuakan nion sen tekittl. In sen ley yejuan nochipa onyas para nochimej on tatajtin niman iminuejkakoneuan. Nenkitlamatiskej san kanon nennemiskej. ³² In yejua nochiuas sen tonajli ijkuak noseuiloyan, niman nemosauaskej niman nemokneliskej nixpan ipampa nemotlajtlakoluan. In Tetlapojpoluiltonajli peuas tlapoyajkan ipan on chiknauil tonajli de on metstli niman tlamis hasta uajmostla tlapoyajkan."

On iluitl ijkuak kinchijchiusaskej kalmatsitsimej

(Nm 29.12-40)

³³ ToTEKO okijlij Moisés: ³⁴ "Ijkin xkinmijli on israelitas: Ipan on kaxtojli* tonajli de on ika chikome metstli, chikome

tonajli nenkichiugaskej iluitl de on kalmatsitsimej para nejua nemoTEKO. ³⁵Ipan on achtoj tonajli de on chikome tonajli, nemosentlaliskej ikan miyek paktli para nennechmauistiliskej. Maka nenkichiugaskej nion sen tekintl ipan on tonajli. ³⁶Nochi on chikome tonajli, nennechmakaskej sen uentli yejuan tlatlas para nennechtlakaitaskej nejua nemoTEKO. Niman no ipan on chikueyi tonajli nemosentlaliskej ikan miyek paktli para nennechmauistiliskej, nejua nemoTEKO. Ipan in tonajli de iluitl maka nenkichiugaskej nion sen tekintl.

³⁷In yejua on tonaltin uejueyixtokej ijkuak nemosentlaliskej ikan miyek paktli para nennechmauistiliskej. Ipan in tonaltin nennechmakaskej miyek uentli para nejua nemoTEKO. Nennechmakaskej uentli de yolkej yejuan tlatlaskej, niman uentli de trigo niman cebada, niman okseki uentli, niman uentli de vino. Cada se uentli nennechmakaskej ipan on tonajli ijkuak kitocaroua. ³⁸Nochi in miyek uentli nochiuaskej aparte de on okseki uentli yejuan nennechmakaskej nejua nemoTEKO cada sábadó. Niman no nenkuajkiskej aparte on okseki uentli yejuan nennechmakaskej ken tetlayokolijli*, noso yejuan onenkiprometerojkej nixpan ika nennechmakaskej, noso san katlejua yejuan san nenkixtiaj ipan nemoyojlo para nennechmakaskej.

³⁹Ipan on xaxtojli* tonajli de on ika chikome metstli, ijkuak nemejuamej yonempixkakej, neniluichiuaskej chikome tonajli para nejua nemoTEKO. Niman nemosuiskej ipan on achtoj tonajli, niman ipan on chikueyi tonajli. ⁴⁰Ipan on achtoj tonajli, nenkitekiskej itlakyo on kojtlakijlomej yejuan más kuajkualtin, inmasoyayo palmeras, niman kuamatli de on kojtin* yejuan kipiayaj ixojyo, niman kuamatli de auexotl yejuan noskaltia itenko atl. Niman ipan in chikomej tonaltin nenkiktiskej ipan nemomauan ikan miyek pakilistli nixpan nejua nemoTEKO Dios. ⁴¹Cada xipan nenkichiugaskej in iluitl chikome tonajli ipan on ika chikome metstli para nejua. In sen ley yejuan nochipa onyas para nochimej on tatajtin niman iminuejkekoneuan. ⁴²Nochi on chikome tonajli nemochimej* nemejuamej yejuan nenisraelitas nenchantiskej ipan on kalmatsitsimej, ⁴³para ijki nochimej nemouejkakoneuan ma kimatikan ika ijkuak nejua onikinkixtij nemouejkatajuan ipan on país Egipto, onikinchantij ipan kalmatsitsimej. Nejua nemoTEKO Dios nikijtoua.”

⁴⁴Moisés ijkin okinmijlij on israelitas de on tonaltin para iluimej yejuan ika kitlaluichiuiliskej toTEKO.

On aceite para on tlauiltin ipan on tabernáculo

(Ex 27.20-21)

24 ¹ToTEKO okijlij Moisés: ²“Xkinuauati on israelitas ma mitsajkuilikan aceite de oliva yejuan chipauak niman

más kuajli para on tlauiltin nochipa ma tlikuitiakan ipan on tabernáculo. ³Aarón kalakis ipan on tabernáculo* kampa nejua ninemi ne ikuitlapan on yekcortina kampa onkaj on yekcaja. Ne Tlayekkan ixpan on yekcortina, itech on lámpara, Aarón ompa tekitis. Ompa kintlatlajtlalilis on tlauiltsitsimej de on lámpara para ijkon tlikuitiaskej nochi tlayoua nixpan nejua nemoTEKO. In sen ley yejuan nochipa onyas para nochimej on tatajtin niman iminuejkakoneuan. ⁴Kintlatlajtlalilis on tlauiltsitsimej de on lámpara yejuan nochi de oro para nochipa tlikuitiaskej nixpan nejua nemoTEKO.

On pan yejuan kiteititia ika toTEKO nemi touan

⁵Xkuikan on harina yejuan más kuajli niman xkikxitikan majtlaktli uan ome pan yejuan cada se yetik yes naui kilo. ⁶Niman kemaj xkintlalikan ipan on mesa yejuan nochi de oro. Xkintlalikan nixpan nejua nemoTEKO, ipan ome tlatekpantli de chichikuasen pan ipan cada tlatekpantli. ⁷Xtlalikan ipan cada tlatekpantli de on pan, achitsin kopajli yejuan sanoyej kuajli. In kopajli nochias sen uentli yejuan tlatlas ipan on tlaixpan* para ika nennechelnamikiskej, niman ika nennechtlakaitaskej nejua nemoTEKO. ⁸In pan noneki nenkitlaliskej nixpan nejua nemoTEKO ipan cada sábadó ken sen pacto* yejuan xkaman poliuis, yejuan on israelitas nochimej nouan kichiuaj. ⁹On pan inyaxka yes Aarón niman iuejkakoneuan para intlakual yejuan kuaskej. Yejuamej kikuaskej kampa tlayekkan, pampa in sen uentli yejuan más tlatiochijtlí de nochi uentli yejuan tlatla niman yejuan nechmakaj para nechtlakaitaj. Niman nejua nemoTEKO nikinmaka para ma kikuakan on tiopixkej para nochipa.”

Castigo para on yejuan kuijuikaltia Dios

¹⁰⁻¹¹Intech on israelitas nemiya sen telpochtli yejuan inanaj israelita katka, niman itataj katka sen Egipcio. Inanaj itoka katka Selomit, yejuan ichpoch katka Dibri yejuan kisa itech iuekakoneuan Dan. In telpochtli niman okse tlakatl israelita onokualanijkej ipan on campamento. Niman ijkuak nokualaniyaj, itelpoch on israelita okuijuikaltij toTEKO. Kemaj on israelitas okuikakej ixpan Moisés. ¹²Niman on telpochtli okitsakukej chika okichixkej toTEKO ma kimijli tlinon kichiuaskej iuan.

¹³Niman toTEKO okinots Moisés niman okijlij: ¹⁴“Xkixti ipan on campamento on yejuan onechuijuikaltij. Niman on yejuan okakkej ijkuak onechuijuikaltij, ma kintlalikan inmauan ipan itsontekon para kiteititiskej ika on telpochtli kipiya tlajtlakojli. Kemaj nochimej on israelitas ma kitemojmotlakan hasta kaman

miki. ¹⁵Niman nochimej on israelitas ijkin xkinmijli: “Tla yakaj nechuijuikaltia nejua nemoTEKO Dios, ika onkaj mikis. ¹⁶Nochimej on israelitas san sekan kitemojmotlaskej. In tlanauatijli yes para on israelitas, niman para san akinon yejuan xchanej. Tla yakaj nechuijuikaltia, ika onkaj nenkimiktiskej.

¹⁷No ijki, tla sen tlakatl kimiktis yakaj, on tlakatl yejuan otemiktij ika onkaj no nenkimiktiskej.

¹⁸Akin kimiktis sen yolki yejuan teyaxka, ika onkaj kitekuepilis. Se yolki notekuepilis ika okse yolki yejuan sa no ijki.

¹⁹Tla yakaj kokos sen ichanejkau, ika onkaj no sano ijki nenkokoskej. ²⁰Tla yakaj kipostekilis yakaj iomiyo, tla ijkon, no noneki nenkipostekiliskej iomiyo. Noso tla se kixtoponaltis yakaj, tla ijkon, no nenkixtoponaltiskej. Noso tla yakaj tetlanteyopeuas, tla ijkon, no nenkitlanteyopeuaskej. Ijkon ken se kitechiuilis itlaj xkuajli, no ijki nenkichiuiliskej.

²¹Akin kimiktis sen teyolkau, ika onkaj kitekuepilis. Pero yejuan kimiktis sen tlakatl, yejua no xmiktikan.

²²In san no yejua sen ley yes para nochimej on israelitas niman yejuan xchanejkej. Nejua nemoTEKO Dios nikijtoua.”

²³Ijkuak Moisés ijkon yokiminnots on israelitas, yejuamej okixtijkej ipan on campamento on telpochtli yejuan okuijuikaltij Dios, niman ompa okitemojmotlakej hasta kaman omik. Ijkon tej, on israelitas okichijkej nochi ken toTEKO okinauatij Moisés.

On xipan ijkuak noseuis on tlajli

25 ¹Ijkuak Moisés sanken* nemiya ipan on tepetl Sinaí, toTEKO okijlij: ²“Ijkin xkinmijli on israelitas: Ijkuak nemejuamej nemajsiskej ipan on tlajli yejuan nemechmakas, on tlajli noneki noseuis se xipan cada chikome xipan. Niman ijkon nennechititiskej ika on tlajli noyaxka* nejua, nemoTEKO. ³Chikuasen xipan uelis nentlatôkaskej ipan nemotlal, niman nenkinmaxiniskej nemouvasyoj, niman nenkitekiskej itlakyo. ⁴Pero ijkuak ajsis on ika chikome xipan, on tlajli noseuis se xipan para nejua nemoTEKO, niman ijkon nenkiteititiskej ika nennechtlakaitaj. Maka xtôkakan itlaj xinachtli ipan on xipan, nion maka xmaxinikan on uvasyoj. ⁵Niman no maka nenkitekiskej on trigo yejuan ixuas san iselti ipan nemotlal yejuan tlakis sakin*, ijkuak yonenkipixkakaj ipan on sa ika nochi xipan. Nion maka nenkitekiskej itlakyo on uvasyoj yejuan xonenkimaxiniykej. Maka ijkon nenkichiugaskej pampa ipan on xipan, on tlajli noneki kuajli noseuis. ⁶On tlen ixuas iselti ipan nemotlal de on xipan ijkuak on tlajli noseuiya mechajxilil para nentlakuaskej nemejuamej, niman nemoesclavos, niman on tekitekej, niman on xchanejkej yejuan chantij nemouan, ⁷niman

nemoyolkauan, niman on tepeyolkej yejuan nemij ipan on tlajli. Nochi tlen kitlakitis on tlajli para nemotlakual yes.

⁸Noneki nenkipouaskej 49 xipan, ⁹niman ipan on majtlaktli tonajli de on chikome metstli, nochiiuyan ipan on tlajli de Israel kimpitsaskej kuakuautlapitsaltin ipan on Tetlapojpoluiltonajli. ¹⁰Ipan on 50 xipan nochiuas tlatiochijtli. Ipan on xipan noneki nochimej kinmakaskej tlamakaualistli para nochimej yejuan chantij ipan on páfs. On xipan nochiuas sen xipan ijkuak nochimej yejuan esclavos nokauaskej tlamakaualtin. Nochimej on tlakamej yejuan okinamakakaj imintlal, on tlajli oksejpa inyaxka yes, noso inyaxka yes iminfamilia. ¹¹Ipan on xipan 50 nochiuas para nemejuamej sen xipan de tlamakaualistli. Ipan on xipan maka nentlatokaskej, nion maka nenkipixkaskej itlakyo on tlen oixuak iselti, nion itlakyo on uvasyoj yejuan xonenkimaxiniijke, ¹²pampa on xipan yektli yes, niman de tlamakaualistli para nemejuamej. Ipan on xipan nenkuaskej itlakyo on tlen san iselti ixuas ipan on tlajli.

¹³Ipan on xipan de tlamakaualistli, nemochimej* nemejuamej oksejpa nenkimoyaxkatiskej nemotlalan yejuan onenkinamakakaj. ¹⁴Tla yakaj nenkouiliaj noso nenkinamakiltiaj sen tlajli, maka itlaj ika nenkajkayauaskej. ¹⁵Yejuan kouas itlaj tlajli, san kitlaxtlauas on keski xipan poliui ika ajsis on xipan de tlamakaualistli. Niman yejuan kinamakas ijtlal tlajli, noneki kitlaxtlauliskej sa yejua on keski xipan poliui para ajsis on xipan de tlamakaualistli. ¹⁶Tla poliui miyek xipan para ajsis on xipan de tlamakaualistli, tla ijkon, más patioj nenkinamakaskej on tlajli. Pero tla sa keski xipan poliui para nemotlal oksejpa nochiuas nemoyaxka*, xok patioj nenkinamakaskej. In kijtosneki on tlajli nonamaka noso nokoua san on keski xipan poliui nopixkas on tlajli chika ajsi on xipan de tlamakaualistli.

¹⁷Maka yakaj ika xmauiltikan, yej xnechtlakaitakan nejua nemoDios, pampa nejua ninemoTEKO Dios. ¹⁸Xkintlakamatikan noleyes niman notlanauatiluan. Tla nenkintlakamatij kuajli, nennemiskej xikan nemojtijli ipan nemopáfs, ¹⁹niman on tlajli sanoyej kuajli tlatlakitis, niman nenkikuaskej itlakyo hasta nemixuiskej kuajli, niman nennemiskej xikan nemojtijli ipan nemopáfs.

²⁰Pero uelis nemotlajtoltiskej ijkin: Ipan on ika chikomej xipan, ¿tlinon tikuaskej tla xok uelis titokaskej, nion tipixkaskej? ²¹Nejua niktitlanis miyek notlatiochialis ipan on ika chikuasen xipan, yejua ika, on yejuan nenkipixkaskej ipan on xipan, mechajxilis nenkikuaskej hasta okse yeyi xipan. ²²Ijkon nenkuaskej on tlakyotl yejuan onenkejejeje hasta kaman nentokaj oksejpa ipan chikueyi xipan. Hasta ipan ika chiknau i xipan uelis nenkuaskej

on tlakyotl chika ajsi on tonajli para pixkilistli. Niman mechajxilil para nemopanoltiskej.

Sen tlakatl oksejpa uelis kouas itlal yejuan okinamakaka

²³'On tlajli xuelis nenkinamakaskej nion yakaj kinoyaxkatis* para nochipa pampa on tlajli nejua noyaxka. Nemejuamej san onemajsikoj niman ken san nemechtlanejtia on tlajli ken nennotenotskauan. ²⁴Yejua ika, ijkuak nenkinamakaj sen tlajli, on amatlajli noneki kijtos ika oksejpa uelis nenkouaskej para nemoyaxka* yes oksejpa.

²⁵'Tla sen israelita nokauas mayanki niman mitsnamakiltis seki itlal, tla ijkon, se yejuan ken kita nisiu uelis mitskouuilis oksejpa on tlajli yejuan omitsnamakiltijkaj.

²⁶'Niman tla on tlakatl xkipiya yakaj yejuan ken kita yejuan uelis kouas on tlajli, pero yejua iselti uelis kisentlalis tomin, tla ijkon, yejua oksejpa uelis kouas on tlajli yejuan okinamakaka. ²⁷Noneki kipouas keski xipan yopanok de on tlamakaualistli desde ijkuak okinamakak, niman uelis kuepilis itomin on yejuan okouilijka on tlajli ichkich ken kitocaroua, niman yejua oksejpa kinoyaxkatis* on tlajli. ²⁸Pero tla xouel okisentlali on tomin para oksejpa kouas on tlajli, tla ijkon, on tlajli iyaxka* yes on yejuan otlakou hasta ajsis on xipan de tlamakaualistli. Ipan on xipan on yejuan achtoj iyaxka* katka oksejpa iyaxka* yes niman yejua uelis nokuepas niman kiselis on tlajli.

²⁹'Tla yakaj kinamakak sen kajli ipan sen ueyikalpan yejuan kiyeualojtok tepantli, yejua oksejpa uelis kouas san kamanon sano ipan on xipan ijkuak okinamakak. ³⁰Pero tla on kajli xokou ijkuak okajxitij se xipan ika okinamakak, tla ijkon, xokaman uelis kouas. Jej para yeika nokauas itech on yejuan okou, niman inyaxka yes ikoneuan niman iuejkakoneuan. Nion ipan on xipan de tlamakaualistli xuelis kuepiliskej iteko yejuan okinamakaka. ³¹Pero on kaltin yejuan onokej ipan kalpantsitsimej kampa xkinyeualojtok tepantli yeskej ken on tlaltin kampa mijlaj. Kijtosneki ika iteko yejuan okinamakaka uelis kouas oksejpa ikan tomin, noso uelis oksejpa kuepiliskej ipan on xipan de tlamakaualistli.

³²'Pero on levitas nochipa ueliskej oksejpa kouaskej on kaltin yejuan onokej ipan inueyikalpan. ³³Tla yakaj koua sen kajli yejuan onkaj ipan inueyikalpan on levitas, on kajli ika onkaj kauilis on levita ipan on xipan de tlamakaualistli, pampa nochi on kaltin yejuan onokej ipan on uejueyikalpanmej de on levitas, teyaxkauan* itech tribu* levi, pampa yejuamej okiselijkej itech on israelitas. ³⁴Pero on tlaltin kampa tlatlakuajkualtiaj on levitas yejuan onkaj iyeualkan iminueyikalpan, xuelis nonamakaskej, pampa on inyaxka yejuamej para yeika.

³⁵Tla yakaj mokniu israelita nochuias manyanki niman xuelis nopanoltis, tejua xpaleui ken tikipaleuiskia sen yejuan xchanej, noso ken se nemotenotskau yeskia ipan nemochan, niman xkaua ma chanti mouan. ³⁶Maka itlaj tikuilis, nion maka tiktlajtlanilis itlanka motomin yejuan tiktlanejtia, yej xteititi ika tiktlakaita moTEKO Dios, niman xseli on mokniu israelita ipan mochan. ³⁷Maka itlaj tiktlanilis motomin ijkuak tiktlanejtia, nion maka patioj tiknamakiltis on tlakuajli yejuan tikmakas. ³⁸Nejua nemoTEKO Dios yejuan onemechkixtij Egipto para nemechmaktilis on tlajli de Canaán niman para ninochuias nemoDios.

³⁹Tla yakaj mokniu israelita nokauas mayanki niman nonamakas motech, maka tiktekitiltis ken sen esclavo. ⁴⁰Xpiya ken yakaj motenotskau noso ken sen kuajli tekkitketl yejuan tiktlaxtlauilis. Yejua tekitis motech hasta kaman ajsis on xipan de tlamakaualistli. ⁴¹Kemaj uelis kisas iuan ikoneuan niman nokuepas intech on yejuan ken kinta, niman ipan itlal yejuan okiselij itech iuejkatajuan, ⁴²pampa on israelitas yejuamej notekipanojkauan yejuan onikinkixtij ipan on tlajli Egipto. Yejua ika, xkuajli nonamakaskej ken esclavos itech yakaj. ⁴³Maka inka xmauilti noso xkintekitilti chikauak. Yej xteititi ika tiktlakamati moTEKO Dios ika on motlakaitalis.

⁴⁴Tla tikneki tikimpiyas esclavos noso esclavas, xkinkoua de oksekimej naciones yejuan chantij moyeualkan. ⁴⁵No ijki, uelis tikinkouas tlakamej yejuan xchanejkej, yejuan chantij motech, niman inkoneuan yejuan tlakatiskej ijkuak nemij ipan nemotlal. Yejuamej uelis nenkinkouaskej para nemoyaxkauan yeskej. ⁴⁶Niman ijkuak nenmikiskej, in esclavos nokauaskej intech nemokoneuan, niman intech tekitiskej hasta mikiskej. Pero nemejuamej israelitas xuelis inka nemajauiltiskej nion nenkintekitiltiskej chikauak nemoknivan israelitas.

⁴⁷Tla yakaj xchanej yejuan chanti ipan motlal nochuias rico, niman sen mokniu israelita nokauas mayanki niman nonamaka itech on rico yejuan xchanej, noso itech yakaj okse yejuan ken kita on rico, ⁴⁸mokniu israelita uelis kitlaxtlauas para ma kimakauakan maski tla yononamakaka. Noso yakaj yejuan ken kita kenon ikniu, uelis kitlaxtlauas para ma kimakauakan, ⁴⁹noso itioj, noso iprimo, noso yakaj yejuan nisiu ken kita. Niman tla yejua iselti uelis kisentlalis tomin para kikuepilis iteko yejuan okojka, tla ijkon, no uelis nomanauis san iselti. ⁵⁰Ma kixitili iuan iteko desde on xipan ijkuak ononamakak niman kipouaskej hasta ipan on xipan de tlamakaualistli. San kitlaxtlauas de on keski xipan yopanok niman on keski xipan yotekit. Kixitiliskej kech kimintlaxtlauiiaj on tlakeualtin. ⁵¹⁻⁵²On mayanki noneki

kitlaxtlauilis iteko san para on keski xipan yejuan poliui hasta on xipan de tlamakaualistli. ⁵³Noneki tikpiyas ken sen tlakeuajli yejuan otikmakak tekittl para se xipan. Maka xkauili on iteko ika ma nauilti.

⁵⁴Tla xokitlaxtlaui para ma kimakauakan ipan on tonaltin, tla ijkon, kinmakauaskej ipan on xipan de tlamakaualistli, iuan nochi ikoneuan. ⁵⁵On israelitas notekipanojkauan yejuan onikinkixtij ipan on tlajli Egipto. Nejua nemoTEKO Dios nikijtoua.

Kiselis tlatiochiualistli para yejuan kitlakaita niman kitlakamatis toTEKO

(Dt 7.12-24; 28.1-14)

26 ¹Maka xkinmochijchiuilikan ídolos, nion tlaixkopinaltin. Ipan nemopaís maka nenkitelketsaskej itlaj tetl yejuan nenkimauistiliskej, nion temej yejuan ipan nenkixneskayotiskej tlajtlamach* para nenkimauistiliskej. Maka imixpan nemotlakuantelketsaskej, pampa nejua ninemoTEKO Dios. ²Xtlakaitakan notonaluan sabádos, niman xtlakaitakan noyektabernáculo. Nejua nemoTEKO nemechnauatia.

³Tla nenkintlakamatij noleyes, niman nenkejeuaj notlanauatiluan, niman nenkichiuaj on tlen nikijtoua, ⁴nejua nikchuias para ma kiaui ipan nemotlal ijkuak noneki kiauís. Niman on tlajli kuajli tlatlakitis, niman on kojtin* no kuajli tlakiskej. ⁵Nenkipiyaskej trigo hasta ijkuak nenkitekiskej uvas, niman nenkipiyaskej uvas hasta ijkuak nenkitókaskej trigo. Nenkiuaskej tlakuajli hasta kuajli nenmixuiskej, niman xikan nemojtijli nennemiskej ipan nemopaís. ⁶Nejua nikchuias para nemoyolika xnemikan. Niman ijkuak nenkochiskej xitlaj* nenkimakajsiskej, pampa nejua nemechmanauis ipan on país. Nikchuias para nochi yolkej yejuan tekuanimej ma poliuiikan, niman no xok onyas guerras. ⁷Nemejuamej nenkintotokaskej nemotlauelikniuan niman nenkinmiktiskej ika nemoespada. ⁸Makuiltimej de nemejuamej nenkintojtokaskej 100 nemotlauelikniuan. Niman 100 de nemejuamej nenkintojtokaskej 10 mil nemotlauelikniuan. Niman nenkinmiktiskej ika nemoespada. ⁹Nejua nemechtiochuias niman nemechmiyekilis. Niman nopacto* nochipa nikpiyas nemouan. ¹⁰Nemejuamej sanken* nenkiuaskej on trigo yejuan youejkau yejtikaj, niman nonekis nenkixtiskej de nemokueskonuan para nenkeuaskej on trigo yejuan yenkuik.

¹¹Nejua nichantis nemouan ipan noTabernáculo niman xnemechtlauekkaus. ¹²Nochipa ninemis nemouan. Nejua ninemoDios yes niman nemejuamej nenyaskej nokoneuan.

¹³Nejua ninemoTEKO Dios yejuan onemechkixti ipan on país Egipto para maka sa xnemikan esclavos de yejuamej. Nejua onemechkixtilij on kojtlí* yetik itoka yugo yejuan onkatka nemokechpan ken on uakaxtin yejuan tloxoponiaj*. Nejua onikchiu para xok nemopachojtiaskej ken ijkuak nenesclavos katkaj. Yej aman nentlamakaualtin, niman nenmelajkatlachixtiuij.

On castigo para yejuan xkitlakamati toTEKO

(Dt 28.15-68)

¹⁴‘Pero tla nemejuamej xnenkitlakamatij niman xnenkichiuaj nochi notlanauatiluan, ¹⁵niman yej xipan nenkitaskej niman xnenkinekiskej nenkakiskej on tlen nemechijlia, niman ipan nenchojcholoskej on pacto* yejuan onikchiu nemouan, ¹⁶tla ijkon, nejua no nemechchiuilis in yejuan sanoyej temojtij. Nemechtitlanilis: kokolistli yejuan mechkokoxkamiktis kayolik, chikauak totonalistli*, kokolistli ipan nemixtololojuan, niman kouajsiuistli ipan nemotlalnakayo. Niman maski nentôkaskej ipan nemotlal, sanenkaj yes, pampa nemotlauelikniuan kikuaskej on tlakyotl. ¹⁷Nejua ninochiuas nemotlauelikniú. Nemotlauelikniuan nikinkauilis ma mechtlanikan. Kemaj yejuamej mechtlankapiyaskej. Niman nemontlatlaksaskej ikan nemojtijli maski xakaj mechtojtoka.

¹⁸‘Niman tla sanken* xnenechtlakamatij maski yonemechtitlanilij nochi in tlen sanoyej xkuajli, tla ijkon, nikmiyekilis nemocastigo chikomepa más chikauak ipampa nemotlajtlakoluan. ¹⁹Nikpopolos nemoueyimatilis. Nejua nikchiuas para maka sa ma kiauui, niman on tlajli maka sa ma tlatlakiti. ²⁰Sanenkaj nemosiauiliskej, pampa on tlajli xitlaj* kitlakitis nion on kojtin* xok tlakiskej.

²¹‘Tla sanken* nennechixnamikij niman xnenkinekij nennechtlakamatiskej, nejua oksejpa nikmiyekilis nemocastigo okse chikomepa más ipampa nemotlajtlakoluan. ²²Nikintitlanis tepeyolkej temojtij tekuanimej para kinmajasiskej niman kinkuaskej nemokoneuan. Niman no kinmajasiskej nemoyolkauan niman kinkuaskej. Ijkon tej, xok nenmiyekej yeskej hasta xok yakaj kistinemis ipan nochi ojtli niman ojtsitsimej.

²³‘Maski tla nochi yejua in yonemechchiuilij, sanken* xnenmokueklaliaj niman xnenkichiuaj on tlen nejua nikneki niman yej sanken* nennechixnamikij, ²⁴nejua no ninochiuas nemotlauelikniú niman nikmiyekilis nemocastigo chikomepa más ipampa nemotlajtlakoluan. ²⁵Nikinuajtitlanis nemotlauelikniuan ma mechtlakuepiltikan pampa nenkichojcholuaj on pacto* yejuan onikchiu nemouan. Niman tla nenchojcholoskej niman

nemoniyanaskej ipan nemokalpanuan, tla ijkon, nikchiusas ma mechajsi sen kokolistli yejuan temiktia. Kemaj nemotlauelikniuan mechtlaniskej.

²⁶ Kemaj nejua nikchiusas ma tlami on tlen nenkikuaj. Ijkuakon majtlaktli siuamej kikxitiskej pan san ipan se horno. Kemaj san nenkipouaskej on pan niman nenkimoxexelouiliskej semi achijtsin yejuan cada se de nemejuamej nenkuaskej niman xnemixuiskej.

²⁷ Niman maski tla nochi in yonemechchiuilij, sanken* xnennechtlakamatij, yej sanken* nennechixnamikij, ²⁸ nejua no nemechixnamikis. Niman ikan tlauejli nikmiyekilis nemocastigo chikomepa más ipampa nemotlajtlakol. ²⁹ Niman pampa sanoyej nenmayanaskej, hasta nemokoneuan tlakamej niman siuamej nenkinkuaskej. ³⁰ Nejua nixinxoxotonis kampa nenkimauistiliaj nemodioses ikuapan tepemej. No ijki, nikintetlajtlapanas nemotlaixpanuan* kampa nenkitlatiaj kopajli. Nemotlalnakayouan nikintepayolos ipan on nemoídolos yejuan no xyoltokej. Sanoyej nikualanis nemotechkopa. ³¹ Nixinxoxotonis nemokalpanuan niman nemotiopanuan, niman xok nixselis inajuiyalis nemouen yejuan nikuelitaya.

³² Nikxoxotonis nemopaís, niman nemotlauelikniuan yejuan uajlaskej uajchantiskej tlamojkaitaskej ken tlaixpolijtos.

³³ Niman nemejuamej nemechtotokatinemis ika sen espada niman nemechchajchayauas nochiiuyan imanian naciones. Nemopaís nokauas ken sen xalpatlajkan, niman nemokalpanuan momoxiuiskej hasta ipan tlajli. ³⁴⁻³⁵ Kemaj on tlajli kiselis on neseuijli yejuan nemejuamej xonenkimakakej cada chikomej xipan ijkuak nenchantiyaj ompa. On tlajli noseuis chika nemejuamej nennemiskej ken esclavos ipan on tlaltin de nemotlaluelikniuan. Melauak nenkajteuaskej on tlajli niman yejua kipiayas neseuijli chika nennemiskej ipan imintlal nemotlauelikniuan.

³⁶ Niman nemejuamej yejuan sanken* nennemiskej ipan imintlal nemotlauelikniuan, nikchiusas para sanoyej xmojkamikikan hasta sen xojtli uaki ijkuak nenkakiskej chapanis nemontlatlaksaskej ken yakaj mechtojtokaskia ikan sen espada, niman nenuejuetstiaskej maski xakaj mechtojtokas.

³⁷ Hasta nemoxixinijtiaskej se iuan okse ken nenchojcholoskiaj de sen guerra maski xakaj mechtojtoka. Yejua ika, nion se de nemejuamej xuelis kimixnamikis nemotlauelikniuan.

³⁸ Niman ompa nenmijmikiskej intsajlan on naciones de nemotlauelikniuan. Nemotlauelikniuan de on país tlamiskej mechpopoloskej. ³⁹ Niman nemejuamej yejuan sanken* nennemiskej ipan intlal nemotlauelikniuan, nenmikiskej ipampa

nemoxompayejeualis, niman nenmikiskej san seknek iuan nemotajuan ipampa iminxompayejeualis^e.

⁴⁰‘Pero tla nemoyolkuitiskej niman nennechijliskej nochi nemotlajtlakoluan, niman on tlajtlakojli yejuan okichijkej nemoachtojtauan ika nixkooyejyejkej niman ika onechixnamikkej, ⁴¹niman yejua ika nejua no onemechchixnamik, niman onemechuikak ipan iminpaís nemotlaueliknluan, niman ompa on xkuajli nemonemilis nenkitaskej ika xitlaj* kijtosneki, ⁴²tla ijkon, nejua nikelnamikis on pacto* yejuan onikchiu iuan Abraham, Isaac niman iuan Jacob. Niman no nikelnamikis ika onikintlajtolmakak para nikinmakas yejuamej niman iminuejkakoneuan on tlajli Canáan. ⁴³Pero achtoj, nochimej on tlakamej nonekis kisaskej ipan on tlajli. Kemaj on tlajli kiselis on neseuijli yejuan nemejuamej xonenkimakakej cada chikomej xipan ijkuak nenchantiyaj ompa. Pero nemejuamej ika onkaj nenmoyolkokoskej ipampa nemotlajtlakoluan niman pampa xonenkitlakamatkej notlanauatiluan, nion xonenkinekej onenkiselijkej noleyes.

⁴⁴‘Pero maski nenkichiuaskej miyek tlajtlakojli niman nennemiskej ipan iminpaís nemotlaueliknluan, nejua nemechelnamikis. Xnemechtlauelkauas, nion xtlamis nemechmiktis nemochimej*, nion xnikelkauas on pacto* yejuan onikchiu inmiuan nemoachtojtauan pampa nejua ninemoTEKO Dios. ⁴⁵Yej, nikelnamikis on pacto* yejuan onikchiu iminuan nemoachtojtauan ijkuak onikinkixtij Egipto imixpan on oksekimej naciones, para oninochiu iminDios. Nejua nemoTEKO nikijtoua.”

⁴⁶In yejua leyes, tlanauatiltin, niman tlamachtiltin yejuan toTEKO okimakak Moisés ipan on tepetl Sinaí para on israelitas.

Nochi tlen noteyaxkatia itech Dios uelis notlaxtlauas para nomanauis

27 ¹ToTEKO okijlij Moisés: ²“Ijkin xkinmijli on israelitas: ‘Ijkuak yakaj kinekis kitlaxtlauas ipampa yajkaj yejuan onoteyaxkatij itech toTEKO, para kimanauis ijkin nonekis kitlaxtlauas: ³Para sen tlakatl yejuan kipiya 20 xipan hasta 60 xipan, kitlaxtlauas 50 tepostomin de plata ijkon ken kitlajtlani ipan on tabernáculo. ⁴Niman para sen suatl, kitlaxtlauas 30 tepostomin de plata. ⁵Para yejuan kipiay makuijli xipan hasta sempoajli xipan, kitlaxtlauaskej sempoajli tepostomin de plata tla tlakatl, noso majtlaltli tepostomin de plata tla suatl.

e 26.39 Sekimej versiones kijtouaj: “nenmikiskej ipampa nemoxompayejeualis niman iminxompayejeualis nemotajuan”.

⁶Para kokonej yejuan kipiay se metstli hasta makuijli xipan, kitlaxtlauaskej majkuijli tepostomin de plata tla tlakakonetl, noso yeyi tepostomin de plata tla siuakonetl. ⁷Para on yejuan kipiay 60 xipan para tlakpak, kitlaxtlauaskej kaxtojli* tepostomin de plata tla tlakatl, noso matlaktli tepostomin de plata tla siuatl.

⁸Niman tla sen tlakatl sanoyej mayanki niman xuelis kitlaxtlauas on tomin ken yoniktalij, tla ijkon, noneki konijliskej on tiopixki. Niman on tiopixki kixtlalos kech tepostomin de plata uelis kitlaxtlauas on mayanki yejuan okichiu on promesa ixpan Dios.

⁹Tla sen yolki yejuan kuajli para kitemakaskej notech nejua nemoTEKO yejuan onechprometerouilijkej, on yolki ikatlakajtli nokauas noyaxka. ¹⁰On yolki xuelis kipatlaskej iuan okse yolki maski yejuan más kuajli noso xmás kuajli. Tla saman kipatlaskiaj, tla ijkon, on omemej yolkej nokauaskej ikatlakatl noyaxkauan.

¹¹Pero tla yakaj kineki kiuentlalis sen yolki yejuan xchিপauak nixpan nejua nemoTEKO, tla ijkon, on yolki kuikaskej itech on tiopixki, ¹²para on tiopixki kixtlalos kech notlaxtlauas ijkuak yokitak kenemej on yolki. Kemaj on tiopixki kijtos kech kitlaxtlauaskej, niman ichkich yes. ¹³Pero tla sakin* kinekis oksejpa kitilanas on yolki, kitlaxtlauas on kech kixtlalos on tiopixki niman kitemakas okse 20 por ciento más, para ijkon, on yolki oksejpa iyaxka* yes.

¹⁴Tla yakaj nechyaxkatis ichan para nejua nemoTEKO, on tiopixki kixtlalos on kajli para kijtos kech ika patioj, niman ken kijtos on tiopixki ichkich yes. ¹⁵Pero tla on yejuan onechyaxkatij ika oksejpa kinekis kipiayas on kajli para iyaxka* yes, noneki kitlaxtlauas kech okijtoj on tiopixki niman kitemakas 20 por ciento más. Niman ijkon, on kajli oksejpa iyaxka* yes.

¹⁶Niman tla yakaj nechyaxkatis seki itlal yejuan okiselij de itajuan, tla ijkon, on tiopixki noneki kitas kech ika ueyi on tlajli niman kixitilis kech kitlakitis on tlen kitokaskej ipan. San ma tikonijtokan, tla ipan on tlajli kalakis 220 litros iyoltsin cebada, tla ijkon, noneki kitlaxtlauas 50 tepostomin de plata.

¹⁷Niman tla sen tlakatl nechyaxkatis itlal ijkuak peua on xipan de tlamakaualistli, tla ijkon, sano ichkich kitlaxtlauas para kouas oksejpa on tlajli. ¹⁸Pero tla nechyaxkatis on tlajli ijkuak yopanok on xipan de tlamakaualistli, tla ijkon, on tiopixki kixtlalos on tlajli para kijtos kech ika patioj, niman on tlakatl noneki kitlaxtlauas sa on keski xipan poliui ijkuak oksejpa ajsis on xipan de tlamakaualistli.

¹⁹Niman tla on tlakatl yejuan onechyaxkatij itlal oksejpa kinekis kipiayas on tlajli para iyaxka* yes, tla ijkon, noneki kitlaxtlauas on kech kixtlalos on tiopixki niman okse 20 por ciento más. Niman ijkon, on tlajli oksejpa iyaxka* yes. ²⁰Pero tla

xkouas para oksejpa iyaxka* yes, niman yej kinamakiltiskej yakaj okse, tla ijkon, xokaman uelis iyaxka* yes. ²¹Ijkuak ajsis on xipan de tlamakaualistli, on tlajli nechyaxkatiskej nejua nemoTEKO para yeika, niman inyaxka yes on tiopixkej.

²²Tla yakaj nechyaxkatia, nejua nemoTEKO, sen tlajli yejuan san okou yejuan xokiselij itech ifamilia, ²³tla ijkon, on tiopixki kixtlalos iuan on tlakatl kech ika patioj on tlajli hasta ijkuak ajsis on xipan de tlamakaualistli. Niman on tlakatl kitlaxtlauas ipan on tonajli ijkuak kijtoskej kech ika patioj on tlajli niman on tomin noyaxka* yes, nejua nemoTEKO. ²⁴Pero ijkuak ajsis on xipan de tlamakaualistli, on tlajli oksejpa iyaxka* yes on tlakatl yejuan más achtoj iyaxka* katka yejuan okinamakaka, noso nokauas intech iuejkekoneuan.

²⁵Nochi on tlajtlamach* yejuan nenkitlaliliskej kech notlaxtlauas, noneki nenkixitaskej ikan tepostomin yejuan yejtik majtlaktli gramos cada se, ijkon ken kitlajtlanij ipan on tabernáculo.

On yenkuiyomej niman on tlajtlamach* yejuan teyaxka* itech toTEKO

²⁶Xakaj uelis nechinmaxkatis on yolkej yejuan achtoj tlakati, pampa on ye noyaxkauan, ken on uakaxtin niman borregos. Yejua ika, maka oksejpa nennechyaxkatiskej nejua nemoTEKO. ²⁷Pero tla nenkinekij nennechyaxkatiskej sen yolki yejuan achtoj tlakati pero on yolki xchipauak nixpan, iteko on yolki uelis kitlaxtlauas ken kixtlalos on tiopixki para kech yes. Niman noneki kitlaxtlauas okse 20 por ciento más. Pero tla iteko on yolki xkineki kouas, tla ijkon, on tiopixki kinamakiltis san akinon ken yejua kixtlalos kech yes.

²⁸Pero tla yakaj kiyaxkatia* toTEKO seki on tlen kipiya, kenon yakaj tlakatl, nose sen yolki, noso sen tlajli yejuan kiselia itech ifamilia, niman nechyaxkatia para nochipa, xok yakaj uelis kinamakiltiskej nion kouaskej oksejpa, pampa yejua on nochi noyaxka* para yeika niman sanoyej tlatichijtli para nejua nemoTEKO. ²⁹Tla sen tlakatl yokitlajtlakolmakakej para mikis, xakaj uelis kitlaxtlauas ipampa yejua. Yej, ika onkaj mikis.

³⁰On diezmo* de nochi on tlen tlaki ipan nemotlatok, nochi iyol noso iteyo on tlatoktli, noso itlakyo on kojtin, noyaxka* niman tlakauijli para nejua nemoTEKO, niman tlatichijtli para nejua. ³¹Tla yakaj kinekis oksejpa kikuis on diezmo* yejuan onechmakak, noneki kitlaxtlauas on kech kitocaroua niman okse 20 por ciento más.

³²De cada majtlaktli yolki noneki se nenkixtiskej para nennechyaxkatiskej nejua nemoTEKO. ³³Maka yakaj kitlapejpenis

sen yolki yejuan más kuajli noso yejuan xkuajli nion maka se kpatlas. Pero tla saman se kpatlas, tla ijkon, on yolki yejuan yonechyaxkatijka niman on yejuan ika kpatlas, nokauaskej tlatiochijtin niman ijkon xok uelis oksejpa kinkouas.”

³⁴In yejua tlanauatiltin yejuan toTEKO okimakak Moisés ipan on tepetl Sinaí para ma kimijli on israelitas.